

Ni'ariekate kememite'uyuri

Kememite'utahiawarie 'Iyari Mitiyupata memexeiyani

¹ Neuxei Teukiru, matiarī paiti xapa neputawewi naiti kemitiuyi hepaitsita tikuxatame, Ketsutsi kemititsutia yatiyurieneti meta ti'ikitati,

² mipai tiuyurieka 'ana kananutiwitikieni, 'aitsika warupitiaka ni'ariekate miwaranayexei, 'Iyari Mitiyupata yati'aitakaku.

³ Hikita tiukwineka miki, wahetsia 'uyeikati puyuhekiatakai kemirayenierekai mamariwawemeki tiyurieneti. Huta tewiyari tukari mepix-eiyakai. Tiwakuxaxatiwame kemireuyewetse Kakaiyari ti'aitametikaku.

⁴ Hiki wahamatia tikwati mipai katini-waruta'aitiani:

—Kerutsaremetsie xepika'ayekikani, matsi xekeneta'ikwewani tita ne'ukiyari mitixatakai kename tixehani'airieni, ketita xemite'u'eni netikuxatakaku:

⁵ Wani haki xeikia katini'iyanekaitini, xeme matsi 'Iyari Mitiyupataki xepika'iyarieni yapaimexia tukari 'anukayayu.

⁶ Hiki miki hamatiana memuyukuxeiri mipai mekateniku'iwawiyakaitini:

—Ti'aitame, hikiri petihekwatiani 'Ixaheri mira'aitakaitsie?

⁷ Ketsutsi mipai katiniwarutahiawe:

—Xeme xehetsie pikatinake xemitemaikaki kepauka tukari mitinake. Ne'ukiyari xeikia yakatini'aitani.

⁸ Matsi xekanitiririkariyarekuni 'Iyari Mitiyupata yuhetsie xehexeyati. Xemunenierixi xepihikitini xetehekiatati nehapaitsita Kerutsareme, naitsarie Kureyatsie, Tsamariyatsie meta naitsarie kwie manuniere paiti.

⁹ Mipai tikuxatakaku, miki me'ixeyakaku, kananutiwitikieni, hai kaniukuyani memika'ixeyaki.

¹⁰ Hiki yuheima mehautinenierekaku mexi 'a'utimiekai, yapauka 'ukitsi yuhutati wa'aurie mekaniti'uni mehautuxati.

¹¹ Miki mipai mekateniwarutahiawe:

—Karereyutari, titayari mana xeteti'u muyuaw-itsie xeheutenieniereti? Miki Ketsutsi xetsata 'uweti manutiwitikie, kexemite'ixei muyuawitsie heutimieme, yaxeikiata tiyuxexeyati kanin-uamiki.

*Matiyaxi kemiranayexeyarie Kura
hetsiemieme*

¹² Hiki Kerutsareme mekanu'axiani yemuri Huriwu mati'u mirakutewatsie meheyekineka, 'uxipiya tukaritsie tewi kemitipitarie mana muyeikaniki, xeikirumeturuyari petewakai Kerutsareme.

¹³ Hiki me'u'axiaka, kiita mekaneutihaxiani wapaiti memayukuxexeiriwatsie. Muwa mepayetekai Pekuru, Kakuwu, Wani, 'Atirexi, Peripe, Tumaxi, Waxiturume, Mateu, Kakuwu 'Aripeu nu'aya, Tsimuni Tseruti kiekame meta Kura Kakuwu nu'aya.

14 Miki yunaiti xei'iyariyari mepexeyakai, meyuxewiti nenewieriki mepi'ayumiemetetikai, 'ukarawetsixi yunaiti, Mariya Ketsutsi maamaya meta 'iwamama.

15 Hiki miki tukaritsie Pekuru yu'iwama wahixiapa kaniutakeni, teiteri memuyuxeiriekai xeitsienituyari heimana xetewiyari mekaniyupaimekaitini,

16 mipai Pekuru katiniwarutahiawe: «Ne'iwama, kaneuyewekaitini 'utiarika maye'aniki, meripaiti kemutayi 'Iyari Mitiyupata, Rawiri mipai 'utayiku Kura hepaitisa, miki kemi'ane miwarewiti Ketsutsi miwiyarieniki.

17 Kura tahamatia puyeikakai, meta tahamatia piti'uximayakai.

18 (Hiki tumini mu'itiarieki kwie kaniunaneni, mana 'atiweka yumu'uki kaniukaweni kaniutat-sane, kwinurieya naiti kanawiwieni.

19 Kerutsareme memitama yunaiti mepite'utamari, 'ayumieme mana kwiepa 'Atserirama katinakutewaka waniukiki, maniyine “Xuriya Mataxiri” katinakutewaka).

20 »Kariki Niawari xapayari puta'utiarie mipai 'anuyiti:

»“Kiiya 'uyemaweti ke'ayani,
muwa nixewiti pika'ayekani”.

Metatsiere mipai pire'uxa:

»“Kemitihiritiariekai xewiti pita hetsiena mieme kerayani”.

21 'Ayumieme, kaneuyeweka xeime temanayex-eiya munierixi tahamatia memu'uwakai tukariki kepauka Ti'aitame Ketsutsi tahetsia muyeikakait-sie,

22 miki tukaritsie Wani meka'iyaxitsie, meta kepauka tatsata manutiwitikietsie, peuyewetse miki xewiti memunenierixi tahamatia tihekiatati mayaniki kemiranukuke».

23 Hiki yuhutame mekaniwaranayexeiya Kutse Waritsawaxi mititewakai meta Kutsitu mitimatiwakai, metatsiere Matiyaxi panayexeiyarie.

24 Hiki mipai mekateniyutanenewieni: «'Eki Ti'aitame yunaima wa'iyari pemimate. Ketaneux-eitsitia kemi'ane pemanuyexeiya 'iki yuhutame wahetsie,

25 hetsiena mitinakeniki 'iki hepaitsita mihiritiarieniki mitani'arieniki, Kura mitiuhayewaxiki yu'itima metiaki».

26 'Iniari mepuwewi kemi'ane rahetsie mitinakekekai. Matiyaxi hetsie katiniunake. Miki ni'ariekate wahamatia matiwati patia tamamata heimana xewi.

2

'Iyari Mitiyupata kemitinua

1 Hiki 'atahutarieka Tsemana 'ixiarariyari 'aye'aku, yunaiti mepiyuxeiriekai yameteyurienike 'auxeikia.

2 Yapauka taheima mieme 'eka hepai 'aneti kaniukuyani tirikaiyeti yemieti, miki yuariya kiita putahinixi memuwayetekaitsie.

3 Hiki tai hepai 'aneneti puyuhekiarixi yux-exuime wahetsie.

4 Yunaiti 'Iyari Mitiyupataki meputihinixi, meta mepitsutia me'utiniuti hipame niukiyariki, 'Iyari kemitiwapitiakai memitiniuniki.

5 Hiki Kerutsareme mepititekai huriyutsixi Kakaiyari memayexeiya, yunaime nuiwarite watsata memi'ayumiemetetikai naitsarie muyuawitia.

6 Kepauka yuariya memu'eni yunaiti mepuyuxeiri, mepiyuxamuriekai yuxexuiti yuniukiki memiwa'eniekaiki me'utiniukame.

7 Mepi'iyarixiekai meta mepihixiyakai mipai me'utiyuati: «¿Neuxei, 'iki yunaiti memutiniuka mekatekarereyutari?

8 ¿Ketitiri 'iki tetewa'enie taxexuiti taniukiki meputiniuka ketemite'ununuiwaxi?

9 Parutiyatari, meriyatari, 'eramitatar, Met-suputamiya kiekatari, Kureyatsie, Kaparutsiyatsie, Punitutsie meta 'Atsiyatsie,

10 Pirikiyatsie, Pamipiriyatsie, 'Ekipitutsie, Ri-wiya 'aurie mukumatsie Tsirene temitama, xumatar memi'iwatatiwe,

11 huriyutsixi, hipati huriyutsixi memayuyeitia, kiretatari, 'arawiyatari, tanaiti tepiwa'enie taniukiki memutiniuka, Kakaiyari kemitimariwe mekuxatame».

12 Yunaiti mekani'iyarixiekaitini, 'at-simekatemaiti ketiti mitiyianekai, yuxexuiti mipai meteyikihaweti: «¿Ketiti 'iki pitiyiane?»

13 Hipati mewananaimati xeikia mipai mekaniutyuanekaitini: «Winu makakaki xeikia mepuhuxa».

Pekuru yumiireme wahixie kemitikuxata kai

14 Hiki Pekuru 'anukukeka tamamata heimana xewi wahamatia, karima kaniutaniuni, mipai katiniwarutahiawe: «Neuxei huriyutsixi, yunaiti

Kerutsareme xemitama, xeketenemaika ketiti mitiyiane, hiki xekeneneu'eni kenemitayini.

¹⁵ 'Iki mepikatarawe xeme xemitaku'eriwa hepai, matsi puximeri 'akuxi 'etsiwa xeikia puxika.

¹⁶ 'Ikitsi kanihikitini tita mitixatsiwakai, tixax-atame Kuheri ya'utainekaku:

¹⁷ »Mipai paine Kakaiyari: “Tukari 'aye'ayu kepauka mitaparirimeni mipai pitiyini, ne'iyari nepitatuani teiteri yunaime wahetsie.

Xeniwema 'ukitsi meta 'ukari mepitetaxata, meta temari heinitsi hepai 'anekame mepitexeitsitarieni, 'ukirawetsixi mepiteheinini.

¹⁸ Miki tukaritsie ne'iyari nepitatuani, miki nete'uximayatsiriwamete 'ukitsi meta 'ukari wahetsie, mepitetaxata nehetsiemieme.

¹⁹ Nepiwahixiyatsitiani waheima muyuawitsie meta kwiepa 'iniari nepitiyurieni, xuriyaki, taiki meta haiwitiri kitsiyariki.

²⁰ Tau kaniyirimiki, meta metseri xuriya hepai 'aneti kanayeimiki mexi 'akuxi Ti'aitame kanuaweni, kepauka mariwemeki mitiyurienitsie.

²¹ Yunaiti kemi'ane Ti'aitame memahiawe, miki mekanitawikweitsitariiekuni”.

²² »'Ixaheri teiteriyari, 'iki niuki xekene'enieka: Kakaiyari xetsata pitahekiataxi Ketsutsi natsaretitanaka mariwemeki tiyurieneti tirikaiyemeki, wahixiyatsitiatu meta 'iniariki

tiyurieneti miki hetsiemieme, Kakaiyari kemitiuyuri xeme xekatenimaika.

²³ 'Tki kaniyetuiyani yamiraye'aniki Kakaiyari mipai timaiti, matiaripaiti, kaneiye'ani miyetuiyaniki, teiteri 'axateyuruwamete xetewaruta'aitiaka xekaniwiya, kuruxitsie xe'ikawieka xekanimieni.

²⁴ Matsi Kakaiyari kanenukuketiani, 'ixinaka kemirehiyakai mikiti, miki pikayiwekai mikiti muyuhayewaki.

²⁵ Rawiri mipai paine hepaitsitana:

»“Ti'aitame yuheyemeki nehixie nepixeyakai, miki netserieta mutiweki ne nepikahatiweni.

²⁶ 'Ayumieme ne'iyari puyutemawie, nenetemawieteti neputakwika, yaxeikiata newaiyari 'apuyeikani ta'ikwewati.

²⁷ 'Eki pepikanetsiku'eirieni mikite wateukiyapa muyuhayewaki, 'eki pepika'ipitiani 'iyari mipatsie mikatiuka'eniwaniki.

²⁸ Pepinetsi'uxeiyatsitia huye tukariyari nemex-eiyaniki, waikawa pepinetsihetemawieritiani kepauka 'ahixie nemeta'ani”.

²⁹ »Neuxei 'iwamarixi, 'aixia kani'aneni heitseriemeki mitixekuxaxatiwaniki tatewari Rawiri hepaitsita, kaniumi meta tiukateukie, maka-teukietsie mana kaniukani tatsata hiki 'akuxi.

³⁰ Tixaxatame pihikitikai meta katinimaikaitini kename Kakaiyari 'iyihiritia heitseriemeki mipai

'utaiti, xewiti Rawiri hetsie miyeyanikekai heit-serie pipitiariennekai Kiritsituti, pikayennekai 'uwenieya mira'aitatsie.

³¹ Matiaripaiti 'ixeyati mipai kaniutayini, Kiritsitu kemiranukuke tikuxatati, mipai 'utaiti:

»“Tukarieya mikiti pika'uku'eiriwaxi,
waiyarieya pika'utapinixi”.

³² Hiki Kakaiyari Ketsutsi panukuketia, tame tanaiti temunenierixi tepihiki.

³³ 'Anutiwitikieka mariweti patia, Kakaiyari tserieta, kanitanaki'erieni tita 'ukiyarieya mitiyetuiriennekai, 'Iyari Mitiyupata hikitime. Miki kaniutatuanu hiki kexemite'ixeya meta kexemite'l'enie.

³⁴ Rawiri muyuawitsie pika'anutitia, matsi ya-putayi:

»“Ti'aitame mipai katiniutahiawe neti'aitiwame:
Netserieta kenayexi,

³⁵ miki memimetsi'aye'unie
'ahixie nekaniwa'atiamiki”.

³⁶ »'Ayumieme heitseriemeki mipai xeketene-maika yunaiti 'Ixaheri xemitama, kemi'ane xeme kuruxitsie xemukawi, Kakaiyari Ti'aitame meta Kiritsitu* peyeitia».

³⁷ Kepauka 'iki niuki memu'eni yunaiti yu'iyaritsie mepuhiweritiaie, Pekuru meta hipame ni'ariekate mipai mekateniwarutahiawe:

—'Iwamarixi, ɛkeri teteyurieka?

³⁸ Pekuru mipai katiniwaruta'eia:

—Xeketeneuhayewa 'axakexemiteyurie, meta yuxexuiti xepika'iyarieni Ketsutsi Kiritsitu hetsie,

* **2:36 2:36** Kiritsitu panuyine Manayexeiyarie.

tita 'axaxemite'uyuri, xemiteheuyehiwiyarieni, meta 'Iyari Mitiyupata xehexeiyati xepakine.

³⁹ 'Tki kemutayi xehetsie pimieme, xetiriyama wahetsie meta yunaiti teewa kikamete, tatsiari, miki yunaiti Ti'aitame takakaiyari miwaranayexeiya.

⁴⁰ Hipame miireme niukiki kani-wawawiriekaitini mipai tiwakihaweti:

—Xekeneyutawikweitsitia hiki miemete 'axamemite'u'iyari watsata.

Yuri memite'erie memakuteitsie

⁴¹ Hiki miki niukieya memutanaki'eri meka-niuka'iyarieni, miki tukaritsie mepiwarutini teiteri haika miriyari meyupaimeti.

⁴² Yamepi'ayumiemetetikai ni'ariekate kememite'ikitakai, meyuxewiti meyuparewieti paa metitarati meta meyunenewieti.

⁴³ Yunaiti yu'iyaritsie meheumamati mekanakine, waikawa mamariwawemeki meta 'iniariki memiteyuriekaiki ni'ariekate.

⁴⁴ Yunaiti yuri memite'erie 'axeikia mekanikutekaitini yunaiti meyuxewiti, 'axeikia naime mepitehexeiyakai:

⁴⁵ yukwie meta yupiinite mepitetuakai, mepitewayetuiriwakai yuxexuiti memiteheuyehiwa.

⁴⁶ Tukariki tukita meyakuxexeiriwati mepikatehayewakai. Paa kii meuti'uta mepitekwakai meyutemamawieti, meta 'aixia mete'u'iyariti,

⁴⁷ Kakaiyari hepaitsita 'aixia meputiyuanekai meta yunaiti teiteri 'aixia mepiteku'eriwakai wa-hepaitsita. Tukariki Ti'aitame waxewiriyati miki piwaxeirie kai memitawikweitsitiriwakai.

3

Pekuru tiwawame huriekame 'aixia kaniuyurieni

¹ Hiki Pekuru meta Wani tuki manuwe mekanekine tau kia kawiekaku, nenewieri hurayari 'aye'aku.

² 'Uki hurieti mutinuiwaxi mana kani'atiriwakaitini, tukariki tuki kitenie Witsimi'ane mirakutewatsie mekanitiyetsakaitini parewiya miwaukaki, mana tukita memeutahakekai.

³ Kepauka Pekuru meta Wani miwaruxei tukita meheutahaxi aximekaku, parewiya piwawawirie kai.

⁴ Pekuru meta Wani me'ixeyati, Pekuru mipai katinitahiawe:

—Ketaneuxeiya.

⁵ Miki kaniwaruxeiya tixai mete'iminike 'erieti.

⁶ Pekuru mipai kaniutayini:

—Pirata meta huru nepikahexeiya, matsi ketita nemirexeiya, miki nepimatiyetuirieni. Ketsutsi Kiritsitu natsaretitanaka hetsia nemimiemeki mipai nepaine, kenanukukexi meta kenekuyeikani.

⁷ Tserietana mamayatsie tiwiereka kanenukuhana. Yapauka 'ikateya meta turuteya kaniutitirikaxiani.

⁸ 'Anukutsunaka kaniutakeni, kuyeikati kanayani. Wahamatia kaneutahani tukita 'utitsukwakati 'aixia 'utaiti Kakaiyari hepaitsita.

⁹ Kepauka yunaiti teiteri memixei kuyeikame Kakaiyari hepaitsita 'aixia 'utaineme,

¹⁰ mekaneitimani kename miki hikitikai tuki kitenie Witsimi'ane mirakutewatsie mutiyeixakai parewiya wauti, waikawa mepihixiyakai miyamemitenenierekaiki.

*Pekuru Tsarumuni 'etipiwarietyatia
kemitikuxataakai*

¹¹ Hiki miki tewi Pekuru meta Wani pikawatauniekai, yunaiti teiteri me'unautsaxiaximetri mehixiyati wahetsia mepu'axia, Tsarumuni 'Etipiwarieya meukuwewiya hetia.

¹² Pekuru waruxeiyaka mipai teiteri katiniwarutahiawe: «'Ixaheri teiteriyari, ʔtitayari xetehixiya miyamitiuyiki? ʔtitayari xetatexeiya mipai xeteku'eriwati, tatirikariyaki temite'uyurieni hepai 'iki tewi 'uyeiweme temayeitiaki?

¹³ 'Apirahami, 'Itsahaki meta Kakuwu tatut-sima wakakaiyari, mariweme yuniwe Ketsutsi mayeitia. Xeme xepiyetua meta xepitixani'eri Piratu hixie kepauka miki mixinakekai.

¹⁴ Xeme Mipatsie meta Heitserie mexeiyaxepitixani'eri, xepitawawiri tiyumemiwame pita mixinarieniki.

¹⁵ Tukari tiyupitiwame xepumi, matsi Kakaiyari kanenukuketiani mikite watsata, mikiki tame temunenierixi tepihiki.

¹⁶ Yuri mitiuta'eriki Ketsutsi hetsie, miki 'ayumieme pitatseiriyaxi 'iki xemixeiya meta xemimate. 'Iki tewi yuri kemiti'erie Ketsutsi 'iparewiekaku, mipai naime 'aixia reu'eriekame kaneyeitiani yunaime xehixie.

¹⁷ »Hiki ne'iwama, ne nepitimate xeme meta te'aitamete memanuyetei mipai xepite'uyuri 'at-sixekatemaiti.

¹⁸ Kakaiyari meripaiti mipai putayikai yunaiti Kakaiyari niukametemama mipai me'utiyuanekaku: kename Kiritsitu* tikwinekekai, mipai katinaye'atarieni.

¹⁹ Ayumieme xeketeneuhayewa kexemiteyurie, ta'aurie xekenaxiriekaka manuyeitarieniki tita 'axaxemite'uyuri, xehetsia 'uxi'piya maye'aniki Ti'aitame hetsia mieme,

²⁰ meni'aniki miki Kiritsitu kemi'ane xehetsiemieme mukayerie, Ketsutsi heitserie mupitiarie.

²¹ Peuyewetse mitanaki'eriwa, taheima mexi tukari ka'aye'awe kepauka 'aixia mitiyurieni naime, kememitekuxataikai Kakaiyari niukametemama hetsiena mieme memupatsie meripaiti miemete yame'utiyuanekaku.

²² Muitsexi yuriki mipai kaniutayini: "Ti'aitame xekakaiyari tixexaxatiwame payeitiani xeime xe'iwama watsata mieme nehepai 'anekame. Xeme xepi'enieka naime kemitixetaxatiani.

²³ Kemi'ane miki tixaxatame mika'enieka, yuteiterima watsata kanikumaweriyariemiki".

²⁴ »Kamitsi yunaiti texaxatamete, Tsamueri pitiukatsutia meri, 'arike yunaiti

* **3:18 3:18** Kiritsitu panuyine Manayexeiyarie.

memitekuxatakai, 'iki tukari hepaitsita mekatenihekiatakaitini.

²⁵ Xeme texaxatamete xepiwaniwema, xehetsie katiniunake miki tiratu Kakaiyari mitawewi xetutsima wahamatia, Kakaiyari 'Apirahami mipai katiniutahiawe: “Kemi'ane 'ahetsie miyeyani 'aixia mepi'itiarieka yunaiti nuiwarite kwiepa memitama”.

²⁶ Kepauka, Kakaiyari yuniwe 'anukuketiaka, xehetsia meri kaneini'ani 'aixia mixeyurieniki, yuxexuiti ta'aurie xemaxirieniki tita 'axaxemiteyurie xeteku'eirieme».

4

Pekuru meta Wani 'itsikate wahixie kememite'utahiawarie

¹ Mexi'akuxi Pekuru meta Wani teiteri metewakuxaxatiwakai, yapauka mawari wewiwamete wahetsia mekaniu'axiani, tuki mihiritiarie meta Tsarutseutsixi wahamatia.

² Waikawa mepiha'akai teiteri memitewa'ikitiakaiki, memitewakuxaxatiwakaiki kemiranukuketiarie mikite watsata, me'utiyuati Ketsutsi mexatati.

³ Pekuru meta Wani meputiwiyarie mikiyiririmekaikiri, mepiwaranutaxiri muwa me'ayeteti mepukatariyarie.

⁴ Yumiireti niuki memu'eni yuri mepite'uta'eri, 'ukitsi xeikia me'iniariti 'auxiwime miriyari mepihikitikai.

⁵ Hiki 'uxa'arieka Kerutsaremetisie mepiyukuxeiri wa'ukiyarima, 'ukirawetsixi meta 'iniori niukiyariki memite'ikitametetikai.

6 Mana 'Anatsi mawari wewiwamete tiwa'aitiwame meta Kaipatsi, Wani, 'Arekanituru meta yunaiti 'iwamama.

7 Mana yuhixiapa mewati'uitiaka mekaniwaku'iwawiyakaitini mipai mekateni-waku'iwawiyakaitini:

—ǵKe'anekame tirikariya xehexeiyati, kemi'ane hetsia xemiemetiti miya xepiteyurie xeme?

8 Hiki Pekuru 'Iyari Mitiyupataki hineti mipai katiniwarutahiawe:

—Neuxei teiteri wa'ukiyarima meta 'ukirawet-sixi:

9 Hiki xemitatsiku'iwawiya 'aixia temiyuriki tewi huriekame, miki 'aixiareu'erietu matiaki.

10 Mipai xeketenemaika yunaiti xeme meta yunaiti 'Ixaheri teiteriyari yameketemaika Ketsutsi Kiritsitu natsaretitanaka hetsia mimiemeke, mikitsie tiwiyati 'ena puwe xehixie 'aixia reu'erietu, xeme kuruxitsie xemikawi Ketsutsi, peru Kakaiyari nenukuketiani mikite watsata.

11 'Iki Ketsutsi Kiritsitu kanihikitini:

»“Xeme kii wewiwamete tete xemutixani'eri, matsi miki tete 'itsikina mieme kanayani”.

12 Nixewiti tawarita 'apika'uyeika tatsitawikweitsitanike. Xewiti mumaweki muyuawitia tame teiteri tatsata kimana temitawikweitsitarieniki, miki xeikia pukayerie».

13 Hiki wa'ukiyarima mewaxeiyati kememitekuxatakai Pekuru meta Wani mekamamakame, mipai metehetimaika hatsuaku memikateyi'ikitiakaiki meta tixaiti memikatehimetikaiki, mekanihixiyakaitini,

mekaniwaretimani Ketsutsi hamatia
memu'u'uwakaiki.

¹⁴ Me'ixeyati miki tewi 'aixiamu'it'ariekai
wa'aurie 'uweme, mepikayiwawekairi
memiwaniukimakaki.

¹⁵ Hiki mekaniwarutani'ani memanuyekineki
'itsikate wahixie, miki mekaniuyu'enieni mipai
me'utiyuati:

¹⁶ «¿Keteteyurieni 'iki teiteri wahepaitsita? Yuriki
wakimana 'iniari pireyi, yunaiti kememitemate,
kemitimatsiiki yunaiti Kerutsareme memitama
wahixie. Tame tepikayiwawe tema'imawani.

¹⁷ Matsi tawariri mukakuxaxatsiwaniki teiteri
watsata, kimi tepiwata'imaiya miki hepaitsita
xeime memikatekuxaxatiwaniki».

¹⁸ Yuhetsia mewarutakwewieka mipai
mekateniwaruta'imaiya memikatekuxatanikiri
meta memikate'ikitaniki Ketsutsi hetsiememe.

¹⁹ Peru Pekuru meta Wani mipai mekateni-
waruta'eiya:

—¿'Aixia ti'ane Kakaiyari hixie xeme pita
temixe'enieka miki teka'enieti? Xekeneutimaixia
kemi'ane heitserie mexeiya.

²⁰ Tame tepikayiwawe temitehayewa
tetekuxatati tita temite'uxei meta tita temite'u'eni
hepaitsita.

²¹ Miki tawarita yametewaruta'imaiyaku
mekaniwarutatuani memiyehuki. Teiteri wahet-
sie tixaiti mepikate'ukaxei memiwa'uximatiakaki,
yunaiti 'aixia Kakaiyari hepaitsita memu-
tiyuanekaiki mete'utamarieka kemitiuyi.

²² Miki tewi huta tewiyari heimana yapaimeme
wiyari pexeiyakai 'iniariki 'aixia mu'it'arie.

Yuri memite'erie kememiteyunenewiekai

²³ Hiki Pekuru meta Wani me'utatuika yuteiterima wahetsia mekaniu'axiani, mekateni-warutaxatiani naime kememitewarekiahawekai mawari wewiwameteki memihiritiarie meta 'ukirawetsixi.

²⁴ Kepauka mewaru'enieka 'axeikia meyuxewiti Kakaiyari nenewieri mekaniupitiani: «Ti'aitame Naitsarie pemitiaita, muyuawi meta kwie pemutawewi, haramara meta naime wahetsie mitixuawe,

²⁵ 'eki 'Iyari Mitiyupata heki, Rawiri tatutsi mipai petitaxatiaku, ti'a'uximayatsiriwame mipai putayi:

»“¿Titayari nuiwarite meteyuti'ire,
meta titayari teiteri yaki xeikia metekuxata?

²⁶ Kwiepa te'aitamete mekaneye'unieka,
meta kuwexinaruritsixi
Ti'aitame mepikaha'eriwa,
meta kemi'ane manayexeiyarie
mepikaha'eriwa”.

²⁷ Yuriki 'iki kiekaritsie mekaniyukuxeurieni Herurexi meta Punitsiyu Piratu, teiteri memikahuriyutsixiri meta 'Ixaheri teiteriyari, 'aniwe mipatsie 'ahetsiemieme Ketsutsi me'aye'unieti, kemi'ane pemanayexei,

²⁸ mekaniyukuxeurieni yameteyurienike tita pemitiyurieniekai meripaiti yapitiyuniekai.

²⁹ Hiki Ti'aitame keniwaru'eni 'axake-memutiyuane, ketaneparewieka tame te'a'uximayatsiriwamete tixaiti tekateheumakati 'aniuki temukuxataniki.

³⁰ 'Ayumieme 'ekita 'amamaki keniwaparewieka teiteri memanayexiriyani meta 'iniariki

mamariwaweme petiyurieneti 'aniwe Ketsutsi mĩpatsie hetsiemieme».

³¹ Hiki me'uyutanenewieku mana memayuxeĩrietsie kaniutayuani, yunaiti 'Iyari Mitiyupataki mekaniutihine, Kakaiyari niukieya mekanikuxatakaitini tixaiti mekateheumakati.

Yuri memite'erie yupiiniteki ke-memiteyuparewiekai

³² Yunaiti yuri memite'erie xei'iyariyari mekanexeyakaitini meta yaxeikia mepiteku'eriwakai. Nixewiti piinitiarika yupiini pikarayeitiwakai, matsi 'axeikia naime mekatenexeyakaitini.

³³ Ni'ariekate tirikaiyemeki mekateni-hekiatakaitini Ti'aitame Ketsutsi kemiranukuke hepaitsita. Kakaiyari 'aixia katiniyuriekaitini yunaime miki wahetsie,

³⁴ xewiti reuyehiati mana pika'ukatei. Kemi'ane kwie meta kii, memexeyakai mekanikutuayakaitini, kememite'ituani tuminiyari mekani'atiwakaitini,

³⁵ ni'ariekate wahetia mekanitimanakaitini, miki yuxexuime kememiteheuyehiwa memitewayetuiirwaniki.

³⁶ Hiki Kutse, rewi tewiyari pihikitikai, Tsipiretsie kiekame, ni'ariekate Werunawe mekateniteriwa (taniukiki Ti'yinitiwame panuyine),

³⁷ miki kwie mexeyakai kaneituani, tuminiyari ni'ariekate wahetsia kani'atiani.

5

'Ananiyaxi meta Tsapira 'axakememite'uyuri

¹ Xewitita tewi 'Ananiyaxi titewati yi'itati Tsapira hamatia yukwie mekaniutuanu,

² 'iyayata yatimaikaku, 'etsiwa kaniyuhayewieni kemireituakai, yapaimeme xeikia, ni'ariekate wahetsia kani'atiani.

³ Hiki Pekuru mipai katinitahiawe:

—Neuxei, 'Ananiyaxi, ζtitayari kauyumarie 'a'iyari tini'i, 'Iyari Mitiyupata pemitu'itaiki, yapaimeme pemauku'iiki kwie pemetua hetsiemieme?

⁴ Kepauka mi'akwietikai katini'apiinitikaitini. Peheituaka 'akuxi heitserie pepexeiyakai hepaitsitana. ζKetitayari 'a'iyaritsie miyapetiu'ahiawixi? 'Eki teiteri pepikatiwaru'itai, matsi pita Kakaiyari pekatiniu'itaiya.

⁵ 'Iki niuki 'u'enieka, 'Ananiyaxi 'atiweka pumi. Mepimamakai yemeki yunaiti me'u'enanaka.

⁶ Hiki temari me'anuku'uka hipati me'iku'eimaka mekaneikweni me'ikateukuke.

⁷ Hiki haika hurayari 'aye'aku 'iyaya kaninuani 'atsikatimaiti kemitiuyikai.

⁸ Pekuru mipai katinita'iwawiya:

—ζYakenetineutahiawi, yukwie miyapaimemeki xeikia xetehetua?

Miki mipai katinita'eiya:

—Huu, mipai kanipaimekaitini.

⁹ Pekuru mipai katinitahiawe:

—ζTitayari xeteyu'eni xemita'iniataki Ti'aitame 'Iyarieya? Neuxei 'akina teukumete mana kitenie mekaniuti'uka, 'ekita mekamenanukweikuni.

¹⁰ Yapauka miki kanatiweni Pekuru hixie kaniumi. Hiki temari meheutahaxiaka mikime

mekaniutaxeiya. Meheikweka kinaya 'aurie
mekaneikateuku.

¹¹ Waikawa mepimamakai mana
memiyutixexeiriwakai, yunaiti metehetimaika
'iki kemitiuyi.

Ni'ariekate 'iniari mariwemekī kememite'uyuri

¹² Ni'ariekate wamamaki waikawa 'iniariki
meta mamariwaweme katiniuyini teiteri
wahixie, yunaiti yurimemite'erie 'axeikia
mekaniu'uwakaitini Tsarumuni 'Etipiwarieya
meukuwewiya hetia.

¹³ Hipati teiteri mewamakati wahamatia
mepika'u'uwakai, tsepatiti yemekī 'aixia
memutiyuanekai wahepaitsita.

¹⁴ Yumiireti mepakinirimekai yuri
memite'uta'eriwakaiki Ti'aitame hetsie.

¹⁵ Mepiyuwaikawakairi 'ukitsi meta 'ukarawet-
sixi yaxeikiata tekwiwkikate huyeta meputuar-
ieximekai 'utatsie meta 'itsitsie me'aheiti, Pekuru
tsikeretsi 'etirieya mana wahetsie tiunakeke.

¹⁶ Yumiiretita Kerutsareme 'aurie kiekatari
tekwiwkikate mekaniwa'atīwakaitini,
meta kakaiyarixi 'axamemi'anene
memiwa'uximatiakai, yunaiti 'aixia mete-
heu'erietī mepaki.

Pekuru meta Wani kememite'utaweiyarie

¹⁷ Hiki mawari wewiwame tiwa'aitiwame
meta mana memihiritiarie me'anuku'uka,
yunaiti miki memitsarutseutsixitikai,
mekaniwaruti'uxiwe'erieni.

¹⁸ Hiki ni'ariekate mekaniutiwiyarieni,
katsariyanata mepiwaranutaxiri.

19 Matsi tīkariki niuki tuayame Yawe hetsia mieme katsariyanata pīreyepiexia, pīwaranuyewiti.

20 Mipai tiwakīhiaweti: «Xekenehu, tuki manuwe muwa xeketeniwakuxaxatīwani teiteri naimē tewi tukari kemirexeiyani hepāitsita».

21 Miki me'u'enanaka kememite'utahiawarie, tukita ximeripaiti mekaneutahaxiani, muwa mekatēnī'ikitakaitini.

Kepauka mawari wewiwame tiwa'aitiwame meta mana memihiritiariē, meta wahamatia memu'uwakai me'u'axiaka, 'itsikate yunaimē 'Ixaheri xīyarimama 'ukirawetsixi mekaniwarutaxatiani. Tupiritsixi mekaniwarutani'ani katsariyanata paiti memiwahapayuki.

22 Tupiritsixi me'u'axiaka mepikawarutaxeī katsariyanata. Yu'utia me'akunuaxiaka, mipai mekatēniwarutaxatiani:

23 «Neuxei katsariyana tepetaxeī 'aixia reku-nakame, tehiwemete kitenie mepeti'ukai, perutsi teteheuyepieka nixeime tepikahetaxeī kiita».

24 Tupiritsixi tiwa'aitiwame tukita tihiweme, meta mawari wewiwamete tewa'atiwamete me'u'enanaka mekaniuhixiyani, 'atsimepikatemalaikai wahepāitsita kemitiuyi.

25 'Ana xewiti nuaka katiniwarutahēkīatiani mipai 'utaiti: «Neuxei miki 'ukitsi xemiwaranutaxiri, miki tuki kuraruyarita mepitehekuxata teiteri meteware'ikītiati».

26 Hiki tehiwemete tiwa'aitiwame kaneyani meta 'iparewiwametemama, hau'erietī mekawarahapatī mekaniwa'atiani, teiteri memiwamakarīkaiki teteiki mewarutituaxaki.

27 Hiki mewa'atiaka 'itsikate wahixie mekani-wati'uitiani, mawari wewiwame mihiritiarie

28 mipai katiniwarutatieni:

—Tame tamī tepitexe'uta'imaiyakai xemikate'ikitaniki miki kemītitewa hetsiemieme. Matsi pita, xeme Kerutsareme yi'ikitīarikaki xepite'utihiniyaxi, xeme tahetsie xepite'ahipa miki tewi xuriyayaki.

29 Pekuru meta ni'ariekate mipai mekateni-waruta'eiya:

—Peuyewetse matsi Kakaiyari temi'eniekaki, keyuri teiteri memitate'aitiakaki.

30 Tatutsima wakakaiyari Ketsutsi kananukuketiani, xeme xekanimieni kiyetsie xe'ikuwieka.

31 Kakaiyari yitirikariyaki kanenutiwitini yutserieta kaneyeni Ti'aitame meta Tiyuwikweitsitiwame, mixepitianiki 'ixa-heritsixi xemitehayewaniki kexemiteyurie, xemiteheuyehiwiyarieniki.

32 Tame tekanihikitini temunenierixi temitehekiata 'iki kemitiuyi hepaitsita, mipaita katinihekiatani 'Iyari Mitiyupata Kakaiyari miwarupitia miki memi'enie.

33 Miki me'u'enanaka mekaniuyeha'ani mekaniwakwikukaitini.

34 Peru xewiti 'anukukeka memayuxeirietsie paritseu mihikitikai, Kamarieri mititewakai, 'iniari niukiyariki ti'ikitame mihikitikai, mariweme memi'eriekai yunaiti teiteri, katiniuta'aita memiwaranuyeni'aniki takwa paiti miki teiteri,

³⁵ mipai katiniwarutahiawe: «Neuxei 'ixaherit-sixi, yumarima 'aixia kexemiteyurieni 'iki teiteri wahepaitsita.

³⁶ Meripaiti panukuke Teuraxi, ya'utaiti kename yiwemetikai, nauka tsienituyari 'ukitsi yakititi hetsiena mekateniwiyakaitini. Peru miki pumierie, yunaiti memi'eniekai mepeutaxiriexia, tixai mepikate'aki.

³⁷ 'Arikeketa kananukukeni Kura karereyatanaka kepauka memaka'utsie, teiteri yumiireme kaniwarewitini yu'utima. Mikita pumierie, yunaiti memi'eniekai mepeutayeixia.

³⁸ Hikiri mipai nepaine, xekeniwaruhayewa 'iki teiteri, xekeniwarutixina. Kememiteku'eriwa meta kememiteyurie xika teiteri wahetsia miemetini mekateniwayewakeyu.

³⁹ Mexika Kakaiyari hetsia miemetini, xepikayiwawe xemiwata'imaiya, tietitsi Kakaiyari xe'aye'unieka».

Merikitsi mekani'enieni.

⁴⁰ Yuhetsia mewarutahiaweka ni'ariekate mewarutiwaka mipai mekateniwaruta'aitiani memikatiniuniki Ketsutsi hetsia memiemetetiti. Mekaniwarutixina.

⁴¹ 'Itsikate wahetsia mekaniwayenexiani meyutemamawieti, Kakaiyari meyiawweme miwa'eriekaiki memitawe'eriwaniki hetsiana memimiemetetikaiki.

⁴² Tukariki tukita yukiiteta mepikatehayewakai mete'ikitati metekuxatati niuki 'aixia manuyine kename Ketsutsi heitserie hexeiya Kiritsitutiti me'utiyuati.

6

*'Atahuta teparewiwamete ke-
memite'anayexeiyarie*

¹ Hiki 'ana mepitetamiiriyarimekai
teyi'ikitiwamete. Miki kiriyekutsixi waniukiki
memutiniukakai mepiniukixiekai miki
hepirayutsixi waniukiki memutiniukakai
wahepaitsita, wiuratsixi wahetsia miemete
memiwaratimayakaiki tukariki kepauka
memiwaparewiekai.

² Tamamata heimana yuhutati
mewarukuxeirieka teyi'ikitiwamete mipai
mekateniwarutahiawe: «'Aixia pika'anenikayu
tame Kakaiyari niukieya xika tehayewake
mexatsie xeikia temite'apineniki.

³ Hiki ta'iwama, xekeniwakuwawa yutsata
'ukitsi 'atahutame 'aixia memitehekiatsie
'Iyariki memihipine memitemaiwawe, miki
tepiwahiritiani 'iki hepaitsita kemireuyewetse.

⁴ Tametsi tetanenewieti niukiki texeparewieti
tepi'ayumiemetetini».

⁵ Hiki 'iki niuki piwarunakixi yunaiti
memiyuxeiriekai. Mepiwaranuyexei 'Etsitewani,
'uki yuri miti'eriekai 'Iyari Mitiyupataki
mihinekai, Peripe, Purukuru, Nikanuxi, Timuni,
Parumenaxi, Nikuraxi huriyu mayuyeitia
'Anutiyukiya kiekame.

⁶ Ni'ariekate wahixie mekaniwati'uitiani,
miki meyunenewieti yamekateniwaruhiritiani
waheima me'utimeti.

⁷ Hiki Kakaiyari niukieya kanikux-
axatsiwakaitini: Teyi'ikitiwamete

mepitetimiriyaimekai waikawa Kerutsaremet-sie meta mawari wewiwamete yumireti me'u'enanaka yuri mekateniuta'erieni.

'Etsitewani kemitiuwiyarie

8 Hiki 'Etsitewani 'aixia tiuka'iyariti tirikaiyemeki tiyurieneti waikawa katiniyurienekaitini teiteri watsata, 'iniari mamariwaweme tiyurieneti.

9 Hiki tuki 'epuwekai Xinariekate titewati, miki tsirenetari, 'arekanitiriya kiekatari, Tsiritsiya meta 'Atsiya miemete hamatia mepanuku'ui mehe'iwarimeti niuki mexiatati 'Etsitewani matia.

10 Mepitexiekai kemitikuxatakai mitimaiwekaiki, 'Iyari miparewiekaiki.

11 Mepitewa'aitiakai hipame teiteri memitekuxataniki 'itarikaki: «Tame tepi'enie 'axa'utaineme Muiťsexi hepaitsita Kakaiyari hepaitsita».

12 Mepiwaxamuriekai teiteri, 'ukirawetsixi, miki 'iniari niukiyariki memite'ikitakai. Yapauka me'u'axiaka mekaniwiya, mekaneiwitini 'itsikate wahetsia.

13 Mana mepiwaruti'uitia hipame memitehekiataniki mete'itawati yame'utiyuati: «'Iki tewi pikatihayewa 'axa'utaiti 'iki 'ena Kakaiyari hetsiemieme mipatsie hepaitsita, ta'iniari niukiyari hepaitsita.

14 Tepi'enie mipai 'utaineme kename 'iki Ket-sutsi natsaretitanaka 'iki tuki ka'una, kename 'ipata tayeiyari Muiťsexi mitatsi'upitia».

15 Me'i'ixiarieti yunaiti mana memititekai memayuxeirietsie, mekanixeiya nierikaya

taheima mieme niuki tuayame nierikaya hepai
'anekame.

7

'Etsitewani yuhetsiemieme kemitiutaniu

¹ Hiki mawari wewiwamete tiwa'aitiwame
mipai katinita'iwawiya:

—¿Mipai ti'ane 'iki?

² Miki mipai kaniutayini:

—Neuxei 'iwamarixi meta ne'ukiyarima,
xekeneu'enana. Tatutsi 'Apirahami 'ixeiyakaku
Kakaiyari witsimi'ane matsiikiti kanayuyeitiani
Metsuputamia 'akuxi 'uyeikakaku Haranitsie
kaheyewekaku,

³ Kakaiyari mipai katinitahiawe: “Keneuku'eiri
'akwie, 'amarema meta 'apaapa kie, kenemie
kemi'ane kwie nemimetsixeitsitianitsie”.

⁴ »Hiki Kariteyutsixi wakwietsie heyeyaka Ha-
ranitsie kaniutayerini. Manata paapaya 'umiku
Kakaiyari nipata 'iki kwiepa hakewa xeme'uwa
hiki.

⁵ Kakaiyari pika'imi 'ena mitinakeni
niyi'ikaki mikatakeniki, matsi Kakaiyari
mipai katinitahiawe kename 'ipitianiekai
miki, piinieya mirayaniki, 'arike hetsiena
memiyekinekekaita wapiini mirayaniki, tsepa
yuniwe mikahexeyakai 'akuxi.

⁶ Kakaiyari mipai katinitahiawe: “Anuiwarima
xeime kwieyaritsie mepititeni yapaimexia, mana
wairiyarika mepiteta'aitiarioka meta 'aixia
mekatexeyarieti, nauka tsienituyari wiyari
mepuyurieni.

7 Nekaniwataxanetamiki 'iya nuiwari wairiyarika mepitewata'uximayatsitiani. 'Arikemikake mekanayekinikuni, ne'uximayatsika mekanexeyakakuni 'ena".

8 Xitekiya 'iniariyari 'ipitiatu kanitawewirieni tiratu. Hiki kepauka 'Apirahami 'Itsahaki memayexei, 'atahairieka tukaritsie pi'iniaritaxi 'ixiteti, 'Itsahaki meta Kakuwu pu'iniaritua, Kakuwu meta mipai tiwaruyuri tamamata heimana yuhutame tatewarima.

9 »Miki tatewarima me'ita'uxieka Kutse mekaniutuanu 'Ekipitutsie manuwitikieniki, peru Kakaiyari hamatiana puyeikakai.

10 Nitawikweitsitiani naime kemiti'uximatariiekai, pipitia 'aixia mitixeyarieniki mitimaiweniki Parahuni hixie 'ekipitutari mitiwa'aitiwametikai hixie. Mikiri 'itsikame kaneyeitiani Kutse 'Ekipitu kwieyari hepaitsita naime yukiita mieme hepaitsita 'ihiritiatu.

11 »Hiki pihakaxatikai naitserie 'Ekipitutsie Kanantsie, me'uximatarieximekaku waikawa. 'Ikwai mepika'ukaxexeyakai tatewarima.

12 'U'enaka Kakuwu kename 'ikwai hexuawekai tiriku 'Ekipitutsie, kaniwareni'ani tatewarima heiwa.

13 Hutarieka me'u'axiaku Kutse puyuhekiataxi yu'iwama wahixie. Meta Parahuni kaniwareti-mani Kutse maremama.

14 Kutse tiutani'aka kaniwaruta'inieni yupaapa Kakuwu yunaime yumarema haika tewiyari heimana tamamata heimana 'auxiwi meyupaimeme teiteri.

15 Miki Kakuwu kaneyani 'Ekipitutsie, mana kanemini, tatewarima manata mekanekwini.

16 Mana Tsikenitsie paiti mepewitikie, mepukateukiexia teukiyapa 'Apirahami minanai pirata tuminiyariki 'Emuri niwemama tsikenitari me'ituirieku.

17 »Hiki 'ayehurakaku miki tukari maye'atarieniki tita Kakaiyari yihiritiati 'Apirahami mitiutahiawixi kemitiyinikekai, miki teiteri mepitetimiiriyarimekai 'Ekipitutsie.

18 'Anari panukuke xewiti 'ekipitutari tiwa'aitiwametiti, miki pika'imaikai Kutse.

19 Miki kwiepa ti'aitame tateiterima pitiwa'itaiyakai. Wairiyarika piwarupitia tatutsima 'itsita memiwareku'eirieniki tiri memutinunuiwaxi, memikwiniki.

20 »Hiki 'ana Muitsexi kaniutinuiwa. Wit-sipi'aneikai nunutsi Kakaiyari hixie, miki haika metseri puwerekai yupaapa kie.

21 Kepauka muku'eiriwaxi, ti'aitame Parahuni niweya kanitaxeiya, munu'ayatini hepai pitiweriyaxi.

22 Pitiuti'ikitarie Muitsexi naime kemitemaiwawekai 'ekipitutari. Kemitixata yapitiyurienekai piyiwemetikai.

23 »Hiki huta tewiyari wiyari hexeyati puyuwairi miwa'iwatamieki yu'iwama 'ixaheritsixi.

24 Xeime 'uxeiyaka mierieneme, heimana kani-utanuani, 'aixia pitiuyuri hetsiena mieme, 'ekip-itanaka kaniumieni.

25 Mipai katiniku'eriwakaitini kename 'iwamama metemaikakekai Kakaiyari

kemitiwatawikweitsitianikekai 'iya wa-
parewiekaku, mikitsi mipai mepikatemaikai.

26 Hiki 'uxa'ariekata kaniwaruxeiya
meyukwitiweme yuhutame 'ixaheritsixi.
Niwanitiamikikaitini 'aixia memiteyuxeiiyaniki
mipai 'utaiti: “Neuxei, xeme xekaniyu'iwamaka.
¿Titayari 'axaxeteyuyurie?”

27 »Kemi'ane yu'iwa 'axamiyurienekai Muitsexi
petaimaxi mipai 'utaiti: “¿Kemi'anekuta
'eki metsi'utahiawixi 'itsikameki tahetsie
pemit'i'aitaniki?”

28 Kaukatsita ne penetsimiemiti pe'utaine, takai
'ekipitutanaka pemitiumi hepai”.

29 Hiki 'lenieka miki niuki Muitsexi
kaniyuta'una. Kuyeikame kanayani Mariyani
kwieyaritsie. Mana mekaniutinunuiwa
niwemama yuhutati.

30 »Hiki huta tewiyari wiyari 'aye'aku, maku-
mawetsie kanixeiya niuki tuayame taipa 'uweme
tupiriya matitatawekaitsie yemuri 'aurie Tsinahi
mirakutewatsie.

31 Miki Muitsexi 'ixeiya heinitsika hepai
'anekame kanihiyakitini. 'Ahurawa 'ayaku
miretimaniki kemitiyianekai, Ti'aitame putaniu
mipai 'utaiti:

32 “Ne 'atutsima nekaniwakakaiyaritini,
'Apirahami, 'Itsahaki meta Kakuwu”. Miki
Muitsexi 'uyiyakati pikayuwaiiyakai
miniereniki.

33 »Ti'aitame mipai katinitahiawe: “Akakai
kenanuyexinaxia 'a'ikatetsie, mana pemanuwe
kwiepa kanakupatsieka.

34 Yemeki nekaniwaxeiyani neteiterima kememite'uximatiarie 'Ekipitutsie. Wa'aiwari nekani'enieka, nekaniyuhekiata mana nemiwarayewitiniki. Hikitsiari nepimatsi'anuni'ani 'a'utima 'Ekipitutsie”.

35 »Miki Muitsexi memutixani'eri mipai me'utiyuati: “¿Kepai tati'aitiwame ta'itsikame pimatsi'ayeitia?”, mikitime Kakaiyari kaneyeni'ani tiwa'aitiwame wawikweitsitiwame, niuki tuayame muxei tupiriyatsie 'uweme 'iparewiekaku yutirikariyaki.

36 Mikiri kaniwarayewitini 'iniari tiuyurieka mamariwaweme tiuyurieka 'Ekipitu kwieyaritsie, Haramara Mixetatsie, makumawetsieta yatiyurieneti huta tewiyari wiyari.

37 »'Iki Muitsexi kanihikitini kemi'ane mipai mitiwarutahiawixi 'ixaheritsixi: “Ti'aitame mixekakaiyari tixexaxatiwame nanukuketiamiki xe'iwama watsata nehepai 'anekame, miki hirixia xepi'enieka”.

38 'Iki Muitsexi kanihikitini kemi'ane meyeikakai memiyuyexexeiriwakai wahetsia makumawetsie, niuki tuayame matia meyeikakai mitahiawixi yemuritsie Tsinahi mirakutewatsie, tatutsima wahamatia meyeikakai. Mikita niuki mayeyuri putanaki'eri tatsipitianike.

39 »Miki tatewarima mepika'i'eniekukai, matsi mepenuyehiakukai. Yu'iyaritsie ta'aurie mepaxirikukai 'Ekipitutsie,

40 mipai 'Aruni metekihaweti: “Peuyewetse kakaiyarixi temutatiwewirieni memitatsi'uwitiximeniki, Muitsexi 'Ekipitu

mitatsi'ayewiti, 'atsitepikatemate kemeyi
kemireyunixi”.

⁴¹ »'Ana kakaiyari tsikeru 'ikiyari meputawewi,
mawari mepiwewiri. Mekaniyutemamaw-
iekaitini tita yumamaki memite'utawewi
me'ayexeiyati.

⁴² Hiki Kakaiyari piwaruku'eiri,
piwayetua muyuawitsie memiteheukatei
memitewarayexeianiki. Mipai kemiraka'utiarie
Kakaiyari niukametemama waxapayaritsie mipai
'anuyiti:

»“Teiteri 'ixaheritsixi, mawari
xepikanetsi'uwewiri meta 'imikieri,
makumawetsie xe'uhuti huta tewiyari wi-
yari.

⁴³ Matsi xepeyexeyakai Muruki xirikieya,
Xemipani yukakaiyari xuraweyari,
wahepai tiyuxexeyame xepiyuwewiriekai
nenewieri xemiwapitianiki.

'Ayumieme nekanixe'anuni'amiki xemanuha-
panieniki” Wawiruniya yeta paiti.

⁴⁴ »Hiki 'ixuriki tuki yari hakewa hekiatsika
mayekatei mana kaniuwekaitini tatutsima
wahetsia makumawetsie, kemitiu'aitaxi miki
mitahiawixi Mui sexi kename hepaina 'anekame
ta'aitakekai 'ixuriki tuki yari, 'iniari muxei hepai
'anekame.

⁴⁵ Miki tuki meputanaki'eri tatewarima.
Kutsu hexi matia mekani'atiani kepauka
memiwareutaweyaxia 'ena memititekai hipame
nuiwarite. 'Arikeketa 'aniuyeikakaitini Rawiri.

⁴⁶ Kakaiyari 'aixia katiniuka'iyarikaitini
hetsiena mieme. Miki Kakaiyari putawawiri

tuki mitawewieniki hake Kakuwu Kakaiyarieya mayekaniki.

⁴⁷ Peru Tsarumuni pita kii pitawewiri.

⁴⁸ »Tsepaneti miki 'Amutewi kiita mikahayeka mamaki miwewiyata. Kemaine tixaxatame:

⁴⁹ »“Muyuawi kanine'uwenitini,
kwie meta hetsiena neminewetika
kanihikitini.

¿Keri 'anekame kii xepinetsitawewirieni?

—Ti'aitame kanaineni—.

¿Hakewa nemeka'uxipieniki?

⁵⁰ ¿Kamitsi, ne nemamaki 'iki naime nemitiutiwewi katihiiki?”

⁵¹ »Xeme xekiipi pitsetse'i, yu'iyaritsie yunakata xepika'iniaritariewawe Kakaiyari 'iniarieyaki, xeme yuheyemeki xepeye'unie 'Iyari Mitiyupata yututsima wahepai.

⁵² ¿Kemi'ane Kakaiyari niukameya xetutsima memika'ayewei 'atiuyeika? Mepiwarukwi miki meripai memitahekiataxi 'iya Heitserie Mexeiya 'umamienikekai. Mikiri xepiyetua, teyukukuyamete xepaki hiki.

⁵³ 'Iniari niukiyari xeputanaki'eri niuki tuayamete metexe'aitiakaku, yaxepikatekahu».

'Etsitewani kemitiumierie

⁵⁴ Hiki me'i'enieka 'iki, yu'iyaritsie mepuyeha'a. Mepiyutakewekai me'ihekali.

⁵⁵ Peru 'Etsitewani hineti 'Iyari Mitiyupataki, yuheima heutiniereti, Kakaiyari kaniuxeiya witsi'anekame, meta Ketsutsi tiuxei Kakaiyari tserieta 'utiweme.

⁵⁶ Mipai kaniutayini:

—Kami, muyuawi nepixeiya 'anakayepiekame, Yuri Tewi Kakaiyari tserieta 'utiweme netixeiya.

⁵⁷ Karima me'utihwati yunakateta mekaneuyukanaxiani. Mekaniwiya 'axeikia.

⁵⁸ Kiekaritsie mekanenuyehiani, mekaneititu-axixiani teteki. Memixanetakai yu'ixuriki temaiki Tsauru hetia mekaniuku'eirieni.

⁵⁹ Mexi'akuxi me'itituaxakai, 'Etsitewani kaniyunenewiekaitini. Mipai 'utaiti:

—Ti'aitame Ketsutsi 'aku, ne'iyari keneutanaki'eri.

⁶⁰ Utitunumakeka karima kaniutahiwa:

—Ti'aitame 'aku, 'iki 'axakememiteyuriei wa-hetsie pepikarahipani.

Mipai 'utayika kaniumini.

8

¹ Hiki Tsauru 'iyarieya 'aixia pi'anekai 'Etsitewani mumieriei.

Tsauru memiyutixexeiriwa kemitiwataweweyakai

Hiki 'ana Kerutsaremetsie memiyutixexeiriwakai waikawameki mekaneutaweyariexiani memu'uximatiariekaiki, yunaiti mekaneutayeixiani naitsarie kiekari mukumanetsie Kureyatsie meta Tsamariyatsie, ni'ariekate xeikia mekaniuyuhayewa.

² Hipati teiteri Kakaiyari memayexeiyakai 'Etsitewani mekanekuteuku, waikawameki meyuhiwerieti hetsiena mieme.

³ Tsauru kwini mieme piwa'uximatiakai memiyutixexeiriwakai: wakiita peutahakekai, warayehapanati 'ukitsi 'ukari kaniwaranutaxiriwakaitini.

*Niuki 'aixia manuyine Tsamariyatsie
kemitikuxaxatsiwakai*

⁴ Hiki memeutaxirixia naitserie mekaneu-tayeixiani niuki 'aixia manuyine mekuxatati.

⁵ Hiki Peripe nuaka Tsamariya kiekaritsie katiniwahekiatikaitini Kiritsitu heitserie mupitiarie hepaitisa.

⁶ Mekani'enieni yunaiti kemutainekai Peripe 'axeikia me'i'enieti me'ixeyati 'iniari kemitiyurienekai.

⁷ Kakaiyarixi 'axamemi'anene karima me'utihiwati mepiwarutixinaxi yumireme memiwawiyakai. Yuwaikawati wa'ikate mitutunikai meta memihurietikatei 'aixia me'aneneti mekanakine.

⁸ Miki kiekaritsie yemek mekaniyutemamaw-iekaitini.

Tsimuni tiyukewaiyame

⁹ Hiki xewiti tewi Tsimuni mititewakai mana puyeikakai miki kiekaritsie meripaiti wakewaiyati tsamariyatari tiwa'iriwiyati mipai putainekai kename tirikaiyekai.

¹⁰ Yunaiti 'ukirawetsixi tiri meta mepi'eniekai mipai me'utiyuati: «'Iki Kakaiyari tirikariyaya kanihikitini, Mimariwe mititewa».

¹¹ Mepi'eniekai miixa mitiwa'iriwiyakaiki wake-waiyati.

¹² Kepauka yuri memite'ita'eriri Peripe tiwakuxaxatiwame niuki 'aixia manuyine, kemiti'ane Kakaiyari ti'aitametikaku tikuxatati, kemi'ane Ketsutsi Kiritsitu mihiki kuxatati, 'ukitsi 'ukari mepuka'iyarie.

¹³ Mikita Tsimuni yuri katiniuta'erieni, 'uka'iyarieka Peripe piparewiekai. 'Ixeiyati 'iniari tirikaiyemeki waikawameki kemitiyurienekai pi'iyarixiekai.

¹⁴ Hiki me'u'enanaka ni'ariekate Kerutsareme meme'uwakai kename tsamariyatari me'itanaki'eri Kakaiyari niukieya, wahetsia mepiwareni'a Pekuru Wani hamatia.

¹⁵ Miki meheta'axiaka mekaniyutanenewieni wahetsiemieme 'Iyari Mitiyupata mehexeiyati memakineki.

¹⁶ 'Akuxi 'Iyari miki nixewiti pikahexeiyakai. Mepuka'iyariekai xeikia Kiritsitu hetsia memimiemetetiniki.

¹⁷ Hiki Pekuru meta Wani wahetsie meka-neutimeni, miki 'Iyari Mitiyupata mehexeiyati mekanakine.

¹⁸ Hiki Tsimuni kaniwaruxeiya 'Iyari kememite'upitiae ni'ariekate waheima me'utimeku. Tumini kaniwaranu'iirienikekaitini,

¹⁹ mipai 'utaiti:

—Xekeneneupitia neta 'iki tirikariya, kemi'ane heima nemutimeni 'Iyari Mitiyupata hexeiyati mayaniki.

²⁰ Pekuru mipai katinitahiawe:

—'Atumini 'ahamatia ke'ukumawere, tuminiki Kakaiyari 'imikierieya peminanaimikikaiki.

²¹ 'Tki hepaitsita 'eki heitserie pepikahexeiya, 'ahetsie pikatinakeni. 'Aiyari mikaheitserieki Kakaiyari hixie.

²² Ketineuhayewa kepemitiyuriene, pe'iku'eirieme 'iki tita 'axapemitiyuriene, Ti'aitame keneutawawiri tsiparatsi xika pereuyehiwiyarimiki mipai pemiti'akihaweki.

²³ Ne nepimatsixeiya tsiirika hepai pehatsi-wime, tita mikatiheitserieki penikame.

²⁴ Hiki Tsimuni mipai katinita'eiya:

—Xemetsi Ti'aitame xekeneutawawiri nehet-siemieme, 'atsinemika'itiarieniki kexemutiyuane.

²⁵ Hiki mikiri mewarutahekiatiaka me'itaxataka Ti'aitame niukieya, ta'aurie mepaxiri, Kerutsareme mekanekine. Niuki 'aixia manuyine mekanikuxatakaitini naitserie tsamariyatari wakiekaritetsie.

Peripe 'etihupiyatanaka hamatia kememitekuxatakai

²⁶ Hiki Ti'aitame niukieya tuayame Peripe mipai katinitahiawe: «Kenanukukexi, tatserieta kenemie huyeta Kerutsareme mayehane 'utima kiekari Kahatsa mirakutewatsie miye'axe, hakewa makumawe».

²⁷ Peripe 'anukukeka kaneyani. Tewi 'etihupiyatanaka ti'uximayatame ti'aitame hetsiemieme mikaneike kananukunake, waikawameki mihiritiariekai 'uka ti'aitame Kanaratse mititewakai hetsiemieme. Katinihiritiariekaitini naima piiniteya hepaitita. Miki tewi Kerutsareme kanekuyeixiakaitini heyukunenewieka,

²⁸ yukaxetatsie hatikaiti, titeriwa ti xaxatame Kitsariyaxi xapaya.

²⁹ Kakaiyari 'Iyarieya Peripe mipai katinitahiawe: «Mana kenemie, 'ahurawa keneuye'a miki kaxeta 'aurie».

³⁰ Peripe 'unautsarimeti, kani'enieni tixaxatame Kitsariyaxi xapaya teriwakame. Mipai katinita'iwawiya:

—¿Pereiti'enietieika 'aku tita pemititeriwa?

31 Miki mipai katinita'eiya:

—ǃKetsinereitimani, xika xewiti
kanetsi'utahekiatiani?

Hiki Peripe kaniuta'inieni manutimakeki, 'auriena mayeriniki.

32 Mipai panuyine 'utiarika pemiteriwakai:

«Muxa hepai kanehanieni mimierieniki,
muxa kaxiriwati mika'utatsuaka hepai
mipaita yaxeikia pika'utatsua.

33 Tixai mikaratiaki, heitserie pika'upitiarie
kemireuyewekai kepauka muta'iniatsie.

ǃKepaiki piwamaika nuiwarimama?
Tukarieya munawaiyarieki kwiepa».

34 Hiki tewi mihiritiarie Peripe mipai katiniutahiawe:

—Yakenetineutaxatia 'eki ximixi, ǃkepaiki
piraxata tixaxatame, piyuxata, nutsu xeime pita
pixata?

35 Hiki Peripe, kanitsutiani miki 'utiarikatsie
tihekiatati tikuxaxatiwati niuki 'aixia manuyine
Ketsutsi hepaitsita.

36 Huyeta me'uhuti haa maxuawe meka-
niu'axiani, mipai tewi mihiritiarie kaniutayini:

—Neuxei kami haa 'ena. ǃTitari reuyewetse
nemika'iyarieniki?

37 Mipai Peripe katinita'eiya:

—Xika 'a'iyaritsie yemeki yuri peti'erieka, 'aixia
kaniyimiki.

Mikita mipai katinita'eiya:

—Ne yuri nekatini'erieka Kaka'yari Nu'aya Ket-
sutsi Kiritsitu mihiki.

38 Katiniuta'aita kaxeta mana mitakerieniki. Yuhutati mekaneukakine haapa Peripe miki tewi mihiritiarie kaniuka'iya.

39 Haapa me'anatikineku Ti'aitame 'Iyarieya Peripe kanitihana. Tewi mihiritiarie tawariri pika'ixei, yutemawieti yuhuyeta kaniumiekaitini.

40 Matsi Peripe 'Atsutu paiti kaniuyeikakaitini, niuki 'aixia manuyine kanikuxatakaitini naitsarie kuyeikati kiekaritetsie, 'arike peta'a Tsetsareya paiti.

9

Tsauru kemitiuhayewaxi

(Ni'a 9:1-19 - Ni'a 23:3-16, 26:9-18)

1 Hiki Tsauru 'uxiwa'ati 'akuxi mipai 'utaiti miwakwinikekai Ti'aitame teyi'ikitiwametemama, kaninuani mawari wewiwamete tiwa'aitiwame hetsia,

2 kanitawawirieni xapate mitiwati'utiirieniki tukita miemete Ramatsikutsie, mipai 'utaineme: «Xikatsi 'iki waretaxeiya hipame miki huyeta miemete 'ukitsi 'ukari, kaniwarahapamiki mehiatikaima Kerutsareme paiti».

3 Hiki huyeta 'uyemiekaku, Ramatsiku 'aye'aximekaku, 'auriena kaniukumerika taheima miemek.

4 Kwiepa 'ukaweka kani'enieni xeime mipai haineme:

—Tsauru 'aku, Tsauru, ζtitayari penetikuweiyane 'eki?

5 Miki rehiawe:

—ζ'Eki Ti'aitame kemi'ane pepetaine?

Miki mipai kaniutayini:

—Netsi Ketsutsi nekanihikitini
 pem̄netsikuweiyane. P̄imatsi'ukukuine
 pem̄ika'awai'iyaki, pem̄iti'aketsinaki
 pe'anatseiwati titsewemeki.

⁶ Tsauru 'uyiyiakati mati mipai kaniutayini:

—Ti'aitame, tita matinake yanem̄tiyurieni.

Ti'aitame rehiawe:

—Hiki kenanukukexi, kiekaritsie keneutahaki.
 Manari yapep̄iretahiawarieni kem̄ireuyewetse
 yapem̄tiyurieneniki.

⁷ Teiteri hamatiana memuhukai meh̄ixiyati
 'ameniti'uni me'i'enieti kem̄i'ane mutaniu, peru
 meka'ixeyati.

⁸ Hiki Tsauru kwiepa kananukukeni, yuh̄ixita
 'anutaniereka tixai pikatiuxe, mamayatsie
 metiwiti mepeiha, Ramatsiku paiti mekani'atiani.

⁹ Haika tukari puyuri kaheuniereti katikwati
 kahareti.

¹⁰ Hiki xewiti mana kaniuyeikakaitini Ramat-
 sikutsie tiyi'ikit̄iwame 'Ananiyaxi titewati, tikariki
 hein̄itsita Ti'aitame mipai katinitahiawe:

—'Ananiyaxi.

Miki mipai kaniutayini:

—Ti'aitame, ne nekanihikitini.

¹¹ Ti'aitame mipai rehiawe:

—Kenanukukexi, kenemie kaye Mixeuraiye
 mititewa 'utia, Kura kiita keneta'iwau
 tarutsutanaka Tsauru mititewa. Mana
 peyunenewie.

¹² Mikita hein̄itsita kanixeiya tewi 'Ananiyaxi
 titewakame mana ye'arikame heimana
 'utimekame manutaniereki.

¹³ 'Ananiyaxi mipai katinita'eiya:

—Ti'aitame, nepiwaru'eni yumireme metekuxatame 'iki tewi hepaitsita, naime 'axakemiwayurienekai miki 'ateiterima Kerutsaremetisie.

¹⁴ Enata heitserie mekanipitiani mawari wewi-wamete tiwa'aitiwame miwaranutaxiriwaniki yu-naime memimatsi'ayexeiya.

¹⁵ Ti'aitame mipai katinitahiawe:

—Kenemietsi. Ne 'iki nepenayexei, mitihekiantaniki nehapaitsita nuiwarite wahixie, kwiepa te'aitamete meta 'ixaheritsixi wahixie.

¹⁶ Nekatinita'ikitiamiki kemireuyewetse mitikwineki nehetsiemieme.

¹⁷ Hiki 'Ananiyaxi kaneyani, kiita kaneutahani. Heimana 'utimeka mipai kaniutayini: «Ne'iwa Tsauru, Ti'aitame ne kaneneyeni'ani, miki Ketsutsi pemuxei huyeta pe'aye'aximeti, miki kaneneyeni'ani peheuniereti pemayaniki, 'Iyari Mitiyupataki pemihineniki».

¹⁸ Yapauka panayexiri hixitana kunieri hepai 'aneneti, heuniereti kanayani. 'Anukukeka kaniuka'iyarieni,

¹⁹ tiukwakari tirikaiyeti kanayani. Hiki Ramatsikutsie puyeikakai yapaimexia tukari teyi'ikitiwamete wahamatia.

Tsauru Ramatsikutsie meta Kerutsaremetisie kemitikuxata kai

²⁰ Kwitiwa huriyutsixi watukiteta katini-hekiatakaitini Ketsutsi hepaitsita: «'Iya Kakaiyari kaninu'ayatini» 'utaiti.

²¹ Mekanihihiyakaitini yunaiti memi'eniekai, mipai mekaniutiyanekaitini: «'Iki kanihikitini kemi'ane miwaraye'uniekai miki memehiawe

miki kemi'ane mihiki Kerutsareme kiekatari, 'uwata 'ayumieme kaninuani, miwaranuwitini mehiatikaima mawari wewiwamete memihiritiari wahetsia».

²² Tsauro yemeki kanitirikariyarieximekaitini. Kaniwa'iyarixitiakaitini huriyutsixi Ramatsikut-sie memitamakai, kaniwarutahekiatiani kename Ketsusi Metsiyaxi* hiki.

²³ Hiki miixa tukari 'utixiku huriyutsixi mekaniyu'enieni me'imienike.

²⁴ Tsauro katinetimani kememiteyurienikekai. Kiekari kitenitetsie tukariki meta tikariki mekani-hupiekaitini me'imienike.

²⁵ Teyi'ikitiwamete yiwikita kiriwatsie me'ikayeka tetsariya warie mekaneikatuni.

²⁶ Hiki Kerutsareme nuaka pitiwiyamikikai teyi'ikitiwamete wahetsie. Yunaiti mepi-makarikai yuri mekate'erieti kename tiyi'ikitiwametikai.

²⁷ Werunawe heiwitika kani'atiani ni'ariekate wahetsia. Kaniwarutahekiatiani ya'utaiti kename huyeta Ti'aitame 'uxei, meta 'itahiawixi, kename Ramatsikut-sie kamati tikuxataakai Ketsutsi hetsia miemetiti kemitixinakai.

²⁸ Hiki wahetsia kaniuyuhayewa Kerutsaremet-sie naitserie kuyeikati, hekiakameki tikuxatati Ti'aitame hetsiemieme.

²⁹ Pikamakai mitaniuniki Ti'aitame hetsia mimiemetikaiki. Niuki kanixiatiakaitini kiriyekutsixi waniukiki memutiniukakai wahamatia. Mimetsi mekanimiekukaitini.

* **9:22 9:22** *Metsiyaxi. Kiritsitu kiriyekuki panuyine.*

³⁰ 'Iwamama yametehetimaika mekaneiwitini Tsetsareyatsie paiti, Tarutsu paiti mekaneitani'ani.

³¹ Hiki memiyutixexeiriwakai naitsarie Kureyatsie, Karereyatsie, Tsamariyatsie mepika'uximatariiekai. Mepitirikariyariiekai, Ti'aitame me'ayemakati 'amekaniu'uwakaitini, 'Iyari Mitiyupata miiremeki kaniwatuikakaitini.

'Eneyaxi 'aixia reu'eriet i kemiratia meta Rurukaxi

³² Hiki Pekuru naitsarie pukuyeikakai, manata penua Kakaiyari teiterimama wahetsia Riratsie memitamakai.

³³ Mana kanikaxeiya xeime tewi 'Eneyaxi mititewakai 'atahaika wiyari miyurieikai yu'utatsie kakaiti mihuriekaiki.

³⁴ Mipai Pekuru katinitahiawe: «'Eneyaxi 'aku, Ketsutsi Kiritsitu 'aixia pimatsi'uyuri. Kenanukukexi, 'a'itsi keneutatuna». Yapauka kananukukeni.

³⁵ Yunaiti Riratsie Tsarunitsie memitamakai mekanixeyakaitini, mikita mete'uhayewaka ke'axamemiteyurieikai Ti'aitametsie mekateni-uwiya.

³⁶ Hiki tiyi'ikitiwame 'uka Kupetsie nekateitini Tawita titewati (taniukiki Rurukaxi titewati, Maxama titewati). Miki 'aixia ti'ananeme katiniyurienekaitini kwini mieme, katiniyukananimayakaitini.

³⁷ Hiki 'ana tiutakwineka kaniumini. Me'itahauxika kii taia mekaneitatani.

³⁸ Hiki Riratsie pehurakai Kupe, teyi'ikitiwamete me'u'enanaka kename Pekuru mana heyeikakai, hetsiana mekaniwareni'ani

'ukitsi yuhutame mipai mete'itawawirienike:
«Penikahirixia 'areutewini tahetsia peminuaniki».

³⁹ Pekuru 'anukukeka wahamatia petia, nuaku kii taita mekaneitiwitini. 'Auriena mekaniu'axiani yunaiti 'ukari wakinama memukwi, me'utitsuati me'ixeitsitiati 'ixurikite tetiata miemete herie miemete miwewiekai Maxama wahetsia 'uyeikati.

⁴⁰ Yunaima Pekuru kaniwaranuyeni'ani, 'utitunumakeka kaniyutanenewieni. Ta'aurie 'aweka kaxari manukatei mipai kaniutayini: «Tawita 'aku, kenanukukexi». Miki kananutaniere. Pekuru 'uxeiyaka 'aniutayerini.

⁴¹ 'Iya mamayatsie tiwiereka kanenukuhana. Yuhetsia kaniwarutahiawe Kakaiyari teiterimama 'ukari meta wakinama memukwi wahamatia, kaniyetuani 'ayeniereme.

⁴² Naitsarie Kupetsie kaniutamariwa, yuwaikawati yuri mekateniuta'erieni Ti'aitame hetsie.

⁴³ Miixa tukari Kupetsie pekatei Tsimuni hetsia nawi 'uayame hetsia.

10

Kuxineriyu Pekuru kemitiutani'airi

¹ Hiki tewi Tsetsareyatsie pukatei Kuxineriyu titewati xeitsienituyari kuyaxi tiwa'aitiati. Miki kuyaxi 'Itariyatsie mepikiekataritikai.

² Miki Kakaiyari 'ayemakati yaka-tinikamiekaitini, meta yunaiti kiena kiekatari. Waikawa katiniyurienekaitini teiteri wahetsiemieme wananimayati, Kakaiyari nenewieri pipitiakai yuheyemekai.

³ Hiki xeitukaritsie tau kia kakaiku heinitsi hepai 'aneme kaniuxeiya. Kakaiyari niukieya tuayame hepana 'amiekame kaniuxeiya, mipai tikihiaweme:

—Kuxineriyu 'aku.

⁴ Kuxineriyu 'ixeiyaŋi waikameki kanimakaitini mipai katinita'iwawiya:

—ŋKetita 'aku neti'aitiwame?

Niuki tuayame mipai katinita'eiya:

—Kakaiyari 'anenewieri kaniu'enieni 'ananimayatsika meta 'a'uximayatsikatsie kepemitiyuriene mawari pewewieti.

⁵ Hiki teŋteri Kupe paiti keniwaranuni'a Tsimuni Pekuru mititewa memiwitiyuki.

⁶ Miki Tsimuni nawi 'uayame hetsia kanekani, kiya haramara tetsita kaneweni. Miki kamatinitaxatiamiki kemireuyewetse yapemitiyurieneniki.

⁷ Hiki niuki tuayame tiutaxataka heyaku, Kuxineriyu yuhutame yuni'arima yu'aurie piwarutahiawixi meta kuya Kakaiyari mayexeiyakai, memiparewiekai yuheyemeki.

⁸ Naime tiwarutahekiatiaka kemitiuyikai, Kupe paiti kaniwareni'ani.

Pekuru tita mitiuxei

⁹ 'Uxa'arieka mexi'akuxi huyeta me'uhukaku kiekari 'aurie me'aye'axiaximekaku Pekuru kii heima manawerikaitsie kaneutiyani tuka yutane-newienike.

¹⁰ Kanekahakamikatiyani, mexi'akuxi 'ikwai wewiyakai, katiniuheinini.

¹¹ Muyuawi 'anakayepiekame kaniuxeiya meta tsawana hepai ti'anekame katiniuuxeiya

'arakamieme, tetsitana naukakia tiwiwietikaime kwiepa paiti kanakatuiyani.

¹² Mikitsie mekanati'ukaitini yunaiti kwiepa memite'u'uwa nauka 'ikayari memexeiyatika, kuterixi meta memite'awiwawe.

¹³ Xewiti mipai katinitahiawe:

—Pekuru kenanukukexi, keniwarukwika meta keniwarutikwa'i.

¹⁴ Pekuru mipai katinita'eiya:

—Ti'aitame pikatixaixuari. Hatsuaku nepikatitikwaiwe 'axamiti'anene mikati'itiyatika.

¹⁵ Hutarieka miki mipai katinitahiawe:

—Tita Kakaiyari miti'itie 'axati'anenekame pepikati'erieka.

¹⁶ Haikakia mipai katiniuyini, hikita kwitiwa tsawana panutihanie taheima.

¹⁷ Pekuru 'atsipikaretimaitiyeikakai titaki miti'ayumiemetikai heinitsi. Hiki mexi'akuxi teiteri Kuxineriyu miwareyeni'akai, kitenie me'u'axiaka Tsimuni kiya hepaitsita mekaniuta'iwauni.

¹⁸ Meku'iwawati mekaniutiniere xika Tsimuni Pekuru mititewa muwa 'ayekateitini.

¹⁹ Mexi'akuxi Pekuru yu'iyaritiakai kemitiunierakai hepaitsita, 'Iyari mipai katinitahiawe: «Neuxei Tsimuni, teiteri yuhaikati mepimatsiwautiwe.

²⁰ Mexuima, mana keneukaye'a, wahamatia kenemie peka'a'iyaritiati, netsi nepiwareyeni'a».

²¹ Pekuru 'anakayaka hake memeti'ukai teiteri mipai katiniwarutahiawe:

—Ne nekanihikitini, xeme xeminetsiwautiwe. ¿Tita xetehayexeiyati xetekiyia?

22 Miki mipai mekatenita'eiya:

—Kuxineriyu xeitsienituyari kuyaxi
mitiwa'aitiwame tatsiheyeni'aku tepeyeki,
miki heitseriemeki yapitiyuriene meta
Kakaiyari kanayemakaxeni, yunaiti huriyutsixi
mekaneyemakaxekaitini. Kakaiyari niukieya
tuayame mipai katinita'aitiani 'eki kiena
pemimieki, mimatsi'enieniki niuki 'eki
pemitaxatianiki.

23 Hiki Pekuru kiita kaniwareuta'inieni, muwa
memayeheniki.

Pekuru Kuxineriyu kemireku'iwataxi

'Uxa'arieka 'anukukeka wahamatia kaneyani.
Hipatita 'iwamarixi Kupetsie kiekatari
wahamatia mekanekine.

24 'Uxa'ariekake Tsetsareya paiti
mekaneta'axiani. Kuxineriyu kaniwak-
wewiekaitini yumarema meta yuhamikuma
miwanaki'eriekai wahamatia.

25 Pekuru 'aye'aximekaku kiena, Kux-
ineriyu kanayeyani 'enunakeke. Hetiana
'ukatunumakeka nenewieri kanipitiani.

26 Matsi Pekuru kanenukuketiani mipai
tikihaweti:

—Kenanukukexi. Netsi 'ahapai nekanitewitini.

27 Pekuru hamatiana tikuxatati kitana
kaneutahani, kaniwaretaxeiya yuwaikawa
meyuxeirikame.

28 Mipai katiniwarutahiawe:

—Xeme mipai xepitemate, kemi'ane huriyu
teuiyari mihiki pikatauniwa mitiwiyaniki xeime
nuiwaritsie, wa'aurie mamieniki. Perutsi
Kakaiyari mipai pinetiutahekiatia tewi mikayiwe

mipai mitayini kename tewi 'axa'ane kename ka'itiya.

²⁹ 'Ayumieme nekaneku'imawati nekaninuani kepauka nemeyewitkie. Hiki nekanix-eku'iwawiyanikeyu ʔtitayari xenete'utani'airi?

³⁰ Kuxineriyu mipai katinitahiawe:

—Ranuka'atu nepinehakeikai 'epauka. Tau kia kakaiku ne ninenenewiekaitini nekiita. Yapauka xewiti nehixie putake 'ixuriki merikaiyeme 'anakatiti

³¹ mipai kanetiniutahiawe: “Kuxineriyu 'aku, Kakaiyari 'anenewieri pu'eni meta yapiretima kepemiti'uximaya peti'akanenimayati.

³² 'Ayumieme, ketineutani'a Kupe paiti. Tsimuni Pekuru mititewa munuaniki. Miki Tsimuni nawi 'uayame kie kanekani haramara tetsita. Nuame pimatitaxatiani”.

³³ Hiki kwitiwa nekatiniutani'ani. 'Ekitsi 'aixia pekatiniuyurieni pemunuaki. Hikitsiari tanaiti 'uwa tepitaxeirie Kakaiyari hixie, temi'enieniki naima Ti'aitame kemimati'aitia yapemitatitaxatiani.

³⁴ Hiki Pekuru mipai kaniutayini:

—Yuriki hikirixia mipai nepiretima, Kakaiyari teiteri yiki pikatiwaxeiya,

³⁵ matsi yuxexuime nuiwarite watsata kemi'ane me'eyemakati meta kemi'ane heitseriemeki yameteyurieti memi'uwa miki piwaxeiya.

³⁶ Kakaiyari yuniuki 'aixia manuyine kaneyeni'ani 'ixaheritsixi wahetsiemieme, mipai hainekame kename Ketsutsi Kiritsitu yu'iyaritsie memika'uximatiariekaki wapitiani. Miki Ketsutsi yunaime tiwa'aitiwame mihiki.

37 Xemeri xepitemate naitsarie Kureyatsie kemitiuyi, Karereyatsie tiutsutiarieku kepauka Wani mitihekiatakai kememiteka'iyarienikekai.

38 Ketsutsi natsaretitanaka kanihikiti, kemi'ane Kakaiyari mikawiri 'Iyari Mitiyupata meta 'itirikariyati. Miki 'aniuyeikakaitini 'aixia tiyurieneti, yunaime Kauyumarie miwa'uximatiakai 'aixia metehue'eriekame kaniwarayeitiwakaitini, Kakaiyari hamatiana muyeikakaiki.

39 Tame tepihiki temunenierixi temitehekiata naime hepaitsita kemitiuyuri huriyutsixi wakwiepa Kerutsaremetsie. Miki mekanimieni kiyetsie me'ikawiwati.

40 Kakaiyari kanenukuketiani hairieka tukaritsie, kanipitiani matsiikiti mayaniki,

41 yunaiti teiteri meka'ixeyakaku, tehekiatamete xeikia Kakaiyari miwaranuyexei matari paiti mekanixeiya, tame hamatiana tekateniukwani meta tekateniu'ieni mikite watsata 'anukukeku.

42 Miki pitatiuta'aitia teiteri temitewakuxaxatiwaniki, temitehekiataniki kename 'iki hiki kemi'ane Kakaiyari mikaye memayeneniere meta mikite wa'itsikame mayaniki.

43 Hepaitsitanata yunaiti Kakaiyari niukametemama mekatenihekiatani mipai me'utiyuati, miki hetsiena yuri memite'erie katiniwareuyehiwirieni tita 'axamemite'uyuriki hetsiana memimiemetetini.

44 Hiki Pekuru mexi'akuxi niuki kuxatakaku, 'Iyari Mitiyupata wahetsie katiniuwaiya, yunaiti

niukieya memu'eni wahetsie.

⁴⁵ Yuri memite'eriekai Pekuru hamatia memu'axia memihuriyutsixitikai mekanihixiyakaitini memikahuriyutsixi mipai memite'umikieki, 'Iyari Mitiyupata wahetsie mutatuiyaki.

⁴⁶ Mepiwa'eniekai niukiteki metekuxatame, 'aixia me'utiyuaneme Kaka'yari hepaitsita.

⁴⁷ Hiki Pekuru mipai katiniwarutahiawe:
—¿Kepaitsi haa piwatikweririeni, 'iki memika'iyarieniki? 'Iyari Mitiyupata meputanaki'eriexia tahepai.

⁴⁸ Katiniuta'aita memika'iyarieniki Ketsutsi Kirititu hetsiememe. Hiki mekan-warutawawirieni wahetsia 'akuxi yapaimexa tukari memuyuhayewaniki.

11

*Pekuru kemitiwarutahekiatia
memiyutixexeiriwa Kerutsaremetisie*

¹ Hiki ni'ariekate meta 'iwamarixi Kureyatsie memu'uwakai mekatenuutamarieni kename miki memikahuriyutsixi Kaka'yari niukieya me'utanaki'eriekai.

² Kepauka Pekuru Kerutsaremetisie meutiyunxi, miki xitekiya 'iniariyarisie miemeki mekaniniukimakaitini

³ mipai me'utiyuati:
—¿Titayari 'eki teiteri xitekiya 'iniariyari memikahexeiya wahetsia petinua meta wahamatia perekwakai?

⁴ Pekuru katiniwarutixatiatiyani xexuime kemireyikai hepaitsita:

⁵ —Ne kiekari Kupe mīrakutewatsie nehekaiti. Nekaneyunenewiekaitini, heinitsi hepai 'anekame nekanexeiya, taheima 'akamieme tetsitana naukakia hawiwietikaime tsawana 'amiyewa hepai tiyuxexeiyaime, nemanukateitsie 'aurie kaniuteni.

⁶ Nekaniwaxeiyaikaitini mana memite'atitekai, nauka 'ikateyari memexeiya kwiepa miemete, yeutari, kuterixi meta memite'awiwawe nekaniwaruxeiya.

⁷ Hiki xeime nekaniu'enieni mipai netikihiaweme: “Pekuru kenanukukexi, keniwarukwika keniwarutikwa'i”.

⁸ Ne mipai nekaniutayini: “Ti'aitame pikatixai, tita 'axamiti'anene mikati'itiatika hatsuaku neteta pikareutahawe”.

⁹ Hutarieka mipai kanetiniuta'eiya kemi'ane taheima mutaniukakai: “Tita Kakaiyari miti'itie 'eki 'axati'anenekame pepikati'erieka”.

¹⁰ Haikakia mipai katiniuyini, hikita naiti taheima kananutihanieni.

¹¹ »Hiki 'ana yuhaikati teiteri nekie nemīwayekateitsie mekanieu'axiani, nehetsia memeyeni'arie Tsetsareyatsie meheyekineka.

¹² 'Iyari mipai pinetiutahawixi: “Wahamatia kenemie tixaitiki pekati'a'iyaritiati”. Meta ta'iwama 'ataxewiti nehamatia mekanekine, miki tewi kiita tekaneutahaxiani.

¹³ Miki katatiniutahekiatiani niuki tuayame kemitiuxei yukiita mipai tikihiaweme: “Xeime keneutani'a Kupe paiti Tsimuni Pekuru mititewa miwitikiemieki.

¹⁴ Miki niuki pimatsitaxatiani kimana 'eki meta 'akie kiekatari yunaiti xemitawikweitsitiarieniki”.

15 »Kepauka netiutsutiaku netikuxatati, 'Iyari Mitiyupata wahetsie pituwiwaxi tahepai tsutiapai tahetsie mituwiwaxi hepai.

16 Hiki ne nepaye'eri Ti'aitame niukieya ke-mainekai: “Wani haki pituuka'iyakai, xeme pita 'Iyari Mitiyupataki xepika'iyarieni”.

17 'Ayumieme, xika Kakaiyari wayetuirieni miki 'imikieri yaxeikia tame kemitatiupitia Ti'aitame Ketsutsi Kiritsitu hetsie yuri tete'uta'erieku, ¿Ne ketsi netiyiwekai Kakaiyari nema'imaiyaniki?

18 Hiki 'iki me'u'enieka, kayuwati mekaniu-tamare, 'aixia mekaniutiyuanekaitini Kakaiyari hepaitsita mipai me'utiyuati:

—Mikita Kakaiyari katiniwarupitiani memikahuriyutsixi memitehayewaniki kememiteyuriekai matsi tukari memexeianiki.

'Anutiyukiyatsie memuyutixexeiriwa

19 Hiki miki memeutaweyariexiakai 'umierieku 'Etsitewani, Penitsiyatsie, Tsipiretsie meta 'Anutiyukiyatsie mekaneta'axiani, hipame niuki mepikawakuxaxatiwakai, huriyutsixi xeikia.

20 Hipati miki Tsipire meta Tsirene mekaniekataritikaitini, miki 'Anutiyukiya me'u'axiaka niuki 'aixia manuyine mekaniwakux-axatiwakaitini kiriyekutsixi Ti'aitame Ketsutsi hepaitsita.

21 Miki Ti'aitame tirikariyaya kaniwa-parewiekaitini, yuwaikawati yuri mekatenu-uta'erieni, Ti'aitame hetsie mekatenuwiya.

22 Hiki wahepaitsita mepu'enana miki Kerutsaremetsie memiyutixexeiriwakai, Werunawe 'Anutiyukiya paiti mekaneni'ani.

23 Nuaka, niereti Kakaiyari 'aixia kemitiuka'iyarikai, kaniyutemawiekaitini. Yunaime kaniwatuikakaitini Ti'aitame hetsie memitewiyaniki, wa'iyari ya'aneaku.

24 Miki tewi 'aixia pitiyurienekai, 'Iyari Mitiyupataki pihinekai, meta yuri piti'eriekai. Yumiireti teiteri Ti'aitame hetsie mekatenuwiya.

25 Manata Werunawe Tarutsu paiti kaneyani Tsauru kuwauneti, kepauka mitaxei 'Anutiyukiya paiti kaneiwitini.

26 Mana xeiwiwari mepuyuri memiyutixexeiriwakai wahamatia meyukux-exeiriwati. Yumiireme mekatenuwa'ikitiakaitini, 'Anutiyukiyatsie teyi'ikitiwamete "Kiritisitiyanutsixi" mepite'utateriwarie matiari.

27 Hiki 'ana Kakaiyari niukametemama kerut-saremetari 'Anutiyukiya paiti mekanakanexiani.

28 Miki xewiti 'anukukeka 'Akawu mititewakai katiniutahekiata, 'Iyari mipai titahekiatiaku kename hakaxa 'ayanikekai waikawa naitsarie teiteri mematitekaitsie, mipai pituiyi kepauka Kirauriyu miti'aitametikai miki kwieyaritsie.

29 Yuxexuiti teyi'ikitiwamete ke-memiteheixeyakai, mekaniyuwairiyakaitini tixaiti memite'anuni'aniki memiwaparewieniki yu'iwama Kureyatsie memitamakai.

30 Mipaitsi mepite'uyuri, 'imikieri mawariyari mepukuxeiri, Werunawe meta Tsauru mekani-waru'itiani 'ukirawetsixi memiwareyetuiriieniki.

12

*Kakuwu 'umierieku meta Pekuru
kemiranutahiya*

¹ Hiki 'ana Herurexi miti'aitametikai miki kwiepa, kanitsutiani memiyutixexeiriwakai 'aixia katiwaxeiyati.

² Kakuwu Wani 'iwaya, kaniuta'aita 'ixiparaki mimierieniki.

³ Retimaika kememiteyutemamawiekai huriyutsixi, mipaita 'arike Pekuru kaniuwiya. 'Iki pituiyi paa mikakuxaxani 'ixiarariyari mewewiekaku.

⁴ Hiki Pekuru 'uwiyaka kanenutahiani, kuyaxi kaniwaruhiritiani tamamata heimana 'ataxewime yunanaukakati memi'iwiyaniki. Patsikwa 'ixiarariyari 'aye'ayu teiteri wahixie mekani'atarienikekaitini Pekuru mimierieniki.

⁵ Miki ni'iwiyariekaitini katsariyanata. Memiyutixexeiriwakai mekatehayewati nenewieri mepipitiakai Kaka'yari hetsiena mieme.

⁶ Hiki kepauka Herurexi Pekuru miwayehanakekaitsie teiteri wahixie mimierieniki, miki tikaritsie Pekuru kanikutsukaitini yuhutati kuyaxi naitsata me'uti'ukaku, meta huta tepiyariki 'akuwieti. Hipatita tehiwemete katsariyana kitenie hixie mekanihikaitini.

⁷ Yapauka Ti'aitame niukieya tuayame mana kaniutakeni. Kiita paiti pukumerikaxi. 'Akitana 'iwaka Pekuru kananutahitiani mipai rehiaweti: «Xeiya kenanukukexi». Tepia puxinixia Pekuru mamateyatsie.

⁸ Mipaita niuki tuayame katinitahiawe: «Kene'atikemaritia meta 'akakaitsie keneukexia». Mipai pituiyuri. Mipaita katinitahiawe: «'A'ikariki kenanayuku'eimaka kenenanuweiya».

⁹ Pekuru 'utimana kaneyani, 'atsikatimaiti xika yuritikaitini niuki tuayame kemitiyurienekai. Heinitsika xeikia 'erieti.

¹⁰ Xeimetsie meri mekaniuyekine, hutariekata tehiwemete wa'aurie, tepia 'itupariyaritsie meuwietsie mekaniye'axiani kiekari muyenenatsie. 'Itupari yikimana kaneyepiere wahetsiemieme. Mana xeime kayetsie me'anuyenexiaka. Yapauka niuki tuayame kaneyani yuxaitame 'iku'eirieka.

¹¹ Hiki Pekuru yutamaixiaka mipai kaniutayini: «Hikirixia yuriki nepiretima Ti'aitame yuniuki tuayame meyen'a minetsitawikweitsitaniki, Herurexi mikanetsimieniki meta huriyutsixi yunaiti kememiteta'ikwewakai».

¹² Hiki kepauka mipai miretima, Mariya kie kaninuani Wani Marikuxi mititewa maamaya. Muwa yumireti mekaniyuxeiriekaitini meyunenewieti.

¹³ Takwa 'utiweti 'itupari kaneyuitiani. 'imari Xute mititewakai kaneyani hei'enimieka.

¹⁴ Pekuru miniukieyatikaiki heitimaika, waikawa kaniyukatemawieni kareuyepieka kaniutanautsa yu'utima pita. Mipai katiniwarutaxatiani:

—Pekuru kitenie petiwe.

¹⁵ Miki mipai mekatenitahiawe:

—Yaki pekaniutaineni.

Matsi miki pehiki, miki katiniwakihawekaitini. Mikita mipai mekaniutiyuanekaitini:

—Niuki tuayameya kaneyianeni.

¹⁶ Matsi Pekuru pikatihayewakai 'itupari heuyuitiwati. Kepaukake memiteheuyepi mekanixeiya, mekaniuhixiyani.

17 Pekuru yumamaki kaniwaru'iniairitiani kayuwati memitamareki, katiniwarutahekiatiani Ti'aitame katsariyanata kemitiwayewiti. Mipai katiniwarutahiawe:

—Kakuwu meta ta'iwamarixi xeketeniwareta-hekiatia kemitiuyi hepaitsita.

'Anuyeyaka xaitsie kaneyani.

18 Hiki 'ukatareku kuyaxi yemeki mekaniyux-amurietiwekaitini keru tiuyunixi Pekuru me'utiyuati.

19 Herurexi heikuwauka pikaheitaxei. 'Ayumieme kaniwaruta'iwawiya tehiwemete, katini'aitakaitini memikwi'iwaki. Hiki Herurexi Kureya heyeyaka Tsetsareyatsie yapaimexia mana kaniukateitini.

Herurexi kemitiumi

20 Hiki Herurexi Tiru kiekatari meta Tsiruni kiekatari wahetsiemieme piha'akai, miki matsi mete'utaxataka hetsiana mekaniu'axiani, Purat-situ me'itihamikutaka kemi'ane kwiepa ti'aitame kiita mihiritiariakai, 'aixia memiteyuxeiyani mekanitawawirieni, wakwieyari mira'aitatsie mirawiyakaiki yu'ikwaite memitehexeiyani.

21 Tukari ma'iniairitakatsie Herurexi ti'aitame 'aixia tiyukemaritiaka, yu'uweniesie kanayerini, teiteri wahixie katiniutaxata.

22 Teiteri mipai mekatenuhiwakaitini: «Tewi pika'utaine, kakaiyari putaine».

23 'Ana yapauka Ti'aitame niukieya tuayame katinikwinitiani, Kakaiyari hepaitsita 'aixia mika'utainekaiki, hiki Herurexi 'utakwitsieka kaniumi.

24 Peru Ti'aitame niukieya naitsarie pi'enieriekai mepitamiririmekai.

25 Kepauka Werunawe meta Tsauru yu'uximayatsika memaye'atia, Kerutsareme mekanakunuaxiani, Wani me'awititi Marikuxi mititewakai.

13

Werunawe meta Tsauru kememite'utateutiari

¹ Hiki 'Anutiyukiyatsie memiyutixexeiriwakai hipati Kakaiyari niukametemama mekanihikitikaitini meta mekateni'ikitametetikaitini Werunawe, Tsimuni Nikeri mititewakai, Rutsiyu tsirenetanaka, Manaheni ti'aitame Herurexi hamatia memutiwawerixi meta Tsauru.

² Mexi'akuxi miki mana me'u'uwakai meyuhakietu meta Ti'aitame 'uximayatsikayatsie yameteyurietu, 'Iyari Mitiyupata mipai kaniutayini: «Nehetsiemieme xekeniwarupata Werunawe meta Tsauru, mipai memite'uximayakaki kenemitiwatahiawe».

³ Hiki me'uyuhakieka mekaniyutanenewieni waheima me'utimetu, mekaniiwarutateutiani.

Ni'ariekate Tsipiretsie kememitekuxatakai

⁴ Hiki Werunawe meta Tsauru 'Iyari Mitiyupata kaniwarewitini, Tsereutsiyatsie mekaniiye'axiani, manata Tsipire paiti kanuwa 'amipatsie mekanekine.

⁵ Tsaramina me'u'axiaka Kakaiyari niukieya mekanikuxatakaitini huriyutsixi watukiteta. Meta Wani mepa'iniekai miwaparewiekaki.

⁶ Hapa kwie miyematsie Papuxi paiti mekaniiyuekine. Mana xeime huriyu mitiyukewaiya mekaniiutaxeiya, ti'itawati mitixaxatametikai, Waxiketsutsi mutitewakai,

7 miki Tserikiyu Pauru mititewakai hetsia kaniukateitini. Kuwexinaruri mirakumate, Werunawe meta Tsauro katiniwarutani'airieni, Kakaiyari niukieya kani'enimikikaitini.

8 Peru miki tiyukewaiyame 'Erimatsi (kiriye kutsixi waniukiki panuyine) wahepaitsita kani'uxiwa'akaitini kanikununuitiwakaitini kemi'ane kwiepa mihiritiariakai yuri mikatita'erieniki.

9 Hiki Tsauro, Papuru mititewa meta, 'Iyari Mitiyupataki hineti, 'ixeiya ti mipai katinitahiawe:

10 «Kari 'eki pepihine naime 'irimariki meta 'axamiti'aneki. Kauyumarie nu'aya pekanihikitini, naime mitiheitserie pekanaye'unieka, ¿pekatihayewa 'eki pe'itunati Ti'aitame huyeya mixexeurawi?

11 Hiki Ti'aitame yumamaki 'axapimetsiyurieni. Pekaheuniereti pekanayeimiki tau hekiariyaya pekaxeiya ti yapaimexia».

Yapauka puku'etirixi meta pukuyirixi hetsiena. Kumeneti xeime kanikuwaunekaitini menuhanaki.

12 Mipai tiunieraka kuwexinaruri yuri katiniuta'erieni, Ti'aitame 'ikitsikaya hepaitsita kanihi xi yakaitini.

Papuru meta Werunawe 'Anuti yukiya Pitsiriya kwieyaritsie kememitekuxata kai

13 Hiki Papuru meta hamatiana memu'uwakai Papuxitsie mekanekine, Perike Pamipiriya kwieyaritsie mekaniye'axiani. Wani mana kananayeyani wahamatia 'uyeikati, yu'itima pita Kerutsareme kaneyani.

¹⁴ Mikitsi Perike mekaniyekine, 'Anutiyukiyatsie Pitsiriya kwieyaritsie mekanu'axiani. 'Ux-
ipiya tukaritsie huriyutsixi watukita meheuta-
haxiaka muwa mekanayaxe.

¹⁵ 'Utiteriwarieku 'iniari xapayari meta
Kakaiyari niukametemama waxapayari, tukita
te'aitamete niuki mekaneni'ani wahetsia mipai
me'utiyuati: «Ta'iwama xika niuki xehexeiyani
teiteri xemiwaparewieniki, xeketeneutaxata».

¹⁶ Papuru 'anukukeka yumamaki
waru'iniaritiaka mipai kaniutayini: «Neuxei
xekeneu'enana 'ixaheritsixi, xeme meta
xemikahuriyutsixi Kakaiyari xemayemakaxe:

¹⁷ 'Iki 'Ixaheritsixi teiteriyari wakakaiyari
kaniwaranuyeteixi tatutsima. Teiteri
wahetsiemieme 'aixia pituyuri kepauka
ku'uwamete 'Ekipitu kwieyaritsie. Yitirikariyaki
kaniwarayewitini miki kwieyaritsie.

¹⁸ Huta tewiyari wiyari yakititi katiniwamik-
wakaitini makumawetsie me'u'uwakaku.

¹⁹ Manata 'atahutame nuiwariyari
waruka'unaka Kanani kwieyaritsie kaniwaye-
tuirieni wakwie mihikitiniki.

²⁰ 'Iki naiti nauka tsienituyari heimana huta
tewiyari heimana tamamata wiyari katineutere.

»Manaketa 'itsikate kaniwarupitiani Tsamuheri
tixaxatame hikitikaku.

²¹ Hiki 'ana kwiepa ti'aitame mekan-
itawawirieni. Kakaiyari kaniwayetuirieni Tsauri
Tsixi nu'aya Wenikamini nuiwarieyatsie mieme.
Huta tewiyari wiyari 'anukayaku

²² Kakaiyari kanipata. Rawiri pita kananukak-
eni, kwiepa ti'aitame mayaniki wahetsiemieme.

Mipai katiniutahekiata hepaitsitana: “Rawiri Kit-sahi nu'aya nekaniutaxeiya, tewi kenemire 'iyari hepai yatikamieme. Naime keminetinake yakatiniyuriemiki”.

23 »'Iki nuiwarieyatsie, Kakaiyari kemainekai 'ixaheritsixi wawikweitsitiwame Ketsutsi kaneyeni'ani.

24 Meripaiti miki 'akuxi kanuawekaku, Wani katiniwahekiatiakaitini yunaime 'ixaheritsixi teiteriyari metehayewati 'axakemiteyurie memika'iyarieniki.

25 Kepauka Wani yu'uximayatsika niximeti, mipai kaniutainekaitini: “¿Kexeteku'eriwa kemi'ane nepihiki? Netsi nepikahiki. Kami xewiti ne'utima 'upamie. Ne 'aixia nepikatiuka'iyari nehetsie mitinakeniki meta kakaiteya nemenuyehunierixianiki”.

26 »Neuxei 'iwamarixi, 'Apirahami xemixi'yarimama, meta xeme xemikahuriyutsixi Kakaiyari xehayemakati xemu'uwa, xehetsiemieme peyeni'arie 'iki niuki kexemitetawikweitsitarieni manuyine.

27 Kerutsareme memitama meta wakuwexi-narurima Ketsutsi mepikahetima, 'ayumieme mepikaheye'atia Kakaiyari niukametemama waniuki 'uxipiya tukaritsie mutiteri'war'iwakai, matsi mepeye'atia miki niuki me'enutahiati.

28 Tsepaneti tixaiti memikate'ukaxei hetsiena, Piratu mekaniutawawirieni mimierieniki.

29 Mete'aye'atiaka naime hepaitsitana kemire'ukai, kuruxitsie me'ekaxinaka teukiyapa mekaneikateuku.

30 Peru Kakaiyari mikite watsata ka-nenukuketiani.

31 Miixa tukari miki hamatiana Karereyatsie memiyeki Kerutsareme paiti mepiye'axia, miki mekanihikitini. Memunenierixi hiki mekani-hekiatani teiteri wahixie.

32 »Tameta niuki 'aixia manuyine xeme tepixekuxaxatiwa, mipai mitiuyiki tatutsima kemitiwarutahiawekai.

33 Kakaiyari Ketsutsi 'anukuketiaka mipai piraye'atia tame teminuiwarimama. Mipaita hutarieka mieme Niawari Xapayaritsie mipai pire'uxa:

»“Eki neniwe pekanihikitini,
hiki nekameniutinuiwitiani”.

34 Kakaiyari penukuketia mikite watsata, hatsuakuri tawarita mikatapineki. Mipai katinaye'ani iki niuki:

»“Ne 'aixia nekanixeyurimiki xemipatsiekaki yuriki Rawiri kenemitiutahiawixi”.

35 'Ayumieme xeime kwikaritsie mipai paine:

»“Kemi'ane 'ahetsiemieme pemipataxi, miki pepikapitiani mitapineki”.

36 »Hiki Rawiri yatiuyurieka yunuiwarima wahetsiemieme, Kakaiyari kemitinake kemitiyikihiawekai, Rawiri kaniumini, yututsima wahamatia kaniukateukieni, waiyarieya kaniutapine.

37 Peru miki matsi kemi'ane Kakaiyari menukuketia, miki yuwaiyaritsie pika'utapinixi.

38 »'Ayumieme mipai xeketenemaika xeme ne'iwama, Ketsutsi hetsiemieme mipai tepitexehekiatia, tita 'axaxemiteyurie xemiteheuyehiwiyarieniki,

39 'aitsika Muiťsexi hetsia mieme
pika'iyiwekaxia 'aixia miťeyurieniki 'axax-
eteyuriekaku, peru yunaiti Ketsutsi hetsie yuri
memite'erie 'aixia mekani'itiarieka.

40 Yumarima 'aixia Kaka'iyari niukametemama
kememaitikatei mipai tiuyini:

41 »“Neuxei teyukatawe'eriekate.

Xekenemamaka meta xekenekwi'ini.

Kenemitiyurieni ne mexixe'u'uwa,

xeme hatsuaku yuri xepikateta'erieni,

tsepaneti xewiti mitixe'utahekiatia”».

42 Hiki huriyutsixi watukiiteta me'ayenexiaka,
miki mekaniwarutawawirieni 'iki niuki
memikuxataniki tawarita 'uxipiya tukaritsie.

43 Mete'utahayewaku xeiripa, yumiireti
huriyutsixi meta waikawa memite'ayexeyakai
Papuru meta Werunawe mekaniwareweiya,
miki mekaniwatuikakaitini yuri mete'erieti
memuyuhayewaniki Kaka'iyari 'aixia
tiuka'iyarikaku wahetsiemieme.

44 Hiki tawarita 'uxipiya tukaritsie yunaiti
kiekatari mekaniyukuxeirieni Kaka'iyari niukieya
memi'enieniki.

45 Huriyutsixi mewaruxeiyaka miki
memiyukuxeiri yimiireme, mekani-
waruti'uxiwe'erieni. Papuru niukieya hepaitsita
'axamekaniutiyanekaitini.

46 Papuru meta Werunawe mipai mekateni-
waruta'eiya mekamamati: «Peuyewekai xeme meri
Kaka'iyari niukieya temixetaxatianiki. Xeme
xepika'itanaki'eri, tukari mikaxiwe xehetsie
mitinakeniki. 'Ayumiemeri 'iki, memikatanuiwari
wahetsia tekaniyehuni.

⁴⁷ Mipai Ti'aitame pītatiuta'aitia:
 »“Ne hekariwiwame nepimatsi'ayeitia nuiwarite
 wahetsiemieme,
 Pemiwatawikkweitsitaniki naitsarie kwie ma-
 nunieretsie paiti”».

⁴⁸ Hiki memikahuriyutsixi me'i'enieka
 mekaniyutemamawiekaitini. 'Aixia mekaniu-
 tiyuanekaitini Kakaiyari niukieya hepaitsita.
 Yunaiti tukari mikaxiwe memupitiarieki yuri
 mete'uta'erieka.

⁴⁹ Miki kwiepa naitsarie Ti'aitame niukieya
 pi'enieriekai.

⁵⁰ Huriyutsixi mepiwarutaxamuri 'ukari
 memitehayexeyakai memimariwakai, kiekatari
 memanuyetei yukwiepa Papuru meta Werunawe
 mekaniiwarayeweia.

⁵¹ Miki mekaneikatsixiani tumuanari
 yu'ikatetsie 'iniari meyurieti wahepaitsita,
 'Ikuniyu pita mekanekine.

⁵² Teyi'ikitawamete waikawa
 mekaniyutemamawiekaitini, 'Iyari Mitiyupataki
 mekanihipinekaitini.

14

*Papuru meta Werunawe 'Ikuniyutsie
 kememite'uyuri*

¹ Hiki 'Ikuniyutsie Papuru meta Werunawe
 mekaneutahaxiani huriyutsixi watukita ke-
 memite'iyamakai, muwa mekatenikuxatakaitini,
 'ayumieme yuri mekateniuta'erieni yumireti
 huriyutsixi meta kiriyekutsixi.

2 Huriyutsixi yuri memikate'eriekai mepiwarukunuitia mepiwahaxiatikai miki memikahuriyutsixitikai ta'iwama wahepaitsita.

3 Miki matsi mīxa 'amepititekai mekamamati Ti'aitame hetsia memimiemetetikaiki. 'Iya katinihekiatakaitini niuki 'aixia kemitiuka'iyari manuyine hepaitsita. Piwarupitiaxia yumamaki 'iniari mamariwaweme memiteyurieniki.

4 Hiki kiekatari hixiata mepiyutsanaxi: hipati huriyutsixi wahetsie mekateniwiyakaitini, hipatita ni'ariekate wahetsie mepitewiyakai.

5 Miki memikahuriyutsixitikai huriyutsixi wahamatia wa'ukiyarima wahamatia mekanitsutiani 'axamewayuriekuti mewatuaxikuti.

6 Ni'ariekate yametehetimaika, mekaniyuta'una kiekaritetsie Ritsitiratsie meta Reriwetsie mana hurawa Rikahuniya kwieyaritsie.

7 Mana mepu'uwakai niuki 'aixia manuyine mekuxatati.

Papuru Ritsitiratsie kemireutituaxiexia

8 Hiki tewi Ritsitiratsie pekatei nunutsiyari paiti ka'uyeiweti mutinuiwaxi. Muwa kaniutikateitini,

9 Papuru tikuxatame kani'eniekaitini. Miki 'ix-eiyati, yatimaiti yuri miti'eriekaiki 'aixia tiuyeikati mayaniki,

10 karima mipai katinitahiawe:

—Kenanukukexi, 'a'ikate keneutixutsera.

Miki kaniutitsuna, kuyeikati kanayani.

11 Teiteri me'ixeyaka Papuru kemitiuyuri, me'utihiwati rikahuniyatari waniukiki, mipai mekaniutiyuani:

—Kakaiyarixi tahetsia mepu'axia teiteri wahapai meteyuxexeiyati.

¹² Werunawe Tsehuxi mepute'uteriwaxi, meta Papuru 'Eximetsi mikimeri niuki mukuxatakaiki.

¹³ Kupiteri tukieya kiekari 'aurie manuwe, mawari wewiwameya turutsixi kaniwa'atiani wa'awate xuturiyatikaime kitenietsie kaniuku'uitiani. Teiteri yumiireme wahixie, miki mawari kaniwaweriemikikaitini.

¹⁴ Me'u'enanaka ni'ariekate Werunawe meta Papuru, yu'ixuriki metitsanati me'unautsaxiaximeti mekaniu'axiani teiteri wahetsia me'utihiwati, mipai me'utiyuati:

¹⁵ —Xeme teiteri 'aku ʒtitayari mipai xeteyurie? Tame xehepai tekaniteiteritini, xehepai tekateniu'iyarini. Niuki 'aixia manuyine temixekuxaxatiwa xemitehayewaki yaki xeikia xemiteyurie, Kakaiyari mayeyuritsie xemitewiyaniki. Miki muyuawi, kwie meta haramara putiwewi, meta naime wahetsie memitexuawetika.

¹⁶ Meripaiti xeteiterima mepiwarupitia nuiwarite yuhuye memanukuweiyaki.

¹⁷ Tsiere pikayuhayewakai kaheix-eiyati kemi'ane mitahekiatake. 'Aixia katiniyurienekaitini, wiyeri muyuawitsie mieme pitatsipitiakai, meta 'ikwaxi puxuaweriyakai. Xe'iyari muyutemawiekaki xetekwakaku.

¹⁸ Mipai me'utiyuaka hawerimimete xeikia mekaniwarukunuitiani, teiteri mawari memikawawewirieniki.

¹⁹ Hiki huriyutsixi mana mekaniu'axiani 'Anu-tiyukiyatsie meta 'Ikuniyutsie meheyekineka.

Teiteri mekaniwarukunuitiani. Papuru mekaniutituaxixiani. Mekaneihana kiekari tetsie mikime me'erietì.

²⁰ Teyi'ikitiwamete 'auriena mehaketikineku, kananukukeni. Kiekaritsie kaneyani. 'Uxa'ariekata Werunawe hamatia Reriwe mekanekine.

Anutiyukiya Tsiriya kwieyaritsie kememite'u'axia

²¹ Mana niuki 'aixia manuyine mekaniwakuxaxatiwakaitini kiekatari, yuwaikawame mekateniwa'ikitiakaitini. 'Ariketa me'akunuaxiaka, Ritsitiratsie, 'Ikuniyutsie meta 'Anutiyukiyatsie meniuyekine.

²² Teyi'ikitiwamete wa'iyari mekaniutuikaxiani metewakuxaxatiwati para yuri mete'erietì memiyuhayewaniki, mipai me'utiyuati: «Peuyewetse waikawa te'uximatiarieme temeutahaxianiki Kakaiyari mira'aitatsie».

²³ Naitsarie memiyutixexeiriwatsie wa'ukiyarima mekananayexeyarieni. Meyutanenewieka me'uyuhakieka mepihiritia Ti'aitame, miki yuri memite'uta'eriki hetsiena.

²⁴ Hiki Pitsiriya kwieyaritsie me'uyekineka, Pamipiriya kwieyaritsie paiti mekaniu'axiani.

²⁵ Mete'utahayewaka niuki me'utaxataka Periketsie, 'Atahariyatsie mekanekayune.

²⁶ Mana kanuwa 'amipatsie mekanekine 'Anutiyukiyatsie paiti hakewa memayeni'arie Kakaiyari 'aixia mitiuka'iyariniki wa-hetsiemieme, memite'uximayakaki kememiteheye'atia.

27 Me'u'axiaka mekaniwarukuxeirieni
 memiyutixexeiriwa. Mekateniwarutaxatiani
 kehepai mireyuriekai Kakaiyari wahamatia
 'uyeikati, mipaita yuri mekateneta'erien
 nuiwarite memikahuriyutsixi.

28 Miki teyi'ikitwamete wahetsia mīxa tukari
 mana mekaneyuhayewa.

15

Kerutsaremetisie kememite'uyu'eni

1 Hiki hipati Kureya meheyekineka
 mekateniwa'ikitakaitini ta'iwama
 mipai me'utiyuati: «Xeme xika
 xitekiyaki xeka'u'iniaritarieni kemaine
 Muitsexi yeiyarieya, xepikayiwawe
 xemitawikweitsitarieniki».

2 Papuru meta Werunawe yemeki
 mekaniniukixiekaitini mīremeki wahepaitsita.
 'Aixia mekaniyurieni Papuru Werunawe hamatia
 meta hipati yuri memite'erie miki yunaiti
 Kerutsareme mekanekine, ni'ariekate meta
 'ukirawetsixi wahetsia 'iki niuki hepaitsita
 memitehetixataki.

3 Mana memiyutixexeiriwakai mepiwareni'a.
 Penitsiyatsie meta Tsamariyatsie mepuyeki
 metekuxatati memikahuriyutsixi wahepaitsita
 kename yuri mete'uta'eriwakai. Miki
 niuki me'enieti yuri memite'erie 'iwamarixi
 waikawameki mekaniyutemamawiekaitini.

4 Kerutsareme me'uta'axiaku, mana
 memiyutixexeiriwakai, ni'ariekate meta
 'ukirawetsixi yunaiti mekaniwarutanaki'erien.

Memitewarutaxatiaki naimē Kakaiyari
kemitiyurienekai wahamatia 'uyeikati.

⁵ Hiki hipati paritseutsixi wahepai
memiteku'eriwakai mekananuku'uni mipai
me'utiyuati:

—Peuyewetse memikahuriyutsixi
temiwata'aitianiki memi'iniaritarieniki
xitekiyaki, 'iniari niukiyari Muiteksi 'aitsikayatsie
yamemitekahuniki.

⁶ Hiki ni'ariekate meta 'ukirawetsixi
mekaniyukuxe'ieneni 'aixia meteyurienike 'iki
niuki hepaitsita.

⁷ Waikawa niuki mexiatiakaku, Pekuru
'anukukeka mipai katiniwarutahiawe:

—Neuxei 'iwamarixi, xeme mipai xepitemate,
Kakaiyari meripaiti pinetsi'anayexei xetsata,
miki memikahuriyutsixi niuki 'aixia manuyine
memi'enieniki ne ne'utaniukakaku, mikiki
memitawikweitsitarieniki.

⁸ Kakaiyari ta'iyari mimateki katiniwaru-
tahekiatiani wapitiati 'Iyari Mitiyupata tame
tahepai.

⁹ Yiki katatixeyati miki meta tame. Yuri
mete'uta'erieku wa'iyaritsie kaniwaru'itieni.

¹⁰ Hiki kamitsi, ʔketitayari Kakaiyari
xete'iniatatiwe, yuyeyari xetewaranuyetekirie
tey'ikitiwamete turutsixi kwietsanamete
wahepai? Tatutsima meta tameta tepitatexiekai
yuku temanuyeteniki.

¹¹ Matsi Ti'aitame Ketsutsi 'aixia tiuka'iyarikaku
tame yuri tepite'erie temitawikweitsitarieniki.

¹² Hiki yunaiti muwa memuyuxe'iekai
kayuwati meputamarixi, memiwa'enieniki

Werunawe meta Papuru metehekiata me 'iniari mamariwaweme Kakaiyari kemitiyurienekai memikahuriyutsixi watsata miki metekux-atakaku.

¹³ Mete'utahayewaka metekuxatati, Kakuwu mipai katiniwaruta'eiya:

—Ne'iwamarixi xekeneneu'eni.

¹⁴ Tsimuni katiniutahekiata Kakaiyari meripaiti kemitiyuwairi menyexeyaki memikahuriyutsixi watsata hetsiana memimiemetetini.

¹⁵ Yaxeikia paine Kakaiyari niukametemama waniuki, mipai kemire'utiarie hepai:

¹⁶ »“Arike mana nepinuani,

Rawiri kiiya nepitawewieni mu'unikai.

Kiyexiyari mana meutihe naime
nepanuku'uitiani,
nepitseiriya,

¹⁷ teiteri memiyuhayewa Ti'aitame memukuwau-niki,
yunaiti nuiwarite nemiwaranayexei nehetsia
memimiemetetini.

¹⁸ Ti'aitame mipai paine”

matsiikime meyeitia 'iki matari paiti.

¹⁹ »'Ayumieme ne mipai nepitiku'eriwa, tepikawa'uximatiaka miki memikahuriyutsixi Kakaiyaritsie yuri memite'uta'eriki.

²⁰ Matsi 'aixia piyini temitewata'utiirieniki memiyukweriwayuriekaki, tita kakaiyarixi memitemawiyarie miki hepaitisa, memikawakumaiwaniki mikay'iya mikayikina, 'ukawiyayu waiyarieya hepaitisa

memiyukweriwayuriekaki meta xuriya
memikakwa'aniki.

²¹ 'Iya Muitsexi meripaiti hikike piwarexeiya
miki memitahekata kiekari mukumanetsie
watukiteta yamemite'ititeriwa 'uxipiya tukaritsie.

Memiyutixexeiriwa metehaka'utiaka
mekaneini'ani

²² Hiki ni'ariekate meta 'ukirawetsixi
wahamatia yunaiti memiyutixexeiriwakai
wahamatia 'aixia 'anekame mekani'eriekaitini
yutsata memiwaranuyexeiyaki hipame,
memiwaranuni'aniki 'Anutiyukiya paiti Papuru
meta Werunawe wahamatia. Mekaniwaranuyex-
eiya Kura Waritsawaxi mititewakai, meta Tsiraxi.
Miki mepite'aitametetikai yu'iwama watsata.

²³ Mipai mete'u'utiaka xapatsie mekaneini'ani:
Ni'ariekate meta 'ukirawetsixi 'iwamarixi,
Tekanixewairitiaka,
meta ta'iwamarixi xemikahuriyutsixi
'Anutiyukiyatsie, Tsiriyatsie meta Tsiritsiyatsie
xemitama.

²⁴ Tepu'enana kename hipati tahetsia
miemete mexexamurietiwakai yuniukiki
xe'iyari meyuitiatiweti mexe'aitiati
xemyu'iniaritaniki xitekiyaki, 'iniari
niukiyaritsie yaxemitekahuniki. Tame
tepikeawa'aitia.

²⁵ Hiki, 'axeikia te'uta'enieka
temiwaranayexeiyaki hipame 'iwamarixi
xehetsia temiwaranuni'aniki Werunawe meta
Papuru temiwanaki'erie wahamatia.

²⁶ Miki yutukari mekaniyetuakaitini Ketsutsi
Kirititsu Tati'aitiwame hetsia memimiemeteki.

27 'Ayumieme, tepiwareni'a Kura meta Tsiraxi. Mikita yuniukiki yaxeikia mepitexehekiatiani.

28 'Aixia pitiyurie, 'Iyari Mitiyupata, meta tame wairiyarika temikaxepitiakaki, 'iki hepaitisita kemireuyewetse:

29 xemika'ikwakaki tita kakaiyarixi memitemawiyarie, xuriya, mukawiya waiyarieya, kemi'ane mikaxe'iya mikaxekina xemikawakumaiwaniki. Xeme xika miki xeka'umayiani, 'aixia xepiyiaka.

Mipai xeikia kani'aneni.

30 Hiki miki memeyeni'arie 'Anutiyukiyatsie mekanu'axiani. Yunaima mewarukuxeirieka xapa mekaniyetuni.

31 'Iwamarixi me'itateriwaka mekaniyutemamawiekaitini memituikariekaiki.

32 Kura meta Tsiraxi Kakaiyari niukame-temama mekanihikitikaitini, waikawa metekuxatati mekaniwatukakaitini yu'iwama, mekaniwatseiriyakaitini.

33-34 Yapaimexia tukari me'uyurieka, yu'iwama wahetsia mekanekine 'aixia metewaxeiyati. Miki memiwareyeni'a wahetsia mekanu'axiani.*

35 Papuru meta Werunawe 'Anutiyukiyatsie mekanuuyuhayewa mete'ikitati, Ti'aitame niukieya 'aixia manuyine mekuxatati meta hipame yumireme wahamatia.

Papuru meta Werunawe kememikateyu'eniexia

* 15:33-34 15:33-34 RV60 meta hipati mepenaniitia Matsi Tsiraxi kaniyuwairiyakaitini mana muyuhayewaki.

³⁶ Hiki yapaimexia tukari 'anukayaku, Papuru Werunawe mipai katiniutahiawe: «Kimitsiari hutarieka tepiyehu, ta'iwamarixi tepiwa'iwatayu naime kiekaritetsie hakewa Ti'aitame niukieya temetaxatsie, kemetehe'uwa tepiwaxeiyayu».

³⁷ Werunawe Wani Marikuxi mititewakai kani'iniekaitini.

³⁸ Papuru hepaitsita 'aixia pika'ane kai memenuwitiniki miwareku'eiriekaiki Pamipiriyatsie, wahamatia mikahetiaki miti'uximayakaki.

³⁹ 'Ayumieme mepika'uyu'enieixia, mepau-tayeixia yuxexuiti. Werunawe Marikuxi hawititi kanuwa 'amipatsie Tsipire paiti mekanekine.

⁴⁰ Matsi Papuru Tsiraxi 'anayexeiyaka kaneyani. Ta'iwamaxi Ti'aitame meka-niuhiritiani 'aixia mitiuka'iyariniki miki hetsiemieme.

⁴¹ Tsiriyatsie meta Tsiritsiyatsie puyetia wa-tuikati mana memiyutixexeiriwakai.

16

Timuteu Papuru meta Tsiraxi kemitiwarutini

¹ Hiki Papuru Reriwe kaniye'ani meta Ritsitiratsie, mana tiyi'ikitawame Timuteu titewakame pukaxei. Maamaya huriyu yuri miti'erie kanihikitikaitini, paapaya kiriye ku tihikitikai.

² 'Iwamarixi ritsitirataru meta 'ikuniyutari Timuteu 'aixia mekatenihekatakaitini.

³ Papuru kanita'inieni hamatiana miyemieki. 'Iniari xitekiyari kaniwewirieni huriyutsixi

wayeyari kemaine, yunaiti memimaikaiki
paapaya kiriye ku mihikitikaiki.

⁴ Meku'uwati kiekaritetsie mekani-
wahiritiakaitini yamemitekahuniki, 'aitsikatsie
kememite'aitakai ni'ariekate 'ukirawetsixi
kerutsaremetari.

⁵ Memiyutixexeiriwakai mekanitirikariyariekaitini
yuri mete'eriet. Tukariki mekani-
tamiirimekaitini.

*Papuru yuheinitsita matseruniyatanaka
kemiuxei*

⁶ Hiki Pirikiyatsie meta Karatsiya
kwieyaritsie mekaniuyekine. 'Iyari
Mitiyupata piwaruta'imaiyakai 'Atsiyatsie niuki
memikakuxataniki.

⁷ Mitsiya kwieyari tetsita me'u'axiaka Witiniy-
atsie mekaneuyeyunekekaitini. Ketsutsi 'Iyarieya
pikawarupitia.

⁸ Mitsiya kwieyari tetsita me'uyekineka
Tiruhatsi paiti mekaneukakine.

⁹ Yiwikita Papuru yuheinitsita tewi kaniuxeiya
matseruniyatanaka, muwa 'utiwekame
'iwawiriekame mipai 'utaiti: «Kenanaye'a 'anataiye
Matseruniya paiti, ketaneparewieka».

¹⁰ Yuheinitsita tiuxeyaka kwitiwa
tekaniyukuha'aritaniki ketemite'anukineki
'anutaiye Matseruniya paiti, mipai tetehetimaika
Kakaiyari mitatsi'uta'ini niuki 'aixia manuyine
temiwaretaxatianiki.

Kememite'anutaxiriya Piriputsie

¹¹ Hiki Tiruhatsi tehekineka heitseriemeki
tekaneta'axiani Tsamutiratsiyatsie, 'uxa'arieka
Kiekari mihewatsie paiti tekaneta'axiani,

¹² manaketa Piriputsie paiti tekanekine. Miki kiekari 'amiyewa kanihikikaitini 'etsimiyeyeu hetsiena mitiwiya Matseruniya kwieyaritsie. Xumatari kaniwakuruniyatikaitini. Yapaimexia tukari tekaniuyurieni miki kiekaritsie.

¹³ 'Uxipiya tukaritsie kiekari tetsita paiti tepanuyeki. Mana hatia tetsita mirayutinenewitire puwekai. Mana tetiyaxeka 'ukarawetsixi tekateniwarutaxatiani mana memiyuxeiriekai.

¹⁴ Miki xewiti Ririya mititewakai, Kakaiyari kanayexeiyakaitini. Tiyatira kiekariyaritsie kanikiekametikaitini meta 'ixuriki miyitsikimawi kanituakaitini. Ti'aitame kanenutiyepieni 'iyarieya mexi miki ta'enakai, mi'enieniki Papuru kemitikuxataikai.

¹⁵ Miki puka'iyarie meta kiena kiekatari. Hiki kataniuta'inieni mipai 'utaiti: «Xeme xika Ti'aitame hetsie yuri neti'eriekame xenetsihayeitiani, hikimi nekiita, xemayeheniki». Mipai 'utaiti wairiyarika kataniupitiani.

Papuru meta Tsiraxi memanutaxiriyā

¹⁶ Hiki mirayutinenewitire teheukineka, 'imari wairiyarika miti'uximayatame katananukunake, 'iyari 'axami'ane minikai kimana mitimaiwekai. Miki tikuxatati kemitiyiniekai waikawa piti'iwakai yukutsiyarima wahetsiemieme.

¹⁷ Miki pitatsi'uweiyakai Papuru meta tame. Putahiwakai mipai 'utaiti:

—'Iki teiteri Kakaiyari 'Amutewi te'uximayatsiriwamete mepihiki, miki wikweit-sitarika huyeyari xeme mepixekuxaxatiwa.

18 Mipai mīxa tukari katiniyurienekaitini. Hiki Papuru 'uxiwa'ati, ta'aurie 'aweka mipai katini-tahiawe 'iyari 'axami'ane kaniutatieni:

—Ketsutsi Kiritsitutsie netiwiyyati nepimetsi'aitia, hetsiena pemayeyaniki.

Hiki 'ana kwitiwa 'iyari 'axami'ane kanihayewa.

19 Kepauka kutsiyarimama mipai memitehetima miwaruku'eiriekaiki kimana memite'iwakai, 'ayumieme Papuru meta Tsiraxi mekaniutiwiyyarieni, meta kiekari hixiapa mepiwarehapa hakewa 'itsikate memiteha'aitatsie.

20 'Itsikate wahixie mewa'atiaka, mipai mekaniutiuyuani:

—'Iki teiteri mekanihuriyutsixitini, mepiwaxamurietiwe tahetsia kiekatari.

21 Yeiyyari mekani'ikitani tame xumatari temukunamiyyarie temitanaki'erieni yatini yatemiteryiekaki.

22 Yunaiti mekaniyukuxeirieni wahepaitsita. 'Itsikate mekateniuta'aita wa'ixuriki memanutihihiyariexianiki, meta kiyeki memitiweiyaniki.

23 Waikawameki mewarutiwaka, katsariyanata mekaniwaranutaxirieni, meta tihiweme mekaniuhiritiani 'aixia mitiwa'iwiiyaniki.

24 Miki mipai tiuta'aitarieka, mutanieretsie paiti kaniwaranutaxirieni. Wa'ikate tiyixiriwametsie kaniuye'uitiani.

25 Hiki tikari hixiapa yakititi Papuru meta Tsiraxi meyunenewieti Kakaiyyari mekaniniawakaitini. Wahamatia memanutaxiriyakai mekaniwa'eniekaitini.

26 Yapauka kwie karima kaniutayuani, katsariyana tenariyari kaniutayuani. Naiti kiteni-ete pīreuyepierixia. Yunaiti pīretsutsixi watepiate kanakaxinixiani wamamatetsie wa'ikatetsie.

27 Tihiweme 'anutaniereka, katsariyana kitenie heuyepiekame 'uxeiyaka, yunawaxa kaniwatihana yumienike, memanutaxiriyakai meyuta'unaxiame 'erieti. Papuru karima kanitahiweni mipai rehiaweti:

28 —Penikahirixia peti'akwinitiani. Tame tanaiti 'uwa tekanayeteni.

29 Hiki tihiweme kixeme kaniuta'iwauni, yumexuitiati kiita kaneutaweni 'uyiyiakati. Papuru meta Tsiraxi wahetia kaniukaweni.

30 Takwa waranuyewitika mipai katini-waruta'iwawiya:

—Neuxei, ʔtitari reuyewetse yanemitiyurieniki nemitawikweitsitarieniki?

31 Miki mipai mekatenita'eiya:

—Ti'aitame Ketsutsi hetsie, yuri ketineuta'eri mikiki pekanitawikweitsitariemiki 'eki meta 'akie kiekatari.

32 Kakaiyari niukieya mekanitaxatiani miki, meta yunaime kitana memiye'uwakai hamatiana.

33 Miki yiwikita warewitika, kaniwarahauxixiani memaweiyatikateitsie. Kwitiwata puka'iyarie miki, meta yunaiti kiena kiekatari.

34 Tihiweme yukie warewitika katiniwaremini, meta yunaiti yuri memite'uta'eri Kakaiyari hetsie 'axeikia yunaiti mekaniyutemamawiekaitini.

35 Hiki 'ukatareku 'itsikate yutupiritsixi mekanikawaren'ani tihiweme mipai memiteta'aitianiki: «Keniwarutixina miki teiteri».

³⁶ Hiki tihiweme Papuru mipai katiniutaxatiani:
 —'Itsikate mipai mekteneta'aita
 xemitixinarieniki. Hikitsiari xekenehu,
 xeka'uximatiarieti.

³⁷ Papuru tehiwemete mipai katiniwaruta'eiya:
 —Miki mepitatsi'utiwa yunaime wahixie
 tsepaneti 'itsikame mikatatsi'uta'iwawiyaxi,
 tsepaneti temixumanutsixi. Mepitatsi'anutaxiri.
 Kaukatsiari hiki 'awie metatsi'anuyeni'ani.
 Pikatixaitsieti, 'uwa me'u'axiame, miki
 meketatsi'anuyewitini.

³⁸ Tupiritsixi 'itsikate mekteniwarutaxatiani
 kememetiyua. Kepauka miki memu'enana
 kename Papuru meta Tsiraxi Xumanutsixi
 mehikitikai mekaniutimamani.

³⁹ Me'u'axiaka mekaniwanitiakaitini,
 mewaranuyewitika mekaniwarutawawirieni
 memiyehuki miki kiekaritsie.

⁴⁰ Hiki katsariyanata mewayekineka Ririya
 hetsia mekaniu'axiani. Mewaruxeiyaka
 'iwamarixi mekaniwatuikakaitini. 'Arikeketa
 mekanekine.

17

Tetsarunikatari kememiteyuxamuriekai

¹ Hiki 'Amipipuritsie meta 'Apuruniyatsie
 me'uyekineka Papuru meta Tsiraxi Tetsarunikat-
 sie paiti mekaneta'axiani, huriyutsixi watuki
 mana kaniuwekaitini.

² Papuru kemitiyeiyarieyatikai, muwa tukita
 kaneutahani, haikakia 'uxipiya tukaritsie katini-
 wakuxaxatiwakaitini

³ 'utiarikatsie mieme wahekiatiati watuikati
 kename heuyewekai miki Kiritsitu heitserie

mupitiarie mitikwineki mikite watsata manukukeniki, mipai 'utaiti: «'lki nemixehekiatia, 'iki kemi'ane heitserie mupitiarie Kiritsitu kanihikitini».

⁴ Hipati huriyutsixi yuri mekateniuta'erieni, Papuru meta Tsiraxi mekaniwarutinini, yumireti 'ukarawetsixi waikawa memeyewetse meta kiriyekutsixi Kakaiyari memayexeyakai.

⁵ Huriyutsixi yuri memikate'eriekai mewa'uxieti, hipame 'axamemiteyurie kiekari hixiapa memu'uwa mekaniwaruta'inieni, mewaruxerika yumireme kiekatari mekaniwareutaxamuriexiani. Katsuni kiita mekateniunawani Papuru meta Tsiraxi mewawautiweti memiwaranuhapaniki yumireme wahixie.

⁶ Memikawarutaxeiki, Katsuni meta hipame 'iwamama mepiwarehapa 'itsikate wahixie mipai mete'uhiwati: «'lki naitsarie teiteri mekaniwaxamurietiweni, 'uwata mekaniu'axiani.

⁷ Katsuni yukiita kaniwarupitiani. Miki yunaiti yamepikatekahu Tsetsaxi kemiti'aita, mipai me'utiyuati kename xewiti ti'aitame 'a'uyeika Ket-sutsititi».

⁸ Mipai mete'u'enanaka, teiteri memiyumire meta 'itsikate kiekatari mekaniuyeha'ani,

⁹ Katsuni meta hipati mekaniukwetatarieni 'uxa'atini warie 'atsimemikatiyuaniki, mekaniutixinarieni.

Papuru meta Tsiraxi Wereyatsie kemitekuxatakai

¹⁰ Hiki kwitiwa 'ukuyireku tey'ikitwamete Papuru meta Tsiraxi mepiwareni'a Wereyatsie

paiti. Mana me'u'axiaka huriyutsixi watukita mekaneutahaxiani.

¹¹ Mana memitamakai huriyutsixi yemeki 'aixia mepite'u'iyarikai, tetsarunikatari yamekate'u'iyarikaku. Mekanitanaki'erieni niuki waikawa meyuwaiiyati. Tukariki mekateniwautiwekaitini 'utiarika xapayaritsie, yamemitehetimaniki xika'aku yuritini kememitekuxataakai.

¹² Yumiireti huriyutsixi yuri mekatenu-uta'erieni, meta yuwaikawati kiriyekutsixi, 'Ukarawetsixi waikawa memeuyewetse, meta 'ukitsi yuwaikawati yuri mepite'uta'eri.

¹³ Hiki kepauka memite'utamari huriyutsixi tetsarunikatari, kename Papuru Wereyatsie Kakaiyari niukieya hekuxataakai. Mana mekanekine mewaxamurienike teiteri yumiireme.

¹⁴ Kwitiwata 'iwamarixi Papuru haramara tet-sita mekanitani'ani miyemieki. Tsiraxi meta Timuteu Wereyatsie mekaniyuhayewa.

¹⁵ Miki Papuru memaweyakai 'Atenaxi paiti mekaneiwitini. Mana mekanitinuaxiani miki mipai tiwaruta'aitaku, Tsiraxi meta Timuteu hetsiana memi'axianiki mexiima xika tiyiwenike memiyehuki.

Papuru 'Atenaxitsie kemitiuyeikakai

¹⁶ Hiki Papuru wakwewieti 'Atenaxitsie, yu'iyaritsie kaniyihawekaitini waxeiyati kiekar-itsie kakaiyarixi waikawa memayexeiyariekaiki.

¹⁷ Tukita niuki kanixiatikaitini huriyutsixi wahamatia, meta kiriyekutsixi Kakaiyari memayex-eiyakai wahamatia. Kiekari hixiapata tukariki

niuki kanikuxatakaitini mana memu'uwakai wahamatia.

¹⁸ Hipati 'Epikureyutsixi meta 'Etsituikutsixi temaiwawemete mekaniti'eiyarimekaitini. Hipati mipai mekaniutiyuanekaitini: «¿Titakuta tixatanikeyu 'iki niukiwiwame?» Hipatita mipai mete'utiyuanekai: «Wa'atiti kakaiyarixi xaitsie miemete puwakuxata». Mipai mekaniutiyuanekaitini Papuru Ketsutsi niukieya 'aixia maniyine mukuxatakaiki, meta mikite kememite'anuku'uni.

¹⁹ Hiki mekaneiwitini 'itsikate 'Arexi yemuriyaritsie memiyutixexeiriwakai wahiripa, mipai mete'iku'iwwawiyati:

—¿Tsipara 'iki 'ikitsika mihekwa pemukuxata tihiki, tame tepeitimani?

²⁰ Ketemikateheye'enakare pepitikuxata. 'Ayu-mieme tekatenetimaikuni ketiti maniyune.

²¹ 'Atenaxitari yunaiti, meta ku'uwamete mana memi'iwatatiwe 'atsimepikateyuriekai, tixaiti mitihekwa mepitexatakukai meta mepite'eniekukai xeikia.

²² Hiki Papuru 'itsikate wahixiapa 'utakeka mipai kaniutayini:

—Neuxei 'atenaxitari. Nekanixexeiyani xeme waikawameki xekateniwarayexeiyani.

²³ Mana ne'uyemieti nekatiniuxeiya tita xemitewarayexeiya, xeime nekaniutaxeiya mirayutimawatire, hetsiena mipai re'uxame: KAKAIYARI MIKAMATIWATSIE 'IKI PIMIEME. Hiki, kemi'ane xemayexeiya xeka'imaiti, ne miki hepaitsita nekatiniyekuxaxatiwani.

24 »Miki Kakaiyari kwie mutawewi, meta naiti hetsiena mitixuawe, miki Ti'aitame muyuawi meta kwie pitipiinieya. Miki tuki mamaki miwewiyata pika'ayeka,

25 teiteri yumamaki mepika'eyexeiya, tixaiti mikareuyehiwaki. Miki yunaime tukari piwapitia, wa'iya meta naiti mitixuawe.

26 Xeime tewi wapaapa 'ayeitiaka, piwarutiwewi yunaime nuiwarite naitsarie kwie manuniere memitamakaki. Wakwie 'iniariyari tiukaye meta memeixeiyaniki hakewa meuye'atika.

27 'Iki Kakaiyari miyakatiniuyurieni yunaiti memikuwauniki, tsikeretsi mekumetiwetu memitaxeiyaki. Yuriki, miki 'ateewa pika'uyeika tame taxexuime tahetsia.

28 «Mikitsie tetewiyati tekanayeneniereni, tekanikuyuaneni meta tekaniu'uwani». Mipai kememutiyuane hepai hipati teyininiawamete xehetsia miemete: «Miki tame nuiwarimama tepihiki, me'utiyuati».

29 »Hiki, xika Kakaiyari hetsie teyekine, 'aixia pika'ane para mipai temite'ixeiyani huru hepai, pirata hepai yatini tete hepai 'anekame: tewi wewiyaya hepai 'anekame, tita tewi mitiyikihawe hepai 'anekame.

30 Hiki Kakaiyari 'axapikatixeiyaikai tita memiteyuriekai kepauka 'atsimemikatemalaikai, peru hikiri piwahekiatsitia yunaime teiteri naitsarie memitama memitehayewaniki kememiteyurie.

31 Xeime tukari pukaye miwa'iniataniki kwiepa memitama heitseriemeki yianeti, 'iya 'uki

manuyexei yatiyurienekaku. Kakaɪyari yuriki niwarutahekiatiani yunaime, 'enukuketiaka miki mikite watsata».

³² Hiki me'u'enanaka mikite ke-memite'anuku'uni, hipati mekaninanaimakaitini, hipatita mipai mekatenikihawekaitini:

—Hutarieka 'arieketa tepimatsi'enieni 'iki hepaitsita petikuxatame.

³³ Hiki Papuru tiutahayewaka xeɪripa, kanewayeyani.

³⁴ Hipati Papuru mekaniutinini meta yuri mekateniuta'erieni. Riyunitsiyu mi'itsikametikai 'Arexi yemuriyaritsie miemetitiri, meta xewiti 'ukaratsi Ramaritsi mititewakai, metatsiere hipati yuri memite'eriekai.

18

Papuru Kurinitutsie kemitiuyeikakai

¹ Manaketa 'Atenaxi yeyaka Kurinitutsie kaniye'ani.

² Mana xeime huriyu 'Akira titewakame kananukunake, Punitutsie metinuiwaxi meta 'iyaya Pirtsira mititewa. 'Apikareutewikai 'akuxi 'Itariya kwieyaritsie heyeyaka, Kirauriyu pitiuta'aitakai yunaiti huriyutsixi Xumatsie memititekai memitaweiyarieniki. Papuru miki wahetsia kaninuani,

³ mikita wahapai 'ixuriki kiyari piwewiwametikai, wahamatia kaniuyuhayewa memiteta'uximayataki yunaiti.

⁴ Xexuime 'uxipiya tukaritsie tukita katinikux-atakaitini, huriyutsixi meta kiriyekutsixi yuri katininiwa'eritiamikikaitini.

⁵ Hiki Tsiraxi meta Timuteu Matseruniyatsie meheyekineku, me'u'axiaku, Papuru niukiki 'ayumiemetiti kanayani xeikia, tiwahekiatiati huriyutsixi kename Ketsutsi hiki kemi'ane heitserie mupitiarie Kiritsituti.

⁶ Kepauka huriyutsixi Papuru memiti'uxiwe'eri meta 'axamekatenikihawekaitini, Papuru yu'ixuriki 'utakatseka 'iniari 'ayeitiaka, mipai katiniwarutahiawe: «Xeme yuhetsie xepitehahipa xika xe'ukwini. Ne pita nepi'itiya. Hikiri 'ena nemiyeyani memikahuriyutsixi wahetsia nepiyemie».

⁷ Hiki Papuru tukita wayeyaka xeime kie kaninuani Kutsitu mititewakai hetsia. Kakaiyari miki kanayexeiyakaitini, meta kiena pehurakai tuki manuwekai.

⁸ Kiritsipu tukita miti'aitakai yuri katiniuta'erieni Ti'aitametsie, meta yunaiti kiena kiekatari. Yumiireti kurinitutari me'u'enanaka Papuru kemitikuxataakai yuri mekateniuta'erieni meta mekaniuka'iyarieni.

⁹ Xeitikaritsie Ti'aitame Papuru heinitsitana mipai katinitahiawe: «Pepikaheumaka, matsi ketinekuxatani pekatihayewati,

¹⁰ ne 'ahamatia nepuyeika, nixewiti 'axapikamatsiyurieni. 'Iki kiekaritsie yuwaikawame teiteri nekaniwarexeiyani».

¹¹ Ayumieme Papuru xeiwiari heimana 'ataxewime metseri mana kaniuyurieni, Kakaiyari niukieya wa'ikitiati.

¹² Hiki, Kareuni kuwexinaruri, 'Akaiya kwieyaritsie mihiritiariakai, huriyutsixi 'axeikia

me'uyukuxeiriekā Papuru me'iniukimati,
mekaneiwitini 'itsikame mirewa'aitatsie.

¹³ Mipai me'utiyuati:

—'Iki tewi yuri katiniwa'eritiaka teiteri
Kakaiyari memayexeianiki 'iniari niukiyari
kemikahaine.

¹⁴ Papuru 'ari taniuximekaku, Kareuni mipai
katiniwarutahiawe:

—Neuxei huriyutsixi, 'iki xika kwinimieme
'axareyurienike, yuriki nepixe'enienikeyu.

¹⁵ Mexika yaki xeikia xe'utiyuaneni
yuhetsiemieme, niuki hepaitisa xe'iniari
hepaitisa xeikia, 'aixia xeketeneuyuri xemetiti.
'Itsikame nepikahiki mipai ti'anekameki.

¹⁶ Hiki katiniuta'aita memiwayeweyarianiki
mirewayutixanetsiwatsie.

¹⁷ Miki yunaiti Tsutsitenexi tukita
ti'aitame mihikitikai mekaniuwiya, meta
mekaneikuwaxiani 'itsikame 'uwenieya hixie.
Kareuni 'atsipikahainekai miki hepaitisa.

*Piritsira, 'Akira meta 'Apuruxi 'Epetsutsie
mepu'uwakai*

¹⁸ Hiki Papuru miixa tukari mana
puyuhayewaxi. Manaketa yu'iwama waruta-
teutiaka Tsiriya kwieyaritsie kaneyani kanuwa
'amipatsie. Piritsira meta 'Akira hamatiana
mekanekine. Meripaiti miyihiritiakaiki,
'ayumieme Tsenikireyatsie paiti pukaxirieka
yumu'utsie.

¹⁹ Hiki 'Epetsutsie me'uta'axiaka, mana Papuru
memeweyakai kaniwareku'eirieni, miki tukita
kaneutahani muwa niuki kaniutaxata huriyutsixi
wahamatia.

20 Miki mekanitawawirieni yapaimexia tukari miyurieniki wahetsia 'akuxi, miki pikayuwairiyakai.

21 Matsi wateutiati mipai pituuyihiritia: «Xika Kakaiyari mipai tinakeni nepayeneni». Hiki 'Epet-sutsie kaneyani.

22 Hiki Tsetsareya paiti nuaka, Kerusareme neutyune memiyutixexeiriwa watahiaweke, manaketa 'Anutiyukiyatsie kanakayune.

23 Yapaimexia tukari mana 'uyurieka Papuru kaneyani, wareu'iwatamieka memayutixexeiriwatikatsie Karatsiya kwieyaritsie meta Pirikiyatsie yunaime teyi'ikitiwamete watuikati.

24 Hiki huriyu tewiyari kaniuyeikakaitini 'Apu-ruxi titewati 'Arekanitiriya metinuiwaxi. 'Epet-sutsie kaninuani. 'Aixia pi'aneikai niukameki. 'Utiarika xapayaritsie waikawa pirayemaikai.

25 Miki Ti'aitame huyeya hepaitsita katiniuti'ikitiariekaitini. 'Aixia 'iyariki yuwairiyati, katinikuxatakaitini ti'ikitati heitseriemeki Ketsutsi hepaitsita, tsepaneti mitimaikai Wani kemitiu'iyakai xeikia.

26 Tukita kanitsutiani tikuxatati kaheumati. Me'i'enieka Pirtsira meta 'Akira mekanita'inieni, heitseriemeki matsi mekateni'ikitiakaitini Kakaiyari huyeya hepaitsita.

27 Miki kaniyeimikikaitini 'Akaiya kwieyaritsie. 'Twamarixi me'ituikati mekateniwaruta'utiirieni teyi'ikitiwamete memitanaki'erieniki. Henuaka waikawa kaniwaparewiekaitini miki yuri memite'uta'eri Kakaiyari 'aixia tiuka'iyarikaku.

28 Yunaime huriyutsixi wahixie tirikaiyemeki katinikuxatakaitini, 'utiarika xapayaritsie tiwa-

hekiatiati kemi'ane heitserie mupitiarie Ketsutsi
metsiyaxi mihiki.

19

Papuru 'Epetsutsie kemitiuyeikakai

¹ Hiki 'Apuruxi Kurinitutsie 'akuxi 'uyeikakaku,
Papuru hiri 'utia 'uyeyaka 'Epetsutsie kaneta'ani.
Hipame teyi'ikitiwamete mana kaniwaretaxeiya.

² Mipai katiniwaruta'iwawiya:

—ǂXeme 'Iyari Mitiyupata xete'utanaki'eri yuri
xemite'uta'eritsie?

Miki mipai mekatenita'eiya:

—Hawaiki matsi 'Iyari Mitiyupata hepaitsita
tepika'enanawawe.

³ Hiki mipai katiniwaruta'iwawiya:

—ǂTitatsie xetewiyati xete'uka'iyarie?

Miki mipai mekatenita'eiya:

—Wani kemitiuka'iyakai xeikia teniuka'iyarieni
tame.

⁴ Papuru mipai katiniwarutahiawe:

—Wani kaniwaruka'iyakaitini mete-
hayewakaku ke'axamemiteyuriekai, mipai
tiwakuxaxatiwati teiteri yuri memiteta'erieniki
kemi'ane 'utimana 'umamiekaitisie. Miki Ketsutsi
kanixatakaitini Kiritsitu.

⁵ Me'u'enanaka mekaniuka'iyarieni Ti'aitame
Ketsutsi hetsiemieme.

⁶ Papuru waheima kaniutimeni, 'ana 'Iyari
Mitiyupata mehexeiyati mekanakine, hipame
niukiteki me'utiniuti mekanakine meta Kakaiyari
niukieya mekanikuxatakaitini.

⁷ Yunaiti teiteri tamamata heimana huta
mepiyupaimekai.

8 Hiki Papuru huriyutsixi watukita kani'axekaitini tikuxatati kamati haika metseri puyuri. Niuki kanikuxatakaitini, yuri memiteta'erieniki, Kakaiyari ti'aitametikaku tikuxatati.

9 Hipati mekanitsetse'ikaitini, yuri mepikate'uta'eri, 'axame'utiyuati miki huye hepaitsita yumireme wahixie. Papuru waruku'eirieka tey'ikitwamete kaniwaranuyewitini. Tukariki Tiranu miti'ikitakaisie niuki kanikuxatakaitini.

10 Mipai huta wiyari katiniyurienekaitini, yunaiti 'Atsiyatsie memitamakai huriyutsixi meta kiriyekutsixi Ti'aitame niukieya mekanu'enieni.

11 Hiki Kakaiyari 'iniari tirikawime katiniyurienekaitini Papuru yatiyurienekaku.

12 Tekwikwikate watuwaxate meta wapetserate mepiwarehuririwakai Papuru mimayuaniki, mikiki yukwiniyaki 'aixiameteheu'erieti mepakikakai, meta kakaiyarixi 'axamemi'anene wahetsie mepayekikakai.

13 Hipati ku'uwamete huriyutsixi kakaiyarixi memiwaranuyeni'awakai, miki Ti'aitame Ketsutsi mekanitixatatikine, kakaiyarixi 'axamemi'anene memiwanikai teiteri wahepaitsita, mipai me'utiyuati: «Ne nepixe'aitia Ketsutsi hetsiemieme Papuru mikuxata hetsia, nepixewawirie xemayekineki».

14 Iki huriyu 'Itsikewa mititewakai mawari wewiwamete tiwa'aitiwame, miki 'atahutame yuniwema kaniwarexeiyakaitini mipai meteyuriekame.

15 Hiki 'iyari 'axami'ane mipai katiniwaruta'eiya, Ketsutsi nepimate: «Meta Papuru

nepetima, peru xeme, ¿kemi'ane xepiyia?»

¹⁶ Miki tewi 'iyari 'axami'ane miwiyakai waheima kaniutiweni, kaniwara'iwa yunaime tirikaiyeti. Mikitsi memamaweti meheuxitekietikaiti mekaniyuta'una kiita.

¹⁷ Kepauka memite'utamari kemitiuyi yunaiti huriyutsixi meta kiriye kutsixi 'Epetsutsie memitamakai. Waikawa yunaiti mekanimamakaitini. Kemi'ane Ti'aitame Ketsutsi mihiki 'aixia tikuxaxatsiwati kanayani.

¹⁸ Yumiireti yuri memite'uta'eri mekaniu'axiani meyuhekiatati 'axakememiteyuriekai.

¹⁹ Yumiireti miki memiteyukewaiyakai, yuxapate me'ukuxeirieka yunaime wahixie mekanititaiya. Hiki mekaniti'iniata 'axeikia kepa'imemetsie naiti mi'akai xapayari, huta tewiyari heimana tamamata miriyari pirata tuminiyari kanayani.

²⁰ Mipai tiuyiku, Ti'aitame niukieya tirikaiyemeki kaniutimire, kaniutirikare.

²¹ Hiki miya tiuyiku, Papuru yu'iyaritsie kaniyuwai'riya Matseruniyatsie meta 'Akaiyatsie 'uyeyame Kerutsaremet'sie meta'aniki, mipai 'utaiti: «Mana neheta'ame, peuyewetse Xumatsie nemeumieki».

²² Hiki yuhutame yuparewiwamete Timuteu meta 'Eratsitu Matseruniyatsie kaniwareni'ani, mexi'akuxi 'Atsiyatsie yapaimexia tukari 'ukatei.

'Epetsutari kememiteyuxamuriekai

²³ Hiki 'ana waikawameki mepiyumuinakai teiteri miki huye hepaitsita.

24 Xewiti Remetiriyu mititewakai pirata wewiwame mihikitikai, pirata kakaiyarixiyari piwawewiekai Riyana hepai tiyuxexeiyame. Miki mipai tiyurieneti waikawa 'iwarika kaniwapitiakaitini tewewiwamete.

25 Hiki warukuxeirieka miki, wahepai te'uximayatamete wahamame, mipai kaniutayini:

—Neuxei, xeme xekatenimaika tame temite'iwa 'iki ta'uximayatsikaki.

26 Mipai xepitexeiya, mipai xepite'enana, Papuru yuri kemitiwa'eritia kemitiwarukunuitia yumireme teiteri, 'ena 'Epetsutsie xeikia pikatixai, matsi naitsarie 'Atsiyatsie. Mipai katinikuxatani, miki mamaki memiwewiyatika kakaiyarixi mepikahiki 'utaiti.

27 Miki meta, tita temitehexeiya tame pikweriwa'ane kapa yaki'ayaniki. Matsi meta, 'iki kakaiyari mitirikaiye Riyana tukieya, tixai katihikitime teiteri me'erieti. Yunaiti 'atsiyatari, naitsarie kwiepa memitamata, kemi'ane memayexeiya, 'iki tirikariyaya pika'unariexime.

28 Hiki me'u'enanaka mepuyeha'a. Mekaniuti-hiwakaitini mipai me'utiyuati:

—Kanitirikaiyeni 'epetsutari takakaiyari Riyana.

29 Naitsarie kiekaritsie mepuyux-amurietiwekai. 'Axeikia mepeki me'unautsaxi aximeti xeiripa, mewarutiwiwaka Kayu meta 'Aritsitariku matseruniyatari Papuru teitametemama memihikitikai.

30 Papuru kanihamikikaitini yumireti teiteri memayuxeirie wahixie, peru teyi'ikitiwamete mepika'ipitia.

31 Hipati 'Atsiya kwieyaritsie kiekatari 'itsikate, hamikumama memihikitikai, xapa mekaneini'airieni waikameki me'iwawirieti xeiripa mikamieki.

32 Hiki hipati yiki mete'uhiwati hipatita yiki pita mekateniuhiwakaitini. Mana xeikia mekaniyukuxeirieni yunaiti, yumireti 'atsimepikatemalaikai titayari muwa memite'u'axiakai.

33 'Amemu'uwakai watsata mekanenuyexeiya 'Arekanituru, huriyutsixi me'itakeku wahixie. 'Arekanituru yumamaki waru'iniaritiaka kaniniumikikaitini yuhetsiemieme memiyukuxeiri wahixie.

34 Meheitibaika Huriyu mihikitikaiki, karima mekaniutihiwakaitini 'axeikia yunaiti huta hurayari mepuyuri mipai mete'uhiwati:

—Kanitirikaiyeni 'epetsutari takakaiyari Riyana.

35 Hiki kiekaritsie ti'aitame ti'utiwame waku'imaiyati mipai katiniwarutahiawe memuyuxeirikai:

—Neuxei 'epetsutari, ¿hakewatsi tewi 'atsimikatitude kename 'Epetsu kiekatari Riyana mitirikaiye tukita temite'aia, Kupiteritsia makane tete kakaiyariyari hiwemetemama?

36 Hiki, xika mipai 'aneni, xika kayuxamurieka 'iki niuki, kaneuyeweka kayuwati xemitamareki 'axaxemikateyu'eniwaniki.

³⁷ Xekaniwa'atiani 'iki teiteri, tsepa 'axamemikate'uyuri tuki hepaitsita, tsepa 'axamemikatekuxata xekakaiyari hepaitsita.

³⁸ 'Ayumieme Remetiriyu, tewewiwamete hamatiana memu'uwa xika tixai metehexeiya xeime hepaitsita, tukari puxuawe kepauka 'itsikate 'amemititeni, miki kwiepa memihiritiarie 'amekaniu'uwani. Mana yuxanetsika mekehe'atiani.

³⁹ Xikatsi matsi 'akuxi xetekuwauni, 'aixia piyini kepauka kiekatari memiyuxeirie, 'iniari niukiyari kemaine.

⁴⁰ Hikimitsiari tepikweriwa'aka kapa tahetsie rahiiyaniki 'axatemitewakihaweki hiki, tsepa mikareuyewekai. Tame tepikayiwawe yiki temaitikani tahetsiemieme 'iki xamurikaki.

⁴¹ Mipai 'utayika memayuxeirietsie kaniwaranuyeni'ani memiyehuki.

20

Papuru Matseruniyatsie meta Kiretsiyatsie kemiretia

¹ Hiki xamurika kayuwati 'utamareku, Papuru teyi'ikitiwamete yu'aurie katiniwarutani'airieni, waruparewieka memikatehayewaniki 'imatirieka warutateutiaka Matseruniya paiti kaneyani.

² Mana 'uyeikati wahetsia, kaniwatuikakaitini waikawa niukiki. 'Ariketa Kiretsiya kwieyaritsie kaneta'ani.

³ Haika metseri yuriekaku, huriyutsixi mekaniyu'enieni me'imienike kepauka Tsiriya paiti miyemieikai. 'Ayumieme

mipai katiniyumaikaitini Matseruniya pita muyeyuneki.

⁴ 'Atsiyapaiti hamatiana mekanu'uwakaitini Tsupateri wereyatanaka, 'Aritsitariku meta Tsekunitu memitetsarunikataritikai, Kayu reriwetanaka, Timuteu, Tikiku meta Tirupimu memi'atsiyataritikai.

⁵ Miki meripaiti mehekineka Tiruhatsi paiti mekatanekwewiekaitini.

⁶ Tametsi Piriputsie kanuwa 'amipatsie tekaneyekine, paa mikakuxanariyarie 'ixiarariyari 'anutiyaku. Wahetsia tekaneta'axiani Tiruhatsi paiti 'auxiwime tukari 'anukayaku. Mana 'atahuta tukari tepuyuri.

Papuru kemitiwaruteutia Tiruhatsi kiekatari wareku'iwataka

⁷ Hiki mexiakame tukari tsemanatsie tekanitakuxeirieni paa temititaraki. Papuru katiniwakuxaxatiwakaitini, 'uxa'arieka miyemiekaiki, 'ayumieme 'apireuterixi tikuxatati tikari hixiapake.

⁸ Waikawa kixemete piti'ukai kii taita haikakia heutitewakaku temiwayuxeiiekaisie.

⁹ Xewiti temaiki 'Eutiku titewati 'etsimayewa miranenieritiretsie kanayekateitini. Miki kanekakumikatiyani. Papuru waikawa tikuxatakaku, kepauka yemeki waikawa meuku, haikati kii yuheima 'a'ukametsie kaneukaweni, mikiti kaniutikweiyani.

¹⁰ Papuru 'anukayaka, temaiki hepa heyaka 'itapati, mipai kaniutayini: «Kayuwati xepikayumuinani. 'Iyarieya 'upiyeka».

11 Hikita Papuru kaneutiyani. Paa 'utitaraka, tiukwaka, mana katinikuxatakaitini waikawa. Tau 'anatinekuke kaneyani.

12 Temaiki 'ayeniereme mekanewitini kiena, waikawameki yunaiti mekaniunitiarieni.

*Kememiteheta'axia Miretu Tiruhatsi
meheyekineka*

13 Hiki tame kanuwatsie tepeki te'anuhaititiati, 'Atsunitsie tekaniye'axiani. Papuru hamatia mipai temite'uxatakaiki. Miki yu'ikama kaneta'anikekaitini.

14 Kepauka mitatsi'anukunakixi 'Atsunitsie, kanuwatsie tekaneitini, Mitirene paiti tekanekine.

15 Manata 'uxa'arieka tekanekine teheta'axianike Kiuxi hixie, 'uxa'ariekaketa Tsamutsie tepeta'axia, 'arike Turukiriyu teheta'axiaka 'uxa'arieka Miretu paiti tekaneta'axiani.

16 Papuru yapitiu'eriekairi, 'Epetsu 'aurie xekia temuyekinekekai, muixa tukari mikayurienikekaiki 'Atsiya kwieyaritsie. Kaniyumexitiakaitini xika yiwenike Kerutsareme meyeikaniki 'ixiarari 'atahutarieka tsemanatsie mieme 'aye'ayu.

17 Hiki Papuru Miretutsie 'uyeikati, 'ukirawet-sixi 'Epetsutsie memuyutixexeiriwa, katiniwaru-tani'airieni.

18 Kepauka memu'axia mipai katiniwaru-tahiawe: «Xeme xepitemate kenemitiuyeikakai xehamatia ne'uyeikati, matiari paiti nenuaka 'Atsiya kwieyaritsie.

19 Ti'aitame hetsiemieme nekatini'uximayaka tixaiti nekarayuyeitiati, ne'utatsuati,

ne'iniatsieneti, huriyutsixi kememiteyu'eniekai nehepaitsita.

²⁰ Nepikaneku'imawakai, nepinewairiyakai nemitixetahekiatianiki tita mireuyewekai, teiteri wahixie meta xekiiteta nekatinixe'ikitiakaitini.

²¹ Huriyutsixi meta kiriyekutsixi mipai nepitixehekiatiakai xetehayewame kexemiteyurie Kakaiyaritsie xemitewiyaniki, yuri xemiteta'erieniki Tati'aitiwame Ketsutsi hetsie.

²² »Hiki ne Kerutsareme nepiyemie 'Iyari wairiyarika netsipitiakaku. 'Atsinekatimaiti mana keneme'itarieni.

²³ Mipai xeikia nekatiniimaika, 'Iyari Mitiyupata mipai netihekiatiakaku naime kiekaritetsie, ke-name kaunarite meta 'uximatiarika mana netsi-hetakwewie.

²⁴ Matsi, netukari raye'akame nepika'erie nehetsiemieme. Nepinini xeikia nehiritiarika nenetemawieti, 'uximayat-sikatsie yanepitiyurieni Ti'aitame Ketsutsi keminetiuhiritia, nemitihekiatianiki niuki 'aixia manuyine hepaitsita Kakaiyari 'aixia kemitiuka'iyari.

²⁵ »Hiki ne nepitimate yunaiti xeme hatsuakuri nenierika xepikaxeiya, Kakaiyari ti'aitametikaku nehekiatati kenemutiuyeikakai xetsata.

²⁶ 'Ayumieme 'iki tukaritsie nekatinixe'utahekiatianiani ke-name ne ne'itiya, nixeime xuriyayaki nehetsie karahiwa.

²⁷ Hatsuaku nepikaneku'imawakai, nepinewairiyakai nemitixetaxatianiki naime Kakaiyari mitiutsutia.

²⁸ Xekeneyukweriwayurieka xeme,

xekeniwakweriwayurieka mikiṭa muxatsi wakimana 'Iyari Mitiyupata xehiritiariekame mixe'ayeitia, xemiwa'iwianiki miki yunaime Ti'aitame hetsia miemete memiyutixexeiriwa, miki miwarunanai yuxuriyaki.

²⁹ Netsi nekatinamaika neyemieyu 'arike 'irawetsixi xetsata mekaneutahaxiakuni teyu'uximatiwamete. Muxatsi mekani-watixitiakuni.

³⁰ Xetsatatiti mekananuku'uikuni hipati tutunimeki me'utiniuti, yu'utima memiwaranuhapaniki teyi'ikitiwamete.

³¹ 'Ayumieme xekenayeneniereni, xekena'eriwani haika wiyari tukariki tikariki kenemikatihayewakai nexeku'imaiyati yuxexuime, ne'utatsuati.

³² »Hiki xehapaitsita Kakaiyari nekanihiritiaka, niukiyarita. Miki niuki 'aixia mitiuka'iyari manuyine, miki kaniyiweni mixetseiriyani, mixepitiani xehetsie mitinakeniki yunaime Kakaiyari miwarupataxi yuhetsiemieme, miki wahetsie kemitinakeni.

³³ Ne xeime tuminieya pirataya, huruya meta 'ixurikieya nepika'ihawe'eririekai.

³⁴ Matsi xeme xekateninamaika 'iki nemamaki nepitinepitiakai tita ne nemireuyehiakai, meta nehamatia memuwakai tita memiteheuyehiakai nepitiwapitiakai.

³⁵ Ne 'ikitsika ne'ayuyeitiati nekatnix-ehekiatiakaitini mipai xete'uximayati xemiwaparewieniki miki memikatiwikawi, xeme xeme'eriwaniki Ti'aitame Ketsutsi niukieya kemutayi: "Kemi'ane ti'uximayati mitiyetua

kaniyutemawieka, kemi'ane mitimikie 'etsiwa xeikia kaniyutemawieka"».

³⁶ Hiki mipai 'utayika, Papuru 'utitunumakeka, yunaime wahamatia kaniyutanenewieni.

³⁷ Yunaiti waikawa mekaniutitsuanakaitini me'ikutapati meta me'iku'itseweti

³⁸ meyuhiwerietikaiti yemeki niukieya kemainekaiki, kename nierikaya mekax-eiyanikekai tawariri. Kanuwa 'amipatsie paiti mekaneikutuani.

21

Papuru Kerutsaremetisie kemiretia

¹ Hiki tewarutateutiaka tekanekine, heitserie te'erieti kanuwa 'amipatsie Kuhutsi paiti tekaneta'axiani, 'uxa'arieka Ruraxitsie paiti, manaketa Pataratsie paiti tekaneta'axiani.

² Mana kanuwa 'amipa 'ayeyeiximekame teka-niuxeiya Penitsiyatsie heyaka. Te'akayaxeka tenekine.

³ Tsipire kwieyari haramara hixiapa miyeka te'uxeiyaka ta'utata te'uku'eirieka, Tsiriyatsie tekaneta'axiani. Mana Tirutsie tekaniuyekine kanuwa 'amipa mana miti'ikapiyanikekaiki.

⁴ Mana teyi'ikitiwamete tekaniwaretaxeiya, 'atahuta tukari tekaniuyurieni miki wahamatia. Miki mipai Papuru mekateneye'eritiani 'Iyari mipai tiwa'ikitiakaku Kerutsareme paiti mikaye'axeniki.

⁵ Yapaimexia tukari te'uyurieka wahamatia, tekanekine ketemitehukai. Yunaiti teyu'ikitiwamete, 'ukarawetsixi meta tiri mepitatsi'uweiyakai kiekari manu'axe paiti,

mana haramara tetsita te'utitunuma'uka,
tekaniyutanenewieni,

⁶ hikita tetatateutiaxiaka, tame kanuwa
'amipatsie tekanatixaxe, mikita yukie
mekaneutayeixiani.

⁷ Tirutsie teheyekineka miki kanuwa 'amipatsie,
tawarita tekanekine, Turemaira tekaneta'axiani.
Mana tewarutawairitiaka 'iwamarixi, xeitukari
tepuuyuri wahamatia.

⁸ Tehayekineka Papuru hamatia, 'uxa'arieka
Tssetsareya tekaneta'axiani. Peripe niuki 'aixia
manuyine mukuxata hetsia tekaniu'axiani, miki
xewiti kanihikitikaitini 'atahuta meyupaimeti
memite'uximayakai.

⁹ Miki yunaukame yuniwema piwarexeiyakai
'imarixi texaxatamete.

¹⁰ Hiki yapaimexia tukari teyuriekaku, xewiti
Kureyatsie heyeyaka mana kaninuani, Kakaiyari
niukameya 'Akawu titewati.

¹¹ Tahetsia nuaka, Papuru hiiyameya
'utihurieka, yi'ikate meta yumamate
kaniuhiaxiani mipai 'utaiti:

—'Iyari Mitiyupata mipai kanaineni:
“'Iki hiiyame kutsiyarieya, huriyutsixi
Kerutsaremetisie mipai mekatenihiaxuni, miki
memikahuriyutsixi mekaniwayetuiriekuni”.

¹² Miyatete'u'enanaka, tame meta mana
kiekatari wahamatia Papuru tekani-
wawiriekaitini Kerutsareme mika'uyeyeikaniki.

¹³ Papuru mipai katatiniuta'eiya:

—¿Titayari xe'utitsuatì ne'iyari xeteweranariya?
Ne nepiha'aritsie Kerutsaremetisie nemihiiyaniki
meta nemiminiki Ti'aitame Ketsutsi hetsiemieme.

14 Yamikatinaki'eriekaiki temikununuitiwani, tekateniuhayewa mipai tete'ikihiaweti:

—Kamitsi yaketiuyini Ti'aitame kemitinake.

15 Hiki yapaimexia tukari 'utixiku tetakuha'aritiaka Kerutsaremetsie tekaneu-tiyune.

16 Hipati teyu'ikitiwamete Tsetsareya kiekatari tahamatia mepeki, miki mekatanewitini Minatsuni kie mana temukuheniki, tsipiretanaka miki tiyi'ikitiwame kanihikitikaitini matiari mieme.

Papuru Kerutsaremetsie kemitinua

17 Kepauka Kerutsaremetsie temu'axia, 'iwa-marixi mekataniutanaki'erieni meyutemamaw-ieti.

18 'Uxa'arieka Papuru tahamatia kaneyani Kakuwu metahiaweki, meta yunaiti 'ukirawetsixi mana mekaniyuxeiriekaitini.

19 Hiki warutawairitiaka, katiniwa-hekiatiakaitini naime kemitihiiritiariakai hepaitsita Kakaiyari kemitiuyuri memikahuriyutsixi watsata.

20 Miki me'u'enanaka 'aixia Kakaiyari hepaitsita mekanitiyuanekaitini. Papuru mipai mekataniutahiawe: «Neuxei ta'iwama, pekaniwaxeiyani keyupaimeti miriyari huriyutsixi yuri memite'erie, miki yunaiti yemeki 'iniari niukiyaritsie mepitewiya.

21 Hikitsiari, mipai mekatani'enanaka 'ahepaitsita, kename mipai peti'ikita Muitsexi 'iniarieya yunaiti huriyutsixi meke'iku'eirieni memikahuriyutsixi watsata memu'uwa.

Yapetiwakihaweti memika'iniairitiarieniki tūri
xitekiyaki, yuyeyaritsie yamemikatekahunikiri.

²² ¿Keriteteyurieka? Yumiireti xiari
mepiyukuxeirieni. Mepi'enanani pemunuaki.

²³ 'Ayumieme, mipai ketineuyuri
ketemimetetahiawe. 'Uwa tatsata 'ukitsi
yunaukati mepiye'uwa, paye'axime mem-
eye'atianiki kememiteyihiritiakai.

²⁴ Keniwaranuwitiki, keneu'a'itieka wahamatia,
ketineuyutua wakipa mikaxirieniki 'iniari
mayaniki hiritiarika maye'aki. Mipai petiyurieyu
yunaiti mepitehetimani kename katiyuri
kememitekihawariwa 'ahepaitsita, matsi 'iniari
niukiyaritsie yapetikamietī 'apemuyeika.

²⁵ Mikitsi memikahuriyutsixi yuri
memite'uta'eri, niuki tepiwarenī'airi tewa'aitiati
mipai 'anenemetsie yamemikatekahuniki, matsi
memika'ikwakaki tita tetexi memitexatīarie,
xuriya, tewā yukawieyu waiyarieya
meta kemi'ane mikayi'iya mikayikina
memikawakumaiwaniki».

²⁶ Hiki 'uxa'arieka Papuru miki 'ukitsi kani-
warewitini, mikita wahamatia yu'itieka tukita
kaneutahani, mipai tihekiatati kename tukari
'aye'a memuyu'itienitsie, meta miki yuxexuiti wa-
mawari piyetuiyani.

Papuru kemitiuwiyarie

²⁷ Kepaukari 'atahuta tukari 'aye'aximekaku,
huriyutsixi 'Atsiya kiekatari Papuru tukita meka-
niuxeiya. Mekaniwaruxamurieni yunaime mana
memu'uwakai meta mekaniwiya,

²⁸ mipai mete'uhiwati: «'Ixaheritsixi xeketaneu-
parewi. 'Iki tewi kanihikitini kemi'ane yunaime

teiteri naitсарие 'axamitiwa'ikitia, 'iniari niukiyari hepaitsita meta 'ena takiekaritsie. Matsi 'akuxi kiriyekutsixi 'uwa tukita kaniwaratahatiwani, 'iki 'ena ka'akupatsiekame kanayeitiani».

29 Meripaitiri Tirupimu Papuru hamatia 'uyeikame kiekaritsie mepuxeiyakai 'epetsutanaka, tukita Papuru hetawitime mepi'eriekai.

30 Yunaiti kiekatari mepuyuxamuri. Teiteri me'unautsaxiaximeti mekaniu'axiani, Papuru mekaniuwiya, mekanenuyehana tuki takwa, yapauka 'itupari meuwitsie kaneunarixiani.

31 Hiki 'ari me'imieximekaku, kepauka niuki munua xeimiriari kuyaxi tiwa'aitiwame hetsia kename yunaiti Kerutsareme kiekatari meyuxamuriekai.

32 Kwitiwa kuyaxi xeitsienituyari tewa'aitiwamete yukuyaxima mewaruwitikime piwarewiti, meta miki mana kaniutanautsa wahetsia. Kuyaxi tiwa'aitiwame me'uxeiyaka meta kuyaximama, Papuru metiwayati mekatenuhayewa.

33 'Ahurawa 'ayaka kuyaxi tiwa'aitiwame, kaniwiya meta katiniuta'aita memihianiki huta tepiayariki. Manata kaniwaruta'iwawiya kemi'ane mihikitikai meta kemitiuyuriekai.

34 Hipati yiki mekatenuhiwakaitini, hipatita yiki me'utiyuati. 'Atsimikaretimaiwekaiki meyuxamurieti kememutiyuanekai kemi'ane yuri mutainenikeyu, 'ayumieme katiniuta'aita kuyaxi wakie memenuhanaki.

35 Kepauka Papuru 'imumuitia miye'a, peuyewekai kuyaxi me'enuyewieti

memenuhanaki wai'riyarika, teiteri
memitsaipinekaiki.

³⁶ Yumiireti mekaniweiyakaitini mipai
mete'uhiwati: «Ke'umierieni».

*Papuru yuhetsiemieme teiteri wahixie
kemiutaniu*

(Ni'a 22:3-16 - Ni'a 9:1-22, 26:9-18)

³⁷ Hiki kepauka kuyaxi wakiita meheita-
hatiaximekaku, Papuru kuyaxi tiwa'aitiwame
mipai katiniuta'iwawiya:

—Pekanetipitia nemimetitaxatianiki.

Miki mipai katinita'eiya:

—'Eki kuta kiriyekutsixi waniukiki petiniuwe.

³⁸ ¿Miki 'ekipitutanaka pekatihiki meripaiti
kuya pematia, meta makumawetsie nauka
miiriyari yukukuyamete pemiwarewiti?

³⁹ Papuru mipai katinita'eiya:

—Netsi nekanihuriyutini, Tarutsu
nepinuiwakame Tsiritsiya kwieyarit-
sie nemiemeti, kiekari 'amiyewatsie
nekaniekametini. Hiki nepimatsiwawirie,
keneneupitia teiteri nemitiwataxatianiki.

⁴⁰ Kuyaxi tiwa'aitiwame 'ipitiaku, Papuru
'imumuitsie 'utiweti teiteri yumamaki
kaniwaru'iniairitani. Kepauka yunaiti
kayuwati me'utamareku, 'aramau niukiyariki
kaniutaniuni, mipai 'utaiti:

22

¹ «Neuxei 'iwamarixi meta ta'ukiyarima.
Xekeneneu'eni nehetsiemieme hiki xehixie
kenemititaniuni».

² Hiki me'i'enieka 'arameu niukiyariki tikux-atame, matsi waikawa kayuwati mepumakai.

Mipai kaniutayini:

³ «Ne nekanihuriyutini, Tarutsutsie Tsiritsiya kwieyaritsie nekanetinuiwa. Matsi 'iki kiekaritsie nekaniutawere, Kamarieri hetsia netinineta'ikitiani heitseriemeki tatutsima wa'iniari niukiyari hepaitsita, ne yemeki Kakaiyari hepaitsita nepi'itetsakai, hiki xeme hipati xemutiyuane hepai.

⁴ 'Iki huye memuweiyakai newaranukuweweyati nepiwatakukuyakai, newatihayati 'ukitsi meta 'ukari katsariyanata nepiwaranutaxuriwakai,

⁵ mawari wewiwamete tiwa'aitiwame, meta naime 'ukirawetsixi kememitehekiata. Miki menetsi'uhuritiaku xapa ta'iwama wahetsiemieme, Ramatsikutsie nekaneyani newarahapanike Kerutsaremetisie mehiatikaime kemi'ane nemiwaretaxeiya, memanutaxiriyani.

⁶ »Hiki tuka mana ne'uyemiekaku, kepauka Ramatsiku ne'aye'aximekaku, taheima mieme hekiariya ne'aurie waikawa kaniukuxawatire.

⁷ Kwiepa nekaniukaweni. Meta xeime nekanu'enieni mipai netikihaweme: "Tsauru, Tsauru titayari penetiuweiya".

⁸ Netsi mipai nekatinita'iwawiya: "¿Ti'aitame kemi'ane pepihiki?" Miki mipai kanetiniuta'eiya: "Netsi Ketsutsi natsaretitanaka nekanihikitini pemnetsi'uweiya".

⁹ Nehamatia memuwakai hekiariya me'uxeiyaka mekaniutimamani. Matsi mepika'i'eni kemi'ane minetsikihawekai.

¹⁰ Ne mipai nekatinita'iwawiya: "¿Ti'aitame

kereuyewetse yanemitiyurieniki?" Ti'aitame mipai kanetiniutahiawe: "Kenanukukexi, Ramatsikutsie kenemie. Manari yapepititahiawarieni naime kemiti'aitsie yapemitikayaniki".

¹¹ Nepitauruxiekai xawatiriyaki. Miki nehamatia memuhukai menetsi'ahanati, Ramatsikutsie mekaneni'atiani.

¹² »Hiki xewiti 'Ananiyaxi mititewa mana peyeikakai, tewi 'aixia mitikamie 'iniari niukiyaritsie. Yunaiti huriyutsixi mana memitamakai 'aixia mepite'imaikai.

¹³ Hiki nehetsia nuaka, ne'aurie 'utikeka, mipai kanetiniutahiawe: "Ne'iwa Tsauru, kenanutanieri". 'Anari kwitiwa nekananutanieri meta nehauniereti nepatia.

¹⁴ Miki mipaita kaniutayini: "Tatutsima wakakaiyari matiari paiti kamenanayexeiya yapemiretimaniki ketita mitinake, miki Heitserie mexeiya pemixeiya meta niukieya pemi'enieniki 'utaniukame.

¹⁵ 'Eki kepemitiunierixi meta kepemitiu'enaxi yunaime teiteri pekatiniwatahekiatiamiki.

¹⁶ Hikitsiari, titi 'akuxi petitakwewie? Kenanukukexi, keneuka'iwa, meta 'axapemitiuyuriki keneu'ahauxina pehehiaweti kemi'ane mihiki".

¹⁷ »Hiki Kerutsareme nenuaka, mexi'akuxi tuki kuraruyarita neyunenewiekai, heinitsi hepai 'anekame nekaniuxeiya,

¹⁸ meta Ti'aitame nekaniuxeiya mipai netikihaweme: "Kene'akumexitia, Kerutsareme kenaye'e, 'aniuki mepikatanaki'erieni nehepaitsita kepemitihekiata".

19 Netsi mipai nekatinita'eiya: "Ti'aitame, miki mekatenimaika tukiteta ne kenemititahakekai newaranutaxiriwati newatiwayati miki yuri memite'eriekai 'ahetsie,

20 meta kepauka 'Etsitewani xuriyaya mutaxiri 'ahepaitsita mitihekiaatakai, ne mana nepuwekai ne'iyari ya'aneakaku meta wa'ixurikite ne'ihiti miki memimienikekai".

21 Matsi Ti'aitame mipai kanetiniutahiawe: "Kenemie, ne 'ateewa paiti nekamenanuni'amiki memikahuriyutsixi wahetsia"».

Papuru Xumatsie kiekame

22 Hiki teiteri yumiireti Papuru mekani'eniekaitini kepaukari miki niuki mutaxa, 'ana karima meputihiwaxi mipai me'utiyuati: «Kwiepa ke'umaweni. 'Aixia pika'ane miki tewi 'ayeniereti muyeikani».

23 Me'utihiwati yu'ixuriki teiki mehewiwiwati meta tumuanari teiki mehewiwiwati,

24 kuyaxi tiwa'aitiwame katiniuta'aita Papuru kuyaxi wakiita manuhanieniki.

—Tepita'iniata 'ariwatsini 'ikuwaxiayu, yanemiretimaniki titayari miya memite'uhiwakai hepaitsitana.

25 Kepauka me'ikuhaiyakaku karena kaunariyariki, Papuru xeitsienituyari kuyaxi tiwa'aitiwame mipai katiniutahiawe mana 'utiwekaku:

—¿Xeme 'aitsikatsie xetepitarie tewi Xumatsie kiekame xemukuwaxiani 'itsikame ka'ita'iwawiyawekaku?

26 Kuyaxi xeitsienituyari tiwa'aitiwame 'u'enaka kuyaxi tiwa'aitiwame hetsia kaneyani, mipai katinitahekiatiani:

—ǂ'Ekǂ kepetiyurieni? 'Tki tewi Xumatsie kanikiekametini.

27 Kuyaxi tiwa'aitiwame Papuru hetsia kaniye'ani, mipai katinitahiawe:

—Yakenetineutahiawi, ǂ'eki Xumatsie petikiekame?

Papuru mipai kaniutayini:

—Huu, miki nepihiki.

28 Kuyaxi tiwa'aitiwame mipai katinita'eiya:

—Kariki ne waikawa netininetuani kiekame ne-mayaniki.

Papuru mipai katinitahiawe:

—Ne, matsi mana nuiwakame nekanihikitini.

29 'Ayumieme hetsiana memu'axiakai me'ita'iwawiyake yapauka mekaneutayeixiani. Kuyaxi tiwa'aitiwame yaretimaika Papuru Xumatsie mikiekametikaiki, kanimakaitini mihikaiki.

'Itsikate Papuru kememite'ita'iwawiyaxi

30 Hiki 'uxa'arieka, kuyaxi tiwa'aitiwame heitseriemeki katinimaimikikaitini ketitayari huriyutsixi memiteniukixiekai Papuru hepaitsita. Kanixina meta katiniuta'aita memiyukuxeirieniki mawari wewiwamete memitewa'aitia meta 'itsikate yunaiti. Hiki mana wahixie Papuru kani'atiani.

23

1 Hiki Papuru 'itsikate waxeiyati, mipai kaniutayini:

—Ne'iwamarixi, ne'iyari 'aixia 'anekaku kanetsi'utate'akaku Kakaiyari hixie nekani- uyeikani meripaiti hiki 'akuxi.

² Hiki 'Ananiyaxi mawari wewiwamete tiwa'aitiwame miki 'auriena 'ahurawa memiti'ukai katiniwaruta'aitiani teniena memitawaniki.

³ Hiki Papuru mipai katinitahiawe:

—Kakaiyari 'ekita pimatsiwani, yaki xeikia pepiti'aitame. 'Eki 'apekanakani 'aitsika kemikahaine peti'aitati nemukuweiyaxianiki.

⁴ Papuru 'aurie memuti'ukai mipai mekaniu- tiyuani:

—Peti'awairi 'aku 'eki Kakaiyari mawari wewi- wamete tiwa'aitiwame pemitatieniki.

⁵ Papuru mipai kaniutayini:

—Ne'iwama, 'atsinepikatimaikai mawari wewiwamete tiwa'aitiwame hikitime nepika'eriekai. 'Ayumieme mipai pire'uxa: “Axapepikarenutahiaweni teiteri wahet- siemieme manuyeka”.

⁶ Hiki Papuru timaiti hixiata me'ati tsarutseut- sixi memihikitikai meta hixiata me'ati paritseut- sixi memihikitikai, 'itsikate wahixie mipai katini- uhiwa:

—Ne'iwamarixi ne paritseu nekanihikitini. Xepinetsixaneta nemita'ikwewaki yuri nemiti'erieki mikite kememite'anuku'uitiarieni hepaitsita.

⁷ Mexi 'akuxi 'utaniuka, paritseutsixi meta tsarutseutsixi mekaniyutiniukimatikine, mana memuyuxeirikai hixiata mekaniyutsana.

⁸ (Tsarutseutsixi mipai meputiyuane kename mikite meka'anuku'uni, niuki tuayamete meta

'iyarite tixaiti mekatehiki, matsi paritseutsixi mipai mekatenimaika 'iki naimeki).

⁹ Hiki waikawameki mekaniuyuxamirieni, hiki hipati 'iniariki memite'ikitametetikai paritseut-sixi me'anuku'uka, mipai mekaniutiyuani: «Tame tixaiti tepikate'ukaxe 'axati'aneame 'iki tewi hepaitsita. Xiaritsi 'iyari kanitahiawe yanutsutini niuki tuayame».

¹⁰ Waikawari meha'akaku, kuyaxi tiwa'aitiwame kanimakaitini kapa Papuru me'umieniki. Hiki kuyaxi katiniwaruta'aitiani wairiyarika me'ipitiat memenuhanaki, kuyaxi wakiita.

¹¹ 'Uxa'arieka yiwikita Ti'aitame Papuru 'auriena kaniuyuhekiata mipai katini-tahiawe: «Pepikamaka. Kerutsaremetisie kepeminetihekiataakai, kaneuyewekata Xumatsie mipai peminetihekiataniki».

Papuru kememitemienikekai

¹² Hiki tau 'anatineku, huriyutsixi hipati mekaniyu'enieni. Mekaniyuhiritiani mipai me'utiyuati: «Tepikatekwani meta tepika'anuhareni kepaukake Papuru temimieni».

¹³ Huta tewiyari meyupaimeti mipai mekateniyihiritiakaitini.

¹⁴ Mawari wewiwamete memihiritiariekai wahetsia meta 'ukirawetsixi wahetsia me'u'axiaka mipai mekateniwarutahiawe:

—Tame mipai tepitetahiritia, tixaiti tepikatekwaka Papuru temiemeke.

¹⁵ Hiki 'ayumieme xeme 'itsikate wahamatia yaxeketeneutahiawi kuyaxi tiwa'aitiwame xehetsia mewitiniki, 'aixia 'anemeki matsi

xemitehetimaniki hepaitsitana. Tame kanuawekaku 'akuxi tekaniyuha'aritiaka huyeta temeimieniki.

¹⁶ Hiki Papuru matsuya kaniu'ena kememite'imienikekai. Mana nuaka kuyaxi wakiita heutahaka, Papuru katiniutaxatiani.

¹⁷ Papuru yu'aurie xeime 'utakwewieka xeitsienituyari kuyaxi tewa'aitiwamete, mipai katinitahawe:

—'Iki temaiki kuyaxi tiwa'aitiwame hetsia kenanuwitiki. Miki pirayexeiya mireitaxatiani.

¹⁸ Miki kuyaxi tiwa'aitiwame hetsia kaneiwitini. Mipaita katinitahawe:

—Papuru manutahiya yu'aurie netsi'utahiaweka pinetsi'utawawiri 'ahixie 'iki temaiki nemi'atiani. Pirayexeiya 'ahamatia.

¹⁹ Kuyaxi tiwa'aitiwame temaiki mamayatsie tiwiereka, yihikiate yateewa mehekineka mipai katinita'iwawiya:

—¿Ketita kuta perayexeiya?

²⁰ Miki mipai kaniutayini:

—Huriyutsixi mepitehekuxata, memet-sitawawirienike 'uxa'a Papuru pemanuwitini 'itsikate wahetsia, yemeki memitemaikaki hepaitsitana.

²¹ 'Eki miki pepikawa'enieka, huta tewiyari meyupaimeti teiteri wahetsia miemete mepikwewie, mipai meteyihiritiati memikatekwakaki meta memikaharekaki me'imiemeke. Hiki mekaniyuha'aritiaka mematsikwewieti pemi'awairiyaki.

²² Hiki kuyaxi tiwa'aitiwame temaiki kaneni'ani mipai re'imaiyati:

—Xeime tīma pepikaraxaxatīwani 'iki hepaitsita
kepeminetiutaxatīa.

*Papuru Perixi kuwexinaruri hetsia
kemireni'arie*

²³ Hiki kuyaxi tiwa'aitiawame xeitsienituyari
kuyaxi tewa'aitiwamete yuhutame yu'aurie
warutahiaweka, mipai katiniwaruta'aitiani:

—Huta tsienituyari kuyaxi xekeni-
warukuha'aritīa, kawayutsixi wahetsie
memauiyaxiawawe haika tewiyari heimana
tamamata, meta huta tsienituyari tepiaki
memiteheutamīiwawe Tsetsareyatsie
memiyehuki tikariki 'atanauka hurayari 'aye'ayu.

²⁴ Kawayutsixi xekeniwaranuhapani, Papuru
manutiyerīniki 'aixia reu'erietī meta'aniki Perixi
kuwexinaruri hetsia.

²⁵ Meta xapatsie mipai katineka'utirieni:

²⁶ Ne Kirauriyu Ritsiyaxi,

kuwexinaruri pemitirīkaiye Perixi:

Nepimatsiwairitīa.

²⁷ 'Iki tewi huriyutsixi mekaniwiya, 'ari
mekanimienikekaitini, ne nekuyaxima
wahamatīa hetsiena nekaniutanuani, mipai
nemiretimaikaiki Xumatsie mikiekameki.

²⁸ Ne nepitimaimikikai titayari
memiteniukixiekai hepaitsitana, nekaneiwitini
huriyutsixi wa'itsikate wahetsia.

²⁹ Nepiwaretaxei meniukixiekame kemaine
wa'aitsika hepaitsita. Tixaiti 'atsipikati'anekai

hetsiena mirahiawani mimierieniki meta manu-
tahiyaniki.

³⁰ Mipai netiutahiawarieka 'iki tewi
memimienikekaiki, kwitiwa nekaneini'ani
'ahetsia. Nepitiwaruta'aitia miki hepaitsitana
meminiukixie 'ahixie memitahiaweki. Mipai
xeikia.

³¹ Hiki kuyaxi kememite'uta'aitiariakai, Papuru
yiwikita mekanewitini 'Anutipatiritsie paiti.

³² 'Uxa'arieka kawayutsixi wahetsie memutei
mekaniwaruku'eirieni miki hamatiana
memiyehuki, kuyaxi yi'ikama memuhukai yukiita
mekanakunuaxiani.

³³ Kepauka Tsetsareya paiti memuta'axia,
kuwexinaruri xapa mekaniyetuirieni meta
Papuru mekaniyetuani.

³⁴ Perixi xapa 'akateriwaka, Papuru
kaniuta'iwawiya kemi'ane kwieyaritsie
mimiemetikai. Retimaika Tsiritsiyatsie
miekemetikaiki,

³⁵ mipai katinitahiawe: «Kamitsi,
nepimatsi'enieni me'axiayu miki 'ahepaitsita
meminiukixie». Katiniuta'aita Herurexi
paratsiyuyata me'iwiyariekaki.

24

Papuru Perixi hixie yuhetsiemieme kemitiutaniu

¹ Hiki 'auxiwi tukari 'anukamiekaku, mawari
wewiwamete tiwa'aitiwame 'Ananiyaxi
mititewa mana kaninuani, hipame 'ukirawetsixi
wahamatia meta xewiti Terituru titewati
miniukametikai mekanu'axiani. Kuwexinaruri
hetsia memitetaxataki Papuru hepaitsita.

² Kepauka mīxanetsie wahetsia mī'atīarie, Ter-
ituru kanitsutiani 'ixanetati Perixi hixie, mipai
'utaiti:

—'Eki Pemīmariwe pekatanipitiaka, timaiweme
pemihikiki waikawa pekataniheitseritiaka
tateiterima tahetsiemieme.

³ Neuxei Perixi pemitirikaiye, naitsarie kwiepa
pekanimariwani naime 'aixia kepemitiyuriene.

⁴ Matsi pemikawairipiekaki waikawa
niukiki, 'ayumieme nepimetsiwawirie
pemitatsi'enieniki 'etsiwa tepimatetaxatiani 'aixia
kepemitiuka'iyariki.

⁵ 'Iki tewi tekanetaxeiya yunaime huriyutsixi
waxamurieneme naitsarie kwiepa. Natsareti-
tanaka hetsie memitewiya katiniwa'aitiwametini.

⁶ Meta tukita kaneutahakekaitini ka'itiyakame
'ayeitiati, 'ayumieme tekaniwiya.

⁷ Matsi Ritsiyaxi nuaka kuyaxi tiwa'aitiwame
mihiki, wairiyarika kataniunawairieni.

⁸ Katatineta'aitiani tame hepaitsitana
teminiukixie 'ahetsia temahuki. 'Ekita
pe'ita'iwawiyame pekaniyiweni pemiretimani
naime ketemiteniukixie hepaitsitana.

⁹ Meta huriyutsixi mekaniniukimakaitini, mipai
me'utiyuati kename naiti tiyuritikai.

¹⁰ Kepauka kuwexinaruri yumu'uki
'i'iniaritiaku mitaniuniki, Papuru mipai
kaniutayini:

—Yanetimaiti 'eki mīxa wiyari kepemitiuyuri
'ena 'iki teiteri wakuwexinaruri pehikiti, 'ayu-
mieme 'aixia 'iyariki nehetsiemieme nepitaniuni
kemitikuxaxatsiwa nehapaitsita.

11 'Eki pekaniyiweni pemitimaikaki, tamamata heimana huta tukari pika'anukayeawe 'akuxi kepauka Kerutsaremetsie nemeutiyunixi neyutanenewienike.

12 Netsixanetamete tukita mepikanetsi'utaxe 'axanetikuxatame, tukite 'etsimipepeta meta xaitsie kiekaritsie.

13 Mepikayiwawe memitseiriyani yuniuki kememiteniukixie nehapaitsita hiki.

14 Mipai nepimatitahekiatianikeyu: ne 'iki huye ne'uweiyati nepiti'uximaya tatutsima wakakayari hetsiemieme, tsepaneti netsixanetamete 'iki huye xaitsie tiwiyakame memixata, yanepira'eriwa 'iniari niukiyari kemiti'ikita meta yuri nepiti'erie naiti kemiraka'utiarie Kakaiyari niukametemama waxapayaritsie.

15 Kakaiyari hetsie nepita'ikwewa 'iki teiteri kememiteta'ikwewa wahepai, kename me'anuku'uitarieni yamemitekahu meta yamemikatekahu.

16 'Iki naima hepaitsita yanekatiniyurieneni ne'iyari kanetsi'utate'akaku, Kakaiyari hixie meta teiteri wahepaitsita.

17 »Hiki ne tumini nekaniuxeirieni neteiterima Kerutsareme kiekatari wahetsiemieme, yapaimexia wiyari mipai nekatiniiyurienekaitini. Manaketa 'imikieri ne'a'iti nekaninuani.

18 'Itiya mawariyari newewiekaku hipati huriyutsixi 'atsiyatari mekanenetaxeiya tukita. Yumiireti teiteri 'amepika'u'uwakai ne'aurie, nepikawaxamuriekai.

19 Meminetsi'uxei hipati huriyutsixi 'Atsiya kiekatari mepiyiakai, neuyeweka

miki memi'axiani 'ahixie, meta peuyewetse yamemitiyuaniki kememinetexaneta, xikatsi nehetsiemieme mete'ayexeiyani.

²⁰ Hikitsi, 'ena yameke'utiyuaneni tita memite'ukaxei nehetsie mikatiheitserie kepauka ne 'itsikate wahixie nemuwekai,

²¹ tita memite'ukaxei xeime neniukitsie karima ne'utaniuku miki wahixie mipai ne'utaiti: "Mikite memanuku'uni mipai yuri nemiti'erieki, 'ayumieme mikiki hiki xehixie nekanixeiriyaka"».

²² Hiki Perixi heitseriemeki katinimaikaitini miki huye hepaitsita. 'Ayumieme mipai katini-waruta'eiya:

—Ritsiyaxi kuyaxi tiwa'aitiwame nuayuke, xeniuki hepaitsita yanepitixetahiawe.

²³ Xeitsienituyari kuyaxi tiwa'aitiwame kaniuhiritiani mi'iwiyaniki, matsitsiere kanihiritiani mipitiakaki yu'iwama wahamatia muyeikaniki meta miki memiparewiekaki tita mireuyehiwaki.

²⁴ Hiki yapaimexia tukari 'anukayaku, Perixi yi'iya hamatia Rutsira huriyu tewiyari mihikitikai mana nuaka. Papuru yu'aurie kaniutakwewieni, meta kani'enieni tikuxatame yuri kemiti'erie Kiritsitu Ketsutsi hetsie.

²⁵ Tikuxatakaku tita mitiheitserie hepaitsita, tewi kemitiyini'a hepaitsita meta tewi kemitita'iwawiyarieni 'uxa'atiniwarie, Perixi kaniutimani, mipai katinitahiawe: «Hikiri mipai xeikia kenemie. Kepaukaketa tukari nemihika nepimatitani'airieni».

²⁶ Perixi kanita'ikwewakaitini Papuru tumini 'i'ititanike 'erieti. 'Ayumieme miixa yu'aurie pitakwekwewiwakai, tikuxatati hamatiana.

²⁷ Huta wiyari 'anuyeyaku Perixi kaniuyupata, Purutsiyu Petsitu kuwexinaruri kanayani. Perixi huriyutsixi wanaki'atsitiamiti, 'ayumieme Papuru katsariyanata kananutahiani.

25

Papuru Tsetsaxi hamatia kemitiutaxa

¹ Hiki Petsitu nuaka hakewa mehiritiariakai, hairieka tukari 'aye'aku, Tsetsareya heyeyaka Kerutsaremetsie kaninuani.

² Mawari wewiwamete tewa'aitiwamete meta huriyutsixi wa'ukiyarima hixiena mekanu'axiani metehekiatati Papuru hepaitisita.

³ Mekanitawawirieni mipai me'utiyuati: «'Aixia petiuka'iyariti Kerutsaremetsie Papuru kenanuni'a». Mikiri yamepite'uxataakai huyeta kememite'imienikekai.

⁴ Petsitu mipai katiniuta'ani: «Papuru Tsetsareya paiti kananutahiyyaka, ne yareutewiti mana nepiyemie.

⁵ Xetsata miemete memanuyetei nehamatia mekehekine, miki yamekehetiyuani hepaitsitana, xikatsi kwinimieme 'axatiuyurieni».

⁶ Miixa pika'uyuri huriyutsixi watsata 'uyeikati, 'atahaika tukari yatini tamamata tukari xeikia puyuri. Manaketa Tsetsareyatsie kaneyani. 'Uxa'arieka mirewa'aitatsie, Papuru mi'atiariseniki katiniuta'aita.

7 Mana miki nuaku 'auriena mekaniyukuxeirieni huriyutsixi, Kerutsaremet-sie memakanexia, waikawa tirikawimeki 'axamekaniutiyuanekaitini meminiukixieniki hepaitsitana. Mepiyutatexi tixai mepikate'ukaxei yuniukiki.

8 Papuru yuhetsie nuati mipai kaniutayini:

—'Atsinepikatiuyuri 'axati'anemeki huriyutsixi wa'iniari niukiyari hepaitsita, watuki meta Tsetsaxi hepaitsita.

9 Petsitu wanaki'aritamiti huriyutsixi Papuru mipai katiniuta'eiya:

—¿Peti'awairiya Kerutsareme pemiyemie mana pemita'iwawiyarieniki nehixie 'iki xanetsika hepaitsita?

10 Papuru mipai kaniutayini:

—Ne Tsetsaxi 'uwenieya hixie nekaniuweni nemita'iwawiyarieniki. Mana xeikia temita'iwawiyarieniki xika 'axanetiuyurieni. 'Axanepikawaruyuri huriyutsixi, heitseriemeki 'eki kepemitimate.

11 'Axa xika netiuyurienike, tixai xika netiuyurienike kemireuyewetse nemiminiki, nepikaneku'imawa nemiminiki. Metsi xika katiyuritini 'iki kememiteniukixie nehapaitsita, xewiti pikayiwe miki wahetsia minetsiyetuaniki wanaki'aritamiti. Tsetsaxi hixie nekanitaniumiki.

12 Hiki Petsitu 'imawamete wahamatia tiutax-ataka meri mipai katinita'eiya:

—Tsetsaxi hetsia 'aku petimie. Hiki, Tsetsaxi hetsia pekaniyemieni.

Papuru 'Akiripa meta Werenitse wahixie kemiti'atarie

¹³ Hiki miixa tukari 'anukayaku, kwiepa ti'aitame 'Akiripa mititewa meta Werenitse hamatia Petsitu Tsetsareya paiti mekaneiku'iwata.

¹⁴ Yapaimexia tukari mana mepuyuri. Petsitu ti'aitame katinikuxaxatiwakaitini Papuru hepaitsita, mipai 'utaiti:

—Xewiti tewi 'uwa puku'eiriwaxi Perixi menu-tahia.

¹⁵ Kerutsaremetsie neheta'aku, hepaitsitana mekatenuatahekiata mawari wewiwamete memihiritiari, huriyutsixi wa'ukiyarima, menetsiwawiriet i manutahiyaniki.

¹⁶ Netsi mipai nekatiniwaruta'eiya, xumataritayeiyari mipai pika'ane, tewi tepika'iyetuan, hixiena meka'axiawawekaku 'akuxi miki hepaitsitana meminiukixie, kayiwekaku 'akuxi yuhetsiememe mitaniuni waniukixiya hepaitsita.

¹⁷ 'Uwa me'u'axiaku, 'ayumieme 'anepikareuterixi. 'Uxa'arieka 'itsikame 'uwenieyatsie nemira'aitatsie ne'ayerika, nekatiniuta'aita miki tewi mi'atarieniki.

¹⁸ Me'anuku'uka memitiniuniki, 'ixanetamete tixaiti 'axati'aneame mepikate'ukaxei hetsiena, ne kenemitita'ikwewakai.

¹⁹ Matsi xeikia niuki mekanixiatikaitini tita memite'ayexeiya hepaitsita xeime Ketsutsi mimikikai hepaitsita, Papuru 'ayeniereme mixataki, mikiki pita mekaniniukixiekaitini hepaitsitana.

20 Netsi 'atsinepikati maikai 'iki niuki hepaitsita. 'Ayumieme mipai nekatinitahiawe, Ɂpeti'awairiya Kerutsaremetsie pemiymie mana pemeta'iwawiyarieniki 'iki hepaitsita?

21 Papuru kaneniutawawirieni nemi'iwianiki, ti'aitame 'Aukutsitu mi'enienike. 'Ayumieme nekatiniwaruta'aitiani memi'iwianiki Tsetsaxi hetsia Xumatsie ne'enuni'ayuke.

22 'Akiripa Petsitu mipai katiniutahiawe:

—Netatsiere miki tewi nekani'eniemiki.

Petsitu mipai kaniutayini:

—Kariki 'eki 'uxa'a pekani'eniemiki.

Papuru yuhetsiemieme 'Akiripa hixie kemitiutaniu

(Ni'a 26:12-18 - Ni'a 9:3-8, 22:6-11)

23 'Uxa'arieka 'Akiripa Werenitse hamatia mekaniu'axiani 'aixia mete'uyukemaritiaka mariwemek. Mana mirayutixexeiritire mekaneutahaxiani xeimiriya kuyaxi tewa'aitiwamete wahamatia, meta kiekatari memimatiwa wahamatia. Petsitu katiniuta'aita Papuru mawitikieniki.

24 Hiki Petsitu mipai kaniutayini:

—Ti'aitame 'Akiripa, meta xeme yunaiti tahamatia xemuyuxeirie, manari 'iki tewi xekanixeyani kemi'ane hepaitsita wairiyarika xeminctsi'upitia yunaiti teiteri huriyutsixi Kerutsaremetsie, mipai mete'uhiwati kename 'aixia ka'ane mayeniereni.

25 Ne tixaiti nepikatiukaxei kemitiuyuri kemireuyewetse mimierieniki. Mikitsi 'Aukutsitu yamitiutahiawixiki, ne yanepitimaikai Xuma nemenuni'aniki.

26 Niuki miheitserie nepikahexeiya ti'aitame nemititi'utirieniki. 'Ayumieme nekani'atiani xehetsia, meta 'ahetsia ti'aitame 'Akiripa, pe'ita'iwawiyame tixaiti nemirexeiyaniki nemititi'utianiki.

27 Timaiweme hepai nepikayinikayu xika xeime neheni'anike hiakame, nekatihekiatati ketitaki mitiniukimarie.

26

1 Hiki 'Akiripa Papuru mipai katiniutahiawe:

—Pekanipitiarieka 'ahetsiemieme pemitaniiuniki.

Papuru yumamaki waru'iniiaritiaka mipai kani-utayini:

2 —Neuxei ti'aitame 'Akiripa, nepinetemawie 'ahixie nemitaniiuniki hiki naime huriyutsixi kememiteniukima hepaitsita.

3 Huriyutsixi naime wayeyari meta miki niuki kememitexiatia pekatiniimaika. 'Ayumieme nepimatsiwawirie peminetsi'enieniki petinewieti.

4 »Yunaiti huriyutsixi mekateniimaika kenemitiuyeikakai nunutsiyari, neteiterima watsata temaikiyari paiti meta Kerutsaremetsie.

5 Miki matiari paiti meminetsiimaikai xika metehekiatanike, miki mipai mekaniutiuyanenikayu ne kenemitikuyeikakai paritseutsixi wahetsie netiwiyati. Paritseutsixi tita temitehayexeyatsie yemeki yamepitekahu.

6 Hiki nepixanetsie yuri neti'erieti kenemitita'ikwewa meta Kakaiyari tatutsima kemitiwarutahiawekai meye'atianiiki.

⁷ Yunaiti tateiterima tamamata heimana huta nuiwarite temihiki tukariki meta tikariki 'uxi-mayatsikaya te'eyexeiyati kwini mieme tenitak-wewieka Kakaiyari. Neuxei ti'aitame, ne yuri kenemiti'erie mipai netita'ikwewati, 'ayumieme huriyutsixi nehepaitsita mepiniukixie.

⁸ ¿Ketitayari xeme xekateyiwawe yuri xemite'erieka kename Kakaiyari mikite waranuku'uitiani?

⁹ »Neri heuyewekame nepi'eriekai waikawa 'axanemiyurieniki kemiane Ketsutsi natsaretitanaka mihiki.

¹⁰ Mipai yaxeikia nekatiniyurienekaitini Kerut-saremetsie. Yumiireme Kakaiyari teiterimama katsariyanata nepiwaranutaxiriwakai, mawari wewiwamete memihiritiari heitserie menetsi'upitiaku. Ne yanera'eriwakaku mepitakwikwiwakai.

¹¹ Naime tukiteta miixa nepiwaranutaxiriwakai, wairiyarika nepiwapitiakai 'axamemitiyuaniki Ketsutsi hepaitsita. Waikawa newahekati nekaniwataweweyakaitini hipame kiekaritetsie.

¹² »Hiki mawari wewiwamete tewa'aitiwamete heitserie menetsi'upitiaku kememitehiritiariakai Ramatsikutsie nekaneyani.

¹³ Hiki tuka mana ne'uyemiekaku, neuxei ti'aitame, mexi'akuxi huyeta ne'uyemieti nekanixeiya hekariya taheima mieme, tau reuyeta tixawatime ne'aurie kaniukuhekiare meta nehamatia memuhukai.

¹⁴ Tanaiti kwiepa tepatixiri, meta ne xeime nepi'eni mipai netikihaweme 'arameutsixi waniukiki: "Tsauro, Tsauro, ¿ketitayari penetiuweiya?" Pepitiuka'eniwa

pemika'awariyaki, pemit'i'amemiwaki
pe'angatseiwati titsewemeki.

¹⁵ Netsi mipai nekatinita'iwawiya: “¿Ti'aitame kepepi'paiki?” Ti'aitame mipai katinita'eiya: “Netsi Ketsutsi nekanihikitini peminetsi'uweiya.

¹⁶ Hikiri kenanukukexi, meta keneneu'eni. 'Ayumieme hiki nepinehekiataxi 'ahixie, pem-anayexeyarieki ti'uximayatame pemayaniki, meta pemitihekiataniki nehetsiemieme kepeminetiuxei meta kenemimatitahekiatiani 'akuxi.

¹⁷ 'Ateiterima watsata nepimatsixina meta memikahuriyutsixi watsata, nekamena-nuni'amiki

¹⁸ meheuneniereti memakineki, yiriya meku'eirieme hekariyatsie memitewiyaniki, kauyumarie tirikariyaya meku'eirieme Kakaiyari hetsie memitewiyaniki, tita 'axamemiteyurie memiteheuyehiwiyarieniki nehetsie yuri mete'erieti, wahetsie mitinakeniki tita memitetanaki'erieni miki nemiwarupataxi nehetsiemieme”.

¹⁹ »Neuxeitsi ti'aitame 'Akiripa, yanetikamieti nepatia kenemitixei taheima mieme.

²⁰ Nekanitsutiani Ramatsiku kiekatari wahetsia meri, kwitiwa Kerutsareme meta naitсарie Kureya kwieyaritsie, yaxeikiata memikahuriyutsi watsata nekatiniwa-hekiatiakaitini memitehayewaniki 'axake-memiteyurie Kakaiyari hetsie memitewiyaniki, yameteyurieti kememite'uhayewaxi wahetsie mimatsiikiniki.

²¹ 'Ayumieme mikiki huriyutsixi tukita menetsi'uwiyaka meta mekanenimiekukaitini.

²² Matsi Kakaiyari kaneniparewieka hiki 'akuxi, mipai nekatiniyuwaiyiani netiwahekiatiati teiteri 'ukirawetsixi meta tiiri yunaime. Kakaiyari niukametemama meta Muitsexi kememutiyua yamitiyinikekaiki:

²³ Kiritsitu mitikwineki heuyewekai, kename miki meri 'anukukeka mikite watsata, watahekiatianikekai yuteiterima meta memikahuriyutsixi hekariya hepaitsita».

²⁴ Merikitsi Papuru mipai 'utayiku yuhetsie nuati, Petsitu karima mipai katinitahiawe:

—Papuru pepika'uka'iyariri. Waikawa 'ikitiarikaki pimatsiheuyehia.

²⁵ Papuru mipai katinita'eiya:

—Matsi ne 'aixia nepitinekihiawe Petsitu pemariwe. Kenemitikuxata kaniyuritini meta timaiweme niukieya pihiki.

²⁶ Ti'aitame 'iki naime pitimate, 'ayumieme nekamati yanekatinikuxatani. 'Iki kenemitikuxata hikike pikamieme, 'awie pikatiuxatsie.

²⁷ Neuxei ti'aitame 'Akiripa, ¿'eki yuri peti'erie Kakaiyari niukametemama waniukitsie? Ne nekatinimaika yuri pekatini'erieka.

²⁸ 'Akiripa Papuru mipai katiniutahiawe:

—'Ariri Kiritsitiyanu penerayeitianikeyu.

²⁹ Papuru mipai katinitahiawe:

—Kakaiyari nenewieri nepupitia, tsepa 'etsimitipaime yatini mitiwaikawa, 'ekiri meta yunaiti xeminetsi'enie hiki, xikatima nehepai xe'aneneti xehakineke, 'iki tepia xeikia xekahexeyati kimana nemihia.

³⁰ Hikī mīpai 'utayiku, ti'aitame kananukekeni meta kuwexinaruri, Werenitse meta wahamatia mematekai mekananuku'uni.

³¹ Me'anuyekineka yunaiti yamekateniyikihawekaitini mīpai me'utiyuati:

—'Iki tewi 'atsipikatiuyuri pikaheuyewetse mimieriniki meta manutahiyaniki.

³² 'Akiripa Petsitu mīpai katiniutahiawe:

—'Iki tewi piyiwenikeyu mixinarieni, xika Tset-saxi ka'utahiaweke xeikia.

27

Papuru Xumatsie kemireni'arie

¹ Merikitsi kepauka Petsitu yamitiuyuma temiyehuki kanuwa 'amīpa 'Itariya paiti, Papuru meta hipati pīretsutsixi wahamatia mekaniyetuiyani. Xeitsienituyari kuyaxi tiwa'aitiwame Kuriyu mititewakai hetsia, 'Aukutsitu kuyaximama miwara'iniekai.

² Kanuwa 'amīpa 'Aruramitiyu pīmiemetikai. 'Atsiya kwieyaritsie tetsita kaniuyeyeikakaitini. Mana te'akayaxeka tekanekine. Tahamatiata kaneyani 'Aritsitariku tetsarunika kiekame Mat-seruniya kwieyaritsie mīmiemetikai.

³ 'Uxa'arieka Tsiruni tekaneta'axiani. Kuriyu Papuru waikawa naki'erieti. Kanipitiani yuhamikuma wahetsia meta'aniki miki memiparewiekaki.

⁴ Tsiruni temiyeki, Tsipire warita tekaniuyekine tahepa meuye'ekakaiki.

⁵ Haramara 'utia tekaniuyekine Tsiritsiya meta Pamīpiriya. Mana tekaneta'axiani Mira Ritsiya kwieyaritsie.

⁶ Xeitsienituyari kuyaxi tiwa'aitiwame kanuwa 'amipa mana kaniuxeiya 'Arekanitiriya mieme 'Itariyatsie miyemieka, mikitsie tekaneutiyaxe.

⁷ Miixa tukari mana tepuhukai tepika'ayekiniwawekai. Haweri mieme tekaneta'axiani Kiniru hixie. 'Eka mikatatsipitiakaiki, mana teyekineka. Kireta hetia tekaniuyehukaitini, hiri manukaniere Tsarimuna mirakutewa 'aurie tekaniuyekine.

⁸ Mana haweri mieme xeikia tekananuyenexiani, 'ariketa hatetsita 'Aixia Mitiuku'ane mirakutewatsie tekaneta'axiani. Mana Ratseyakiekariyari kanehurakaitini.

⁹ Hiki miixa tukari tekaneuyehiani, kanuwa 'amipa kanikweriwa'anekaitini, manutiyakaiki huriyutsixi wahakiya. Papuru mipai katiwaraye'eritiani, mipai tiwakihaweti:

¹⁰ «Neuxei, mipai nepitimate, xika te'uhuni kanuwa 'amipatsie meta xe'ikate pireuyeweni, meta tame tepitatimaiyarieni».

¹¹ Xeitsienituyari tiwa'aitiwame Papuru kemainekai pika'u'eni, matsi pita kanuwa 'amipa mikuyuitiwa meta kanuwa kutsiyarieya kaniwaru'enieni.

¹² Mirati'ikapiwa pikuhahautirekai. 'Ayumieme yumireti mepuyu'eni memiyehuki, Penitse paiti memiye'axianiki, mana memititeniki muhaititsie. Penitsi katinakutewaka hake mirati'ikapiwa Kiretatsie, tatsutia meta ta'utata paye'eka tahapa.

*Wiyeri mitirikaiye hamaratsie
kemitwarutayuitiwakai*

¹³ Hiki tatsutia hepatsie 'eka kanatini ketemitehu, kememiteku'eriwakai

tiu'ekame mepi'eriekai. Kanuwa mukuhana me'atatihanaka mekanekine, Kireta 'aurie mekaniuyekine.

¹⁴ Yareutewikaku karima 'eka pitsutia tirikaiyeti, Tayeta Mieme titewati, kwie 'esimiyewatsie paiti mayene.

¹⁵ Hiki kanuwa 'amipa pikayiwekai 'ekaki, tepikayiwawekai temuhuniki tahepa maye'ekakaiki, te'ihayewaku 'eka mitirikaiye katane'enitsitiani.

¹⁶ Kwie hapa miyema hetia Kiraura mirakutewa tekanakunexiani, haweri mieme xeikia kanuwa 'etsimipe temiwiwaki tepiyiwawekai.

¹⁷ Me'enatihanaka mekanenakahiaxiani kaunariki mitatseireki. Mekanimamakaitini Tsirite xiekariyarsie mete'utawaxianiki, mitikuhapatika mekaxirieka, mipai me'aneti kanuwa 'amipatsie mekaniu'enixiaximekaitini.

¹⁸ Witari yemeki pitatsi'utayuitiwakai. 'Uxa'arieka yu'ika kanuwatsie mekana-natixirieni.

¹⁹ Hairieka tukaritsie tamamaki kanuwa 'amipa piiniteya tekatenanatixirieni.

²⁰ Miixa tukari tau meta xurawetsixi tepikawaruxei, witari tirikaiyeti pikatihayewakai, kataneuyexirieni ketemiteta'ikwewakai temitawikweniki.

²¹ Hiki miixa tukariri tekatekwakaku, 'ana Papuru wahixiapa 'utakeka mipai kaniutayini: «Neuxei, xika xenetsi'u'enienike yanemainekaitsie Kiretatsie temikaheyekineki, mipai hiki tepikateheuyehianikekai meta tepikate'uka'eniwanikekai.

22 Hikitsiari nekaxenaye'eritiwani xemu-yuwai-riyaniki, xewiti xeme yutukari pikatatimaiya, kanuwa 'amipa xeikia tepitatimaiya.

23 Tikariki Kakaiyari niukieya tuayame kaneyuhekiata nehixie kemi'ane hetsie nemitiwiya meta nemiti'uximayatsirie,

24 mipai kanetiniutahiawe: "Papuru, pepikamaka. Kaneuyeweka Tsetsaxi hixie pemitakeniki, meta Kakaiyari pimatsi'upitia watukari yunaima 'ahamatia memuhu kanuwa 'amipatsie".

25 'Ayumieme nepaine, xekeneyuwai-riyani. Kakaiyari hetsie ne yuri nepiti'erie mipai mitiyiniki kenemitiutahiawarie.

26 Matsi xeikia tame kwie hapa miyematsie tepitixiriyani».

Kanuwa 'amipa kemitiuta'unixi

27 Hiki tamamata heimana nauka tikariyari 'anukamiekaku 'eka mitirikaiye, haramara 'Aruriyatiku mirakutewa hepa katane'enitsitiani, tikari hixiapa kanuwa ni'awamete kwiepa heukahurame mepi'eriekai.

28 Kaunari hapa mekaneukawiwieni, mekaniti'iniata xeitewiyari heimana tamamata heimana 'atahuta meturuyari kaneukatewakaitini. Yame'ahuti hutariekata mekaneikawiwieni, xeitewiyari heimana 'atahuta meturuyari kaneukatewakaitini.

29 Mekanimamakaitini tetetsie me'anutatenike me'erieti. Naukame mekaneukaxirieni tiyuhapaname kitsapana mehewitiaka, meta mekaniyutanenewieni mikahekiareki.

30 Kanuwa 'amipa ni'awamete mekatenikuwautiwekaitini kememiteyuta'unaki kanuwatsie, teni'awamete kanuwa 'et-simipepe mekaneukatuni haramaratsie miwatawikweitsitiani, mitikuhapatika kanuwa hixie memeukaxiriwani hepai mekateniyuriekaitini.

31 Papuru mipai katiniwaraye'eritiani xeitsienituyari kuyaxi tiwa'aitiwame meta kuyaxi: «'Iki xika kanuwatsie mekayuhayewa, xeme xepikatawikweni».

32 'Ayumieme kuyaxi kanuwa 'etsimipepe kaunariyari mekanaxitexiani, hapa paiti kaneukaxirieni.

33 Kahekiarimekakuri, kepauka Papuru yunaime kaniwatuikakaitini memitekwaniki: «Hikiri tamamata heimana nauka tukari xepuyurie xekatekwati.

34 'Ayumieme nepixewawirie, xemitekwaniki, kaneuyeweka xemayeneniereniki, nixewiti xeme xeikipayari yumu'utsie pikatatimaiya».

35 Mipai 'utayika paa 'uti'ika Kakaiyari pamipariyutsi kaniupitiani yunaime wahixie. Kanititara, kanitsutiani 'ikwati.

36 Yunaiti mikita mekaniuyuwairiya, memitikwaniki.

37 Kanuwa 'amipatsie temiyetekai huta tsienituyari heimana haika tewiyari heimana tamamata heimana 'ataxewi teiteri tekanitapaimekaitini.

38 Te'utihuxakari 'ikwaiki, kanuwa tekana'exanariya tiriku haramaratsie teheukaxirieka.

39 Hiki kepauka mukuhekiarixi, kwie

mepikamaiwawekai, matsi kwie mekani-
uxeiya 'ahakuyeukame, hakewa kanuwa
memeye'atianiekakai xika meyiwawenike.

⁴⁰ Mitikuhapatika mekanaxitexiani, harama-
ratsie mekaneikaxirieni, 'ini'awame kaunariyari
mekaniuxina. Karipa 'etsimiyewa metixiraka,
kwiepa mekaniuyenexiaximekaitini.

⁴¹ Matsi kanuwa xiekaripa kananutateni.
Muwa kwiepa mekanatinexiani. Tsurieya kwiepa
kaneuhani, mana kaniyuhayewa kaniutseni,
kitsapana kanita'uniekaitini tirikariyaki.

⁴² Hiki kuyaxi mekaniwakwikukaitini hipame
piretsutsixi, xewiti 'uhauximeti mikatawikweniki.

⁴³ Matsi xeitsienituyari kuyaxi tiwa'aitiwame
Papuru piwikweitsitiamikikai, 'ayumieme kani-
waruta'imaiya mipai memikateyuriekaki. Katini-
waruta'aitiani mana memeukatsunaxianiki meri
memahauwawekai, kwiepa memitinexianiki,

⁴⁴ hipatita kiyexitetsie hipatita kanuwa
tarimeyaritsie mehawiti mekaneutanexiani.
Mipai tete'uhauxiaka teyunaiti 'aixia
teteheu'erieti teputawikwei kwiepa paiti.

28

Papuru Maritatsie kemitiuyeikakai

¹ Merikitsi te'utawikweka, 'anake
tekatenetimani kwie hapa miyemakai Marita
katinitewakaitini.

² Teiteri mana kiekatari yemeki 'aixia
mekateniu'iyarikaitini tahepaitsita. Me'atinaika,
mekatani'iniekaitini 'ahurawa temukineki,
miwiyekaiki meta muhaitikaiki.

³ Hiki Papuru nekuki'eni, taipa menutixirieniki. Kuu tai makati yuta'unake, mamayatsie kanitakeni.

⁴ Teiteri mana kiekatari me'ixeiyati kuu mamayatsie hawiekame, mipai mekateniyukihawekaitini yunaiti: «Xiari 'iki tewi tiyumiekame pihiki, tsepaneti haramaratsie mutawikwei, heitserie pikapitiarie 'ayeniereti miyuhayewaniki».

⁵ Matsi Papuru yumama kaniutatsike, kuu taipa kaneuweni, miki 'atsipika'uyi pikatiukwinixi.

⁶ Miki teiteri mepikwewiekai mipai meteku'eriwati: «Tietitsi tahaimiki, yatini yapauka mimiki». Yamekateneutere me'itaxeiyati 'atsipika'uyi, 'ayumieme yiki pita mekateniuyihawe, mipai mekaniutiuyuani: «Xiari 'iki kanikakaiyaritini».

⁷ Hiki mana hurawa kwie kanikumakaitini, Pupiriyu naiti kwie haramara hixiapa miyema katinipinieyatikaitini. Miki yukie 'aixia tatixeyati kataniutanaki'erieni hiki haika tukari mana tekanikutekaitini hetsiana.

⁸ Pupiriyu paapaya hiyaki meta hakwitsiki tikuyeti yu'itaritsie kanikakateitini. Papuru kaneikuxeiya, meta kaniyutanenewieni heimana 'utimeti 'ana miki 'aixia reu'erieti kanayani.

⁹ Miyatiuyiku, hipatita tekwiwkivate haramara hixiapa kwie miyematsie memitamakai mekani'axekaitini, mikita 'aixia meteheu'erieti mepakikakai.

¹⁰ Miki waikawa 'aixia metatexeyati metatenimikwakaitini, meta teyehuximekaku mepitatelyetui ketita temiteheuyehiakai.

Papuru Xumatsie kemireta'a

¹¹ Hiki haika metseri te'uyurieka haramara hixiapa kwie miyematsie, kanuwa 'amipatsie teyetekaku kaniukuhaitire. 'Arekanitiriya miemetsie, kakaiyarixi memuyuhuta wa'ikiyari mamakai.

¹² Tsirakutsa teheta'axiaka, haika tukari mana tekaniuyurieni.

¹³ Manata temiyeki, Rekiyu tekaniye'axiani. Xeitukari 'anukayaku, tatsitia 'eka kanatini, meta hutarieka tukaritsie Putehuri tekaneta'axiani.

¹⁴ Mana ta'iwamarixi tekaniwaretaxeiya, miki mepitatsi'uta'ini 'atahuta tukari temiyurieniki wahetsia. 'Imatirieka Xumatsie tekaniuta'axiani.

¹⁵ Ta'iwamarixi Xuma kiekatari, mete'utamarieka tahepaitsita ketemeyikai, mirayutixexeiritire paiti 'Apiyu huyeyari 'utima meta Haikati miti'u mitiuyehipitiretsie me'ayenexiaka mekatananunake. Papuru warux-eiyaka, Kakaiyari pamipariyutsi kaniupitiani, meta waikawa kaniyuwairiyakaitini.

¹⁶ Kepauka Xumatsie temu'axia, Papuru kaniupitiarieni yuxaitame kiita mayekaniki, xeime kuya hamatia mi'iwianiki.

Papuru Xumatsie kemitikuxatakai

¹⁷ Merikitsi hairieka tukaritsie Papuru huriyut-sixi wa'ukiyarima yuhetsia kaniwaruta'inieni. Me'u'axiaku mipai katiniwarutahiawe:

—Neuxei 'iwamarixi, tsepaneti
'atsinemikatiuyuri teiteri wahepaitsita,
tatutsima wayeyari hepaitsita neka'uxiwa'ati,

Kerutsaremetsie nehia*ti* nepiyetuiya xumatari wahetsia.

¹⁸ Miki menetsi'uta*ti* iwawiyaka meka-nenixinakukaitini, ne 'axanemi*ti* uyuriekaiki nemimierieniki.

¹⁹ Huriyutsixi neniuki hepaitsita meminiukixiekai, 'ayumieme wai*ti* yarika Tset-saxi hetsia nekanie'ani, tsepaneti nete*ti* terima wahepaitsita tixa*ti* nemikarayexeiyakai.

²⁰ Hiki 'ayumieme nekanixe'uta*ti* inieni temitaxeiyaxianiki meta xehamatia nemititaxataki. Mipai yuri nemiti'erieki 'Ixaheri te*ti* teriyari kememiteta'ikwewa 'ayumieme tepiaki hiki nekanihika.

²¹ Miki mipai mekatenita'eiya:

—Tame xapate tepika'anuhuriwawe Kureyat-sie mieme 'ahepaitsita tikuxatame, meta xewiti ta'iwa pikanuawe 'axatatihekiatiati yanitsitini 'axatikuxatati 'ahepaitsita.

²² Matsi tekani'eniekuni kepemitiku'eriwa, mikitsie memitewiya wahepaitsita 'iki xeikia tepitemate, naitsarie 'axamekatenikuxaxatsi-wani.

²³ Hiki xeitukari mekananayexeiya Papuru hetsia memiyukuxeirieniki, 'ana yumireti mekanu'axiani kiitana miwayekatsie. Ximeripaiti 'itsutiaka taikaike katiniutahayewa, tiwakuxaxatiwati meta tiwahekiatiati kemireuyewetse Kakaiyari ti'aitametikaku hepaitsita, yuri tiwa'eritiamiti Ketsutsi hetsie, Mui*ti* sexi 'in*ti* arieiyaki, meta Kakaiyari niukametemama waxapayaritsie mikiki yuniuki tseiriyati.

24 Hipati yuri mekatenita'eririeni
kemitikuxata kai, hipatita yuri mepikate'uta'eri.

25 Yunaiti yaxeikia meteyikihaweti
mepikaheutayeixia, mekanitakikakaitini
kepauka 'imatirieka Papuru mipai mutayi:
«Yuriki 'Iyari Mitiyupata 'aixia kaniutayini,
Kitsariyaxi Kaka'yari niukameya mipai tatutsima
tiwarutahiaweku:

26 »“Iki teiteri wahetsia kenemie, mipai ketini-
waretahiawi:

'Tsepaneti waikawa xemi'enana, matsi
xepikaheitimaitikine,
tsepaneti waikawa xemeuneniere, matsi
tixaiti xepikatexeiya'.

27 'Iki teiteri wa'iyari mitsetse'iki,
yunakata mepeukanatika,
meta yuhixita mepakikipe.

Xika mipai meka'anenenike, mepeune-
nierenikeyu,
mepeu'enanakeyu,
yu'iyaritsie mepitemaiwawenikeyu,
meta nehetsia mepi'axianikeyu, ne 'aixia mete-
heu'eriekame nepiwarayeitiawe”.

28 »'Ayumieme xeme yaxeketenemaika,
Kaka'yari 'iki wikweitsitiarika kaneyeni'ani
memikahuriyutsixi wahetsia, miki hirixia
mekani'eniekuni».

29 Hiki mipai 'utayiku huriyutsixi mekanekine
niuki waikawa mexiatati.

30 Hiki huta wiyari kaniuyurieni muwa 'ayekaiti
yikimana tiyutuati. Yunaiti hetsiana memi'axekai
'aixia katiniwaxeiyakaitini.

³¹ Kamati katinikuxatakaitini kemireuyewetse
Kakaiyari ti'aitametikaku, meta katini'ikitakaitini
Ti'aitame Ketsutsi Kiritsitu hepaitsita, xewiti
ka'iku'imaiyakaku meta xeime kaheumakati.

**KAKAFYARI NIUKIEYA XAPAYARI
WIXARIKAKI**

**The Holy Bible in the in Huichol language of Mexico,
2020 edition
La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3